

**NATIONAL ASSEMBLY OF  
SEYCHELLES**

Tuesday 2<sup>nd</sup> November, 2021

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab e bonzour nou piblik ki pe swiv nou. Mersi pou zwenn nou ankor enn fwa pou en semenn travay. Nou a komans avek nou *Oder Paper* e Madanm Clerk Prezantasyon Papye.

**MADAM CLERK**

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. Papye ki pe ganny prezante *ce matin* i

*S.I 98 of 2021 Notification of proposed reclamation of Cascade under section 6(2) and (3) of Cap 106.* Mersi Mr Speaker.

**MR SPEAKER**

Mersi. Nou a osi fer *Public Bills, First Reading.*

**MADAM CLERK**

Mersi Mr Speaker. *This Act may be cited as the Seychelles*

*Infrastructure Agency Act, 2021.*

*This Act may be cited as the Seychelles National Youth Council (Amendment) Act, 2021.*

*This Act may be cited as the Employment (Suspension of Thirteenth Month Pay) Act, 2021.*

*This Act may be cited as the Seychelles Qualifications Authority Act, 2021 and shall come into operation on such date as the President may by notice in the Gazette, appoint.*

E dernyen, *this Act may be cited as the Seychelles Agricultural Agency (Repeal) Act, 2021.* Mersi Mr Speaker.

**MR SPEAKER**

Mersi Madanm Clerk. Avek sa nou ava pas lo *Private Notice Question.* E madanm raporter ou ava apel Minis silvouple? Wi Onorab Pillay?

**HON SEBASTIEN PILLAY**

Mersi Mr Speaker. Bonzour Mr Speaker. Bonzour tou bann koleg Onorab. Mr Speaker permet mwan pou *raise en matter* la - ki en dimoun pe anvoy mwan enn de bann mesaz, mon pe gannyen ek bann dimoun ki pe montre poudir i annan en keksoz ki kapab *call into disrepute*, e *cause en infringement* lo privez mon bann Manm lo mon kote latab.

Mr Speaker mon seryezman kondann aksyon Lapolis pou dir ki dan en levennman ki ti pe pase Sanmdi organize par *United Workers Seychelles* ki ti napa laprouvasyon oubyen *notice* pa ti'n ganny donnen, e ki bann dimoun ti pe partisip ladan dan en fason ilegal!

I annan Manm Lasanble ki'n partisip ladan e lefe ki Manm Lasanble in partisip ladan sa pe *call into question the office of the MNA* pou dir ki sa bann *MNA* pe partisip dan en keksoz ki ilegal e sa i pa korek!

E ki Lapolis pa devret fer bann *statement* koumsa san ki i regard bann *facts* e levidans ki annan devan, pou montre ki ti annan en *approval*, me ki lot kote bann dimoun ki'n vin lo lot kote – savedir bann dimoun ki reprezant Parti *LDS* ti '*Napa*' okenn *notice*, nor *approval* pou zot vin devan Lorloz, parey *United Workers Seychelles* ti annan!

**MR SPEAKER**

Ok. Mersi. Onorab Pillay mon pa pou adres sa pwen ki ou'n leve la. Si ou le mon al pli lwen ki sa donn mwan en keksoz an ekri e mon a regarde ki i annan ladan e mon ava adrese. Mersi.

**HON SEBASTIEN PILLAY**

(*Off-Mic*)

**MR SPEAKER**

*Sorry? En proposal? Non zis ekri mwan ou. Ok?*

**HON SEBASTIEN PILLAY**

Mr Speaker mon ti pe demann ou *as en proposal* ki *relax Standing Order* e demen mon met en *PNQ* e nou anmenm Minis pou *Internal Affairs*, e nou anmenm Lapolis la anndan e nou demann zot kestyon lo sa size.

**MR SPEAKER**

Ekri mwan avek ou *proposal* e mon a regarde, mon a donn ou en repons dan lazournen.

**HON SEBASTIEN PILLAY**

Mersi. Fodre pa nou kasyet laverite ...

**MR SPEAKER**

Onorab Cosgrow ...

**HON SEBASTIEN PILLAY**

... Mr Speaker.

**MR SPEAKER**

Mersi, silvouple mon'n koze! Onorab Cosgrow wi?

**HON WALLACE COSGROW**

Mr Speaker mersi. Bonzour Mr Speaker. Mr Speaker mon ti a kontan *follow-up* lo sa ki *LOTO* in dir ...

(*Interruption*)

**MR SPEAKER**

Me eskiz mwan ...

**HON WALLACE COSGROW**

...koman en Manm Onorab ...

*(Mic switched off)*

**MR SPEAKER**

Eskiz mwan Onorab Cosgrow. Mon'n fini dir Onorab Pillay ki mannyer nou pou prosede. Sa *matter in ganny settled!* Mersi bokou. I a fer parey mon'n dir li. Mersi nou ava apel Minis pou *Private Notice Question*.

*(Interruption)*

**MR SPEAKER**

Mersi.

*(Interruption)*

**HON WALLACE COSGROW**

*(Off-Mic)*

**MR SPEAKER**

Onorab Cosgrow mon pe *call* ou *to order!* Nou'n fer sa pwen. *The matter is settled! You keep quiet - you keep quiet or leave the room!* Mersi.

**HON BERNARD GEORGES**

*(Off-Mic)*

**MR SPEAKER**

Onorab Georges mon pa le repas lo sa pwen ankor silvouple! Si i lo la mon a dir

ou mersi bokou nou a kontinyen! Mersi Onorab Georges.

Nou a pas lo *Private Notice Question* Onorab Pillay. E Minis Jean-Francois Ferrari *Designated Minister* mersi pou ou prezans. Byenveni dan Lasanble. E mon war ozordi ou'n vin ou tousel san lapwi zofisye. Me mersi bokou toudmenm. Mon krwar ou prezans i ava ase.

Onorab Pillay ou *Private Notice Question*.

**HON SEBASTIEN PILLAY**

Mersi Mr Speaker. Bonzour Minis Dezinyen e ankor enn fwa bonzour tou dimoun a lekout.

Mr Speaker eski Lasanble i kapab ganny lenformasyon lo konbyen dimoun ki ti pou dan delegasyon Gouvernman ki pe al COP26? Ki zot pozisyon e konbyen sa pou kout pei? Mersi Mr Speaker.

**MR SPEAKER**

Mersi. Minis donn mwan en pti moman silvouple. Mon ou le eksplik bann Manm sanzman dan prosedir. ABC in dakor ki bann *Leaders* dan Lasanble *LGB* ek *LOTO* pou annan en dernyen pas lo bann *item* dan Lasanble enkli *PNQ*.

Alor komansman ozordi Leader Lopoziyon pou rezerv son bann kestyon siplemanter

pou dernyen. *LGB* pou ganny posibilite pou li pas en pwen si i santi ki i neser pou son kote pou fer sorti.

Me lareg pou kestyon siplemanter pou lezot Manm i reste dapre letan ki nou annan. E ozordi mon anvi termin sa sesyon kestyon 10er. Mersi.

Minis ekskiz mwan ou met ou en pti gin retar kontinyen avek ou repons.

**THE DESIGNATED MINISTER JEAN-FRANCOIS FERRARI**

Mersi Mr Speaker. Bonzour Mr Speaker. Bonzour tou bann Manm Onorab e tou dimoun ki a lekout bomaten.

Mr Speaker kestyon Leader Lopozisyon i konsern partisipasyon nou pei dan Konferans *COP26* pli presizeman konbyen dimoun ki pou partisipe? Ki zot pozisyon e konbyen? Eski sa deplasman pou kout pei?

Mr Speaker pou tou dimoun ki'n swiv nouvel enternasyonal sa detrwa dernyen zour i kler ki *COP26* i sanmenm sa aktivite enternasyonal ki pli enportan ki pe deroule dan lemond an se moman.

*COP*, setadir *Conference of Parties* i 26enm Konferans enternasyonal lo sanzman klima e lemond antye i ganny envite pou tou pei fer tande

son lavwa. Sa i enkli bann pei ki responsab pou resofman nou plannet, me osi bann pei ki viktim sa resofman lemond.

Mr Speaker Lepap Francois in apel sa Konferans – ‘Konferans Dernyen Sans’ e in pret en lekspresyon ki'n devan ganny servi par Onorab Naidu pou reklanmen ki bann Gouvernman i fer sanzman radikal dan fason ki zot pe dirize e lo aksyon ki zot pe pran an relasyon avek nou lanvironnman.

Lepap osi i envit bann pei pov pou lev zot lavwa e bann pei ris pou met aksyon la kot dan lepase, zot in zis met zoli parol. Bann syantis, bann filozof, bann environmantalis, bann biznessmenn, lazenes lemond, bann madanm, bann responsab tou larelizyon, pe zwenn ansanm dan en menm lavwa pou lans sa gran lapel pou met en fren avek resofman nou plannet.

Pou pran bann mezir pou anpes lanmer monte e ed bann pei ki dan gran soufrans an konsekans sanzman klima.

Parey Minis Lasante dan Gouvernman Sesel, Minis Peggy Vidot i kontan dir ler i pe koz lo pandemik *COVID-19* “*Nobody is safe until we are all safe.*” Lo sa plannet ki nou partaze avek tou lezot imen, lezot plant e zannimo, napa okenn group ki sen e sof si i kontinyen annan dimoun ki pe

perdi zot lavi e zot ganny pen akoz lefe sanzman klima.

Enn bann keksoz enportan pou remarke, se ki bann pti pei parey Sesel pe ganny en plas vreman enportan dan COP26.

Lavwa Sesel in sitan ganny byen tande ki Prezidan Ramkalawan in ganny loner pou adres Konferans an direk lo bann televizyon lemonn antye zis apre Presidan Lanmerik Joe Biden, e zis apre Prezidan Lafrans Emmanuel Macron.

Sesel i en sanpyon Lanvironnman e son plas se in finalman ganny rekonnèt koman en port parol pou larestan Pti Leta Zil. Se pour sa rezon ki partisipasyon Sesel ti sitan enportan *Glascow*.

Mr Speaker mon pa oule krwar alors ki kestasyon Onorab Leader Lopinyon in ganny depoze devan Lasanble akoz i pe kritik partisipasyon Sesel dan sa gran Konferans.

Mon pa oule krwar ki *Leader* Lopozisyon i pli enterese, pou konnen konbyen larzan pe ganny depanse;- konmsi dapre li i mal ki Sesel pe anvoy en bon delegasyon dan sa Konferans enportan.

Mon pa oule krwar ki pou ou *Leader* Lopozisyon e pou ou parti, i pli enportan pou kont larzan ki nou pe depanse pou

al *Glascow* plito ki kont sa bann benefis ki nou pou gannyen, ler nou egzize avek pei ris pou aksepte zot fot, pran zot responsabilite.

Akoz se zot ki responsab pou deteryorasyon lo nou lakot e dega otour nou bann zil.

Mon pa oule krwar ki ou koman en Manm dan en parti ki'n deza - avan ki nou ti vin dan Gouvernman - ou bann *Leaders* ti pe koz for dan bann deba enternasyonal lo sanzman klima.

Mon pa oule krwar ki ou pa preokipe par sanzman klima. Finalman mon pa oule krwar ki pou ou tou keksoz e tou desizyon ki sa Gouvernman i pran i merit ganny kritike, zis akoz dapre ou tou desizyon sa

Gouvernman i mal menm sa dernyen desizyon pou anvoy en delegasyon enportan kot COP26. Non Onorab mon pa oule krwar ki politik in ariv koumsa dan Sesel.

Plito mon ou le krwar ki ou kestasyon se reelman en lokazyon ki ou'n trouve pou aplodi pozisyon ki Prezidan Ramkalawan pe defann lebra kase onivo enternasyonal. En pozisyon an defans nou lanvironnman, parey le 2 Prezidan Sesel oparavan ti fer.

Mon prefere krwar plito ki ou ava dakor ki proteksyon lanvironnman e lalit kot

sanzman klima se 2 keksoz ki napa baliz politik;- ki napa balizaz ekonomik. ki sa se en size kot tou zanfan Sesel i merit annan en *consensus* e ki nou tou mou merit siporte.

Alor si sa lobzektif ou kestyon mon remersi ou pou donn mwan sa loportinite lo lapar Prezidan Ramkalawan, pou donn ou detay sa delegasyon enportan ki aktyelman pe partisip dan COP26 Glasgow.

Delegasyon Prezidan i konm swivan;

Prezidan li menm. Minis Zafer Etranzer ki'n met en kantite lenerzi pou organiz travay nou delegasyon. Minis Finans ki'n prepare nou largiman finansyel ekonomik e osi Minis responsab pou sanzman klima Minis Flavien Joubert.

Avek Prezidan i annan son *press secretary*, e sef Protokol *State House*. Avek ou permisyon Mr Speaker, mon pa pou donn detay laranzman sekirite pou Prezidan aköz sa pa permet. Mon kapab donn sa lenformasyon an ekri.

Me mon kapab deza asir Lasanble ki napa okenn legzazerasyon dan lekip sekirite Prezidan, aköz Prezidan i en dimoun byen rezonnab lo bann kestyon sekirite.

Depans pou tiket lotel sa group dirize par Prezidan, i

ganny kouver anba laliny Bidze "*overseas travel*" ki administre par *State House*. En pti presizyon par kont; pou Minis Flavien Joubert mazorite son deplasman i ganny kouver anba finansman *UNDP*.

Menm laranzman pe ganny fer pou 2 zofisyè Sanzman Klima, enn dan Komisyon Lenerzi e enn dan Departman Lekonomi Ble. Sa i kouver esansyelman par *UNDP* parey mon'n dir.

I reste aprezan en group 10 spesyalis ki sorti dan diferan Lazans otononm ouswa endepandan, e zot depans ti ganny kouver swa par *Commonwealth*, Labank Santral, lorganizasyon Meteoroloji Enternasyonal (*TNC*) -*The Nature Conservancy* e *United Nations Fund for Climate Change*.

En Manm delegasyon pou sorti kot Lanbasad Sesel Londres. Dan sa group i osi annan en ansyen Minis Seselwa, ki annan bokou leksperyans dan negosyasyon bann kestyon lanvironnman. E li osi se en lorganizasyon anvironnmantal enternasyonal ki pe finans son deplasman.

Mon osi annan lenformasyon ki ansyen Prezidan Danny Faure i osi annan plan pou asiste COP26, me tou lendikasyon i montre

ki i pou kouver tou son fre deplasman li menm.

Pou rezimen Mr Speaker, dan sa delegasyon anviron 21 dimoun zis 7 dimoun ki zot fre pe ganny peye atraver *Consolidated Fund*. Pou en levennman sitan enportan, mon trouve ki sa i vreman, vreman rezonnab.

I montre ki parey sa Gouvernman i dir e i souvan repete "Sak sou ki ganny mete dan nou lanmen pou nou okipe, nou fer li avek bokou prekasyon."

Mon fer temwanny partisipasyon Sesel dan enn pli gran levennman enternasyonal ankor - *EXPO 2020* e mon satisfere pou raporte ki laba bann depans pe ganny fer avek bokou prekasyon. E se pour sa rezon ki ler nou'n fini travay apre en long lazournen, nou bann reprezantan e nou bann travayer, zot ganny drwa koman bann bon travayer pou *relax* en kou avek en zoli kontredans, san ki okenn dimoun i ganny maltrete lo rezo sosyal.

Sif depans final pou nou partisipasyon Mr Speaker - pou nou partisipasyon dan *COP26* mon napa sa sif final al konmela. Si *Leader* Lopoziyon pa satisfere e i *still* bezwen plis detay mon pare pou fer li ganny tousala an

ekri, de ki bann sif final in pare. Mersi Mr Speaker.

### **MR SPEAKER**

Mersi Minis. Mon apre kekyon siplemanter bann Manm. Onorab Loze.

### **HON JOHAN LOZE**

Mersi Mr Speaker. Bonzour Mr Speaker. Bonzour Minis. Minis mon komans par rasir ou ki nou annan bon lentansyon avek sa kekyon ki nou'n poze. Nou annan bon lentansyon akoz nou pe zis fer nou fonksyon zerans lo larzan - parey ou, ou ti fer avek tou bon lentansyon letan ou ti asiz lo sa kote.

E nou kekyonnen akoz senpleman akoz zot vwayaze, zot reprezant Sesel apre nou vwar zot pe donn bal.

Bon Minis mon kekyon eski ou panse se ki pou annan en proper *buy-in* dan bann desizyon ki ganny pran par *COP* par bann gran pei - devlope sa voyaz? Konpare avek sa ki ti arive *COP Paris* an 2015 ki apre nou'n vwar serten pei pe *renege* lo zot bann komitman ki zot ti'n pran.

So en pti pei parey Sesel nou ale avek bonnfwa nou attend me set apre i pa nou ki vir ledou avek bann desizyon ki ganny pran par *COP*. Me vi ki nou 'n ale nou'n partisipe avek tou bann bon lentansyon, eski

ou santi bann gran pei pou onor zot komitman sa voyaz?

E mon kontan ou'n rekonnèt ki pandan 43an nou'n fer Sesel vin en sanpyon Lanvironnman Minis. Mersi.

**MR SPEAKER**

Mersi. Ou annan en kestyon pou reponn. Minis?

**THE DESIGNATED MINISTER JEAN-FRANCOIS FERRARI**

Mersi Mr Speaker. Mr Speaker mon krwar kestyon orizinal i lo lekel pou partisipe konbyen i pou koute, e non pa lo bann *outcome* sa Konferans. Alors mon mazine poudir Onorab ti pe zis fer *statement* e i ok alors. Mersi.

**MR SPEAKER**

Bon ok si ou napa repons lo son kestyon. Mersi Onorab Loze. Bon mon napa lezot lanmen ki'n leve Onorab Georges.

**HON BERNARD GEORGES**

Mersi Mr Speaker. Mr Speaker, bonzour. Bonzour Minis. Bonzour tou bann Manm e tou dimoun ki pe ekout nou.

Minis mon ti a kontan 2 presizyon silvouple, e mon pou les sa komanter 'donn bal' ater dan sa rigol kot i merite ete. Premyerman konbyen Manm an tou i annan ki pe asiste? E

ladan konbyen ki pe ganny *funded* par Gouvernman?

Dezyenmman eski ou kapab konfirm avek sa Lasanble ler Prezidan i voyaze pou bann voyaz enternasyonal e ki ganny peye par Gouvernman Sesel dan ki klas ki i voyaze? Mersi.

**MR SPEAKER**

Mersi Onorab Georges. Minis?

**THE DESIGNATED MINISTER JEAN-FRANCOIS FERRARI**

Mersi Mr Speaker. Mersi Onorab. Onorab parey mon'n eksplike i annan 7 delege ki ganny *fully funded* anba laliny Bidze "*international travel*" ki ganny dirize par biro Gouvernman.

I annan osi 4 manm sa delegasyon ki pe ganny *partly funded* par UNDP e *partly funded* par Gouvernman Sesel.

E parey mon'n dir pli boner pou Minis Joubert, i osi parey e son lotel i ganny peye par Gouvernman Sesel, me tou son bann lezot depans i ganny pran an kont par UNDP.

Donk lo 21 mon kapab dir 7 i *fully funded* e apre i annan enn de pti bout ki mon krwar mazorite i bann depans ki ganny fer par UNDP.



Lo keston *class* voyaz. Onorab napa personn ki voyaz *First Class* Sesel. Menm Prezidan pa voyaz *First Class*. Lareg ki nou aplike se ki en zofisye Gouvernman ki voyaz mwens ki 5erdtan i fer li dan *economy*.

So byensir pou Prezidan akoz i pa apropiye e Prezidan o *minimum* i deplas dan *class* Biznes. Ou ava apresye Onorab ki ler en Dirizan i annan en kantite rankont e nou konnen ki mannyer kalandriye Prezidan i ekstrememan sarze, e ki i komans fer son rankont imedyatman ki i ariv dan son destinasyon, alors i nesese ki i konfortab e ki i pe deplase pou ki sa bann rankont i produktiv.

Me solman mon ti a kontan ensiste lo en pwen Onorab, se ki sak fwa sa bann delegasyon, sa bann groser delegasyon i deplase, nou fer tou nou posib pou nou rod bann partner ki siport nou avek bann fre ki nou bezwen fer, dan sa bann deplasman.

Akoz Sesel napa sa kantite larzan. Alors I annan kantite lorganizasyon enternasyonal bann lorganizasyon lanvironnman; par egzanp is *The Nature Conservancy* ki pare pou ed nou dan sa bann deplasman. Alors sa i bann prekosyon ki

depans i reste *minimum* posib. Mersi Onorab.

**MR SPEAKER**

Mersi Minis. Nou a prezan pran bann keston siplemanter *Leader* Lopozisyon.

**HON SEBASTIEN PILLAY**

Mersi Mr Speaker. Mr Speaker non mon pa oule krwar ki Minis Ferrari ki Minis dan Gouvernman *LDS* - ansyen Manm *FPAC* - ansyen *Chief Whip* ki asiz lo sa kote latap pe sey vin dir ek mwan ozordi pa demann keston lo ki mannyer Gouvernman i depans larzan.

Non mon pa oule krwar ki minis Ferrari pe dir ek mwan i ok ozordi ki *whilst* ou pe dir ek Seselwa fer sakrifis ...

**MR SPEAKER**

...Onorab Pillay Minis in fer sa *statement* ...

**HON SEBASTIEN PILLAY**

... fer sakrifis ...

**MR SPEAKER**

...ou pa bezwen repet sa ki i dir ...

**HON SEBASTIEN PILLAY**

... be selman *Cabinet* Minis pe danse *Dubai!*

**MR SPEAKER**

Oule pas ou kestyon siplemanter silvouple. Mersi.

**HON SEBASTIEN PILLAY**

Mr Speaker – Mr Speaker sanmenm sa rezon akoz sa bann keksoz i bezwen ganny sorti.

**MR SPEAKER**

Retourn lo size kestyon please.

**HON SEBASTIEN PILLAY**

Mon lo size kestyon mwan akoz li ki'n anmenn sa dan son larepons.

**MR SPEAKER**

Mersi.

**HON SEBASTIEN PILLAY**

An pasan mon oule dir ek Minis-Minis eski oule *stand by* sa *statement* ki person pa travel *First Class* dan Gouvernman? Mon oule zis met sa devan ou akoz si ou pe *stand by* sa *statement* prepar ou, en?

**MR SPEAKER**

Ok i a reponn sa dan ou kestyon - kontinyen.

**HON SEBASTIEN PILLAY**

Mon pe al lo kestyon Mr Speaker. Mon premyer kestyon.

*(Interruption)*

**MR SPEAKER**

Silvouple lord dan Lasanble!

*(Interruption)*

**HON SEBASTIEN PILLAY**

Mr Speaker mwan mon *calm* mwan ...

**MR SPEAKER**

Onorab Pillay kontinyen.

**HON SEBASTIEN PILLAY**

... ou bann dimoun ki oule fer dezord – fer dezord lot kote latab zot ...

**MR SPEAKER**

Kontinyen Onorab Pillay.

**HON SEBASTIEN PILLAY**

Mr Speaker mon oule demann Minis i fer 3enm kestyon oubyen 4yenm kestyon ki mon anmenm devan Lasanble ki mon demann Gouvernman en sif lo en depans ki'n ganny fer.

Sa ti komans avek *trip* lo zil pou bann Anbasader. In komans avek bann *trip* ki'n annan lo bann lezot zil ankor e la safwasi ler mon vin demann lo depans lo COP26 Gouvernman pa kapab dir mwan konbyen in depanse, me in kapab donn mwan konbyen dimoun ki pe ganny sa.

So Minis eski ler Gouvernman pe *plan* sa bann

vizit aletranze eski sa i ganny fer san en Bidze ki zot dir zot pa pou desot sa Bidze? Oubyen eski lapros i se ki zot zis depanse apre ki zot pou gete konbyen zot in depanse?

Sa ki ou pe dir mwan ou dir mwan ou pa kapab donn mwan sif?

Dezyenmman ou'n dir nou poudir i annan zis 21 dimoun ki'n al COP26, eski Minis i *stand by* sa *statement* ki i annan zis 21 dimoun ki pe al COP26?

3enm kestyon regarding bann larepons ki ou'n donn nou;- nou fek vwar en gro delegasyon al EXPO 2020 Dubai, ok nou pa pe koz lo merit sa levennman nou – nou pe koz lo grander delegasyon bann dimoun ki'n al laba.

In annan en depans ki'n ganny fer. Prezidan Larepublik i sorti en EXPO Dubai kot i ti kapab al en sel al Glasgow i redesann Sesel – fer en lot depans – apre pou li al Glasgow.

Mon kestyon i se ki dan preparasyon itinerer bann dimoun, bann O Zofisye Gouvernman ki pe al sa bann levennman, eski napa en preparasyon ki ganny fer pou koup e minimiz depans ki nou kapab peye zisteman aköz Gouvernman in dir ek tou dimoun pou fer sakrifis?

E eski Minis pa krwar ki ler dimoun i war portre

dimoun pe danse dan en lotel Dubai i pa fer zot demann kestyon lo aköz zot, zot pe fer sakrifis me Minis pe danze Dubai? Mersi Mr Speaker.

**MR SPEAKER**

Mersi Onorab. Minis ou repons.

*(Interruption)*

**MR SPEAKER**

Onorab - *un instant*. Onorab dan lasal laba, silvouple gard –

*(Interruption)*

**MR SPEAKER**

Onorab Woodcock i annan en sesyon ki pe deroule la silvouple ekoute reste silans! Minis?

**THE DESIGNATED MINISTER JEAN-FRANCOIS FERRARI**

Mr Speaker mersi bokou mon a sey reponn sa bann kestyon. Mr Speaker premyer kestyon i demande si mon kapab konfirman si i annan 21 dimoun dan sa delegasyon?

Mr Speaker mon kapab konfirman poudir i annan 21 dimoun dan sa delegasyon, se sa lalis dimoun ki mon'n gannyen e ki devan mwan.

Mon'n aprann bomaten menm i posib ki i annan en Manm Lasanble ki pou osi

deplase, e ki son bann fre deplasman pou ganny pran ansarz par *Commonwealth*.

Me sa mon mansyon sa avek tou prekosyon aköz mon napa bann lenformasyon final lo la. Donk sa i lo kestyon bann Manm ki pou ale.

2enm kestyon, eski i annan okenn dimoun ki dan Gouvernman ki traver *First Class*?

Mr Speaker ler mon dir dan Gouvernman mon koz lo Konsey Minis e dan Konsey Minis napa personn ki voyaz *First Class*. In annan en pratik dan lepase kot serten Sef Egzekitif, serten lakonpanyen piblik in swazir pou zot voyaz *First Class*, me sa i en pratik ki nou pe dekouraze. Nou pe aktivman dekouraze aköz nou pe demann tou bann O Zofisye pou zot servi sa bann fasilite voyaz avek bokou diskresyon.

Mr Speaker mon pa anvi al tro bokou lo kestyon *Dubai*, me selman mon ti a zis – mon krwar i enportan pou dimoun konnen ki Sesel ti ganny reprezante o nivo kiltirel par plizyer group ki ti'n vin anim bann sesyon travay dan *EXPO*, bann sesyon inogirasyon, bann *National Day* Sesel.

E in annan bokou artis ek mizisyen. E mwan koman en Minis dan sa Gouvernman e mon bann koleg Minis a sak fwa ki nou annan lokazyon

pou ankouraz nou bann artis, nou ankouraz zot.

E set egzakteman sa ki nou'n fer e ki nou'n partisip avek zot pou nou montre lemonn kisisa ki nou, nou annan pou ofer. E sa mon mazine poudir Onorab *Leader* Lopoziyon ou devret pe kapab aplodi sa bann artis.

Pa bezwen pran en pozisyon kot ou pe dekouraz sa bann artis ganny en sans pou zot montre zot talan atraver lemonn. I enportan ki nou donn zot sa loportinite.

E mwan koman en Minis dan sa Gouvernman mon pa'n ezite dan tou sa bann fonksyon – dan tou bann fonksyon ki'n annan pou mwan kapab partisip e montre poudir mwan osi mon kapab dans 'pti galo' ouswa dans en kontredans.

E sa i enportan. I pa devret lev okenn lakoler lo kote Lopoziyon. Aköz nou pe fer promosyon nou kiltir e nou pe fer promosyon nou pep e sa i en keksoz enportan pou nou fer.

Parkont sa ki enportan pou kekfwa *Leader* Lopoziyon konnen se ki mazorite - enkli mon deplasman e deplasman Prezidan *Dubai* ti ganny pran ansarz par *EXPO* atraver bann linyativ ki Gouvernman *UAE* in pran, pou finans en bon pe bann bout dan sa levennman

ki Sesel in partisip ladan;- bann depans Sesel e osi bann depans pou plizyer bann lezot pei.

Donk in vreman - mon kapab dir ki si - la mon annan en sif ki mon oule partaz avek *Leader*

Lopozisyon se ki le nou ti premye tann bann Bidze pou *Dubai* nou ti pe koz - nou ti ganny dir apepre R10milyon pou fer sa aktivite.

E sa aktivite lo 6mwan e mon kapab dir ou ki Cabinet ti fer sa sif desann pou ariv par anba R3milyon pou en prezans 6 mwan, kot i annan plizyer dimoun - mon krwar apepre 6 a 7 dimoun ki an permanans *Dubai* dan nou stenn ki pe montre vizibilite nou pe atraver lemonn.

Donk nou'n fer en kantite zefor e avek en pti gin larzan byen mwens ki nou ti'n ganny demande - byen mwens ki nou'n ganny demande nou'n fer en aktivite ase remarkab. E mwan mon ti ava - konmsi lo lapar sa bann dimoun ki vreman pe travay tre, tre dir.

Mon ti a kontan mwan *Leader* Lopozisyon ki kekfwa ou pran sa lokasyon pou aplodir zot en pe! Konmsi annou aplodi kot i byen! Annou pa zis rod bann pti lipou partou kote.

I annan bann bon travay ki pe ganny fer. Mon konpran

i enportan ki toultan nou fer sir ki nou pe tyeke, nou fer sir ki tou keksoz pe deroul byen. Me i annan bann bon travay ki pe ganny fer.

Konmsi mon ti a kontan ou sorti dan sa lespri ki ou ladan kot ou vwar bann nanm partou - ou vwar bann voler partou - ou'n vwar bann labizer partou, sorti ladan e vin dan en - antre dan en monn kot i annan bann bon keksoz ki pe ganny fer;- i annan bann dimoun onnet dan sa Gouvernman, i annan dimoun onnet dan sa pei ki pe fer en travay vreman bon pou Sesel. Alors sa i mon 3enm kestyon.

Mon krwar ti annan en 4yenm me mon krwar wi - 4yenm kestyon sete lo si Prezidan ti'n al direk *Glascow*. Onorab deplasman Prezidan *Dubai* ti ganny fer parey mon dir anba en finansman ki ti ganny met a dispozisyon Sesel par *UAE*.

E tou sa bann fre ti ganny fer - tou sa bann laranzman ti ganny fer ant endependaman avek *COP26*.

E tou sa bann laranzman *Dubai* ti'n fini ganny pran an kont ti'n fini ganny kalkile avan *COP26* tou. So i pa'n annan okenn lefe. Me selman mon'n demande bomaten avek en *travel agency* si i ti pou kapab sanz sa bann *travel arrangement* i dir mwan

premyerman non i pa ti pou kapab sanze.

Epi si Prezidan ti'n al direktman *Glascow* sorti *Dubai* i ti pou plis letan deor e son tiket ti pou kout bokou pli ser. Alors nou'n swazir laranzman ki bokou pli ekonomik pou Sesel. Mersi.

### **MR SPEAKER**

Onorab Pillay si ou annan en klarifikasyon lo ou kestyon mon a permet ou pran laparol. Mon *remind ou Question Time* i pa en lokasyon pou antre dan en deba avek Minis. Silvouple klarifikasyon, mersi.

### **HON SEBASTIEN PILLAY**

Mersi Mr Speaker. Ou'n servi sa mon klarifikasyon, mon oule klarifye en *misapprehension* premyerman ki mon pa pe dekouraz okenn artis mwan.

Mon kestyon i senp mon pe veye kwa ki Gouvernman i fer e ki i fer li dan lespri ki li in dir i pe fer. E sa si ou pe fer sakrifis nou tou nou fer sakrifis e sa i enportan. E ki ou bezwen pran sa.

Dezyenmman Mr Speaker mon oule *reiterate* ankor enn fwa - i fer dernyen fwa ki mon dir sa Minis, eski ou le *stand by sa statement* ki napa okenn zofisye Gouvernman ki pandan sa dernyen mwan in travel *First*

*Class* lo en avyon sorti *Dubai*? Si oule stand by sa statement mon napa problem. Eski oule *stand by sa statement*?

### **MR SPEAKER**

Mersi. Minis in reponn sa statement 2 fwa, mon pa war nesosite ki i reponn en 3em fwa. Me selman si i bezwen reponn. Minis reponn e nou a terminen la silvouple.

### **THE DESIGNATED MINISTER JEAN-FRANCOIS FERRARI**

Mr Speaker mon ti kontan dir ki mwan e mon'n voyaz zis en fwa depi ler mon'n vin Minis e se ler mon'n al *Dubai*. Mon pa - dan tou bann avyon mon'n donn ou prensip - lareg ki Gouvernman i travay avek ki mannyer, lekel ki benefisyen dan ki kalite servis - ki kalite klas ki zot travay.

Sa mon'n donn ou ki nou prensip. Mwan mon pa lo avyon pou gete lekel ki anbark devan oubyen lekel ki anbark deryer.

*(Interruption)*

### **THE DESIGNATED MINISTER JEAN-FRANCOIS FERRARI**

Alors nou prensip mon repet ankor, nou prensip se pou mwens ki 5erdtan ou pa ni al dan *Business Class* ni dan *First Class*. Pou plis ki 5erdtan

si ou pe lwen atraver lemonn ou kapab benefisye avek en tiket *Business Class*, me selman pa tou dimoun ki pran sa bann loportinite.

An sa ki konsern bann artis mon ankor pe espere Onorab ki ou donn zot en lanmen, akoz sa ki zot in fer *Dubai* i vreman en keksoz eksepsyonnel e ki si ou, ou ti la, mon pa konnen si ou annan sa talan, me si ou ti la ou osi ou ti pou sot lo *floor* pou ou kapab akonpanyi zot.

Akoz se koumsa ki nou Kreol nou selebre nou kiltir, nou selebre nou bann aktivite e nou partaz zot avek lemonn! Mersi bokou.

*(Interruption)*

**MR SPEAKER**

Mersi. Onorab Pillay, silvouple gard en pe lord. Minis mersi bokou pou ou repons. Nou'n ariv a lafen ...

*(Murmurings)*

**MR SPEAKER**

... nou'n ariv a lafen kestyon e mon remerci Minis pou son partisipasyon. E mon swet li bon depar.

***(THE DESIGNATED MINISTER FERRARI WAS EXCUSED FROM THE HOUSE)***

**MR SPEAKER**

Mersi. Avan nou pran teknik mon pe reviz nou Lord Biznes en pti ...

**HON SEBASTIEN PILLAY**

*(Off-Mic)*

**MR SPEAKER**

Wi Onorab Pillay mon pe ekout ou.

**HON SEBASTIEN PILLAY**

Mersi Mr Speaker. Mr Speaker mon pe zis rapel ou ki ou ti'n dir ki nou pou pran *PNQ* ziska 10er – ou ti le fini by 10er i annan Manm lo mon kote latab ki'n lev lanmen ankor ki pa'n ganny sans demann kestyon.

Mon oule zis *remind* ou Mr Speaker tre kalmeman ki Minis in fer serten *commitment* devan Lasanble ki mon annan tou lentansyon – tou lentansyon pou kontinyen met presyon ki sa bann *commitment* i ganny onore – ki nou ganny tou sa bann lenformasyon! Mersi Mr Speaker.

**MR SPEAKER**

Mersi. Mon repons lo la e mon oule fer li kler pou bann Manm. Mon ti eksplike ki *PNQ* pou termin avek lentervansyon bann *Leaders* dan Lasanble. Avan mon ti pas zot laparol mon ti dir mon

napa okenn lezot Manm ki'n lev lanmen alor nou a pas lo bann *Leaders*. Personn pa ti'n lev lanmen.

E mon'n anons sa bann prosedir – mon'n swiv li. Onorab Cosgrow in lev lanmen apre e sa ti a ava en eksepsyon e mon fatige donn eksepsyon apre eksepsyon letan mon'n fer en prosedir. *That's it!* Mersi.

**(APPLAUSE)**

**MR SPEAKER**

Bon ekskiz mwan mon bezwen sanz prosedir ;- mon le eksplike ki mon ti'n dir Minis Derjaques ki pou pran *Bill* premye e mon ti'n demann li pou ariv isi 10er e i lo son semen i pa ankor arive, alor mon bezwen respekte sa. Alor nou pou pran en pti poz teknik e pou nou retournen 10er.

Avan nou fer sa mon annan en pti *item* ki mon ou le pase e mon demann bann Manm pou tenir zot plas en pti moman. Sa ki mon oule adrese se pwen leve Mercredi pase par *Leader* Lopoziyon *matter of privilege* an referans avek *Statement* Prezidan Ramkalawan lo koneksyon drog ek Manm Lasanble;

*Leader* Lopoziyon ti sit *Standing Orders* me i pa ti presize ki *Standing Order* ki i ti pe fer referans avek. Alor aköz mon pa ankor konn tou

*Standing Orders* parker, mon'n bezwen al repas ladan.

*Order* 40 byensir i donn Manm pou li lev en *matter of privilege*, me sa ki mon bezwen konnen an plis se ki *matter* e kote i ganny adrese dan *Standing Orders* oubyen lot regilasyon ki kouver travay Lasanble.

An sa ki konsern pwen ki *Leader* Lopoziyon ti leve; setadir *Statement* ki 'Manm Lasanble i kapab annan koneksyon avek drog' mon'n vwar *Order* 59(7)(2) me sa i aplik pou Manm selman. E mon site;-

*‘A Member shall not impute improper motives to, or make a personal charge against another Member except upon a motion calling into question the conduct of the Member.’*

Referans i klerman pou Manm e non pa pou okenn lot personnalite ki adres sa Lasanble.

Dan en lot kote mon'n osi remark *Order* 58(5) ki mon krwar i relevan e mon site;-

*‘The conduct of the President, Vice-President, Speaker’* eksetera, *‘shall not be referred to except upon a motion moved for that purpose.’*

Sa i fer referans avek the *conduct of the President*. Dan son sans etrwat *‘conduct’* i fer referans avek sa ki Prezidan i



fer, me dan son sans larz, *conduct* i osi aplik pou sa ki Prezidan i dir e dan mannyer i dir li.

E sa *Order* i dir nou kler, “*The conduct of the President shall not be referred to-*”

An tou ka sa ki relevan pou mwan la, se ki sa *Order* i endik en lentansyon kler ‘*the spirit of the law*’ parey nou dir e sa se ki nou pa la pou ziz Prezidan oubyen tir defo dan son *Statement*. Mon pa war okenn lot referans dan *Standing Order* oubyen lot regilasyon ki kontredir sa.

Alor konm napa baz pou mwan konsider size ki *Leader* Lopozisyon in leve, napa okenn komanter oubyen okenn spekilasyon lo *Statement* ki Prezidan i fer. Alor mon *Ruling* se ki mon napa nanryen pou mwan konsider ki en privez Lasanble in ganny afekte. Sa i mon *Ruling* e i final.

*Leader* Lopozisyon ou a ganny en kopi mon *Ruling*. Nou pou pran en *break* la pou le moman....

### **HON SEBASTIEN PILLAY**

(*Off-Mic*)

### **MR SPEAKER**

*Point of order*, wi?

### **HON SEBASTIEN PILLAY**

Mersi Mr Speaker. Mr Speaker, menm *Ruling* ki ou’n

servi, menm *Order* ki ou’n servi pou donn baz ou *Ruling* in dir ki “*conduct*” Prezidan, Manm Lasanble osi, so eski ou pe dir mwan ki en *stranger in the House* ki Prezidan i ete sa moman, i ganny drwa fer en *statement* ki *call into question the conduct of* en Manm Lasanble? Akoz ou pe komans en move presedans la, en move presedans!

E si ou komans ek sa presedans Mr Speaker i paret poudir Legzekitiv napa respe pou Lasanble! E mwan pou mwan mon *stand* kont sa!

### **MR SPEAKER**

Ou’n fini fer ou *point of order*?

### **HON SEBASTIEN PILLAY**

Mon krwar ki ou-ou lenterpretasyon sa *Order* i kler – ki si ou pe enterpret li pou Prezidan ou bezwen enterpret li pou Manm! *Whilst* ki mwan mon pa kapab *call* – demann en keksoz an relasyon *conduct* Prezidan? Prezidan osi pa kapab anmenn en *charge* kot en *conduct* Lasanble! I mars tou le de kote!

### **MR SPEAKER**

Bon, ou’n fer ou *point of order* Onorab Pillay? Mon repons pou sa *point of order* i sa ki dan mon *Ruling*. I reste parey.

**HON SEBASTIEN PILLAY**

(Off-Mic)

**MR SPEAKER**

Mersi bokou. Nou a pran en poz la e nou a rebran travay 10er me solman apre nou a pran nou poz regilye. Mersi.

(technical break)

**MR SPEAKER**

Byen, nou ava avanse lo nou *Order Paper* e nou pou pran *Second Reading, Minor Offences (Fixed Penalties)*. Madanm raporter ou ava apel Minis ek son delegasyon silvouple.

Bonzour e byenveni Minis Antony Derjaques ki pe reprezant Gouvernman pou sa *Bill*. Dan delegasyon Minis, byenveni egalman Mr Patrick Andre *PS* pou *Land Transport*. Mr Kenny Elizabeth, *Legal Officer* dan *Minister's Secretariat* e Mrs Julia Jean, *Legal Draftsperson AG's Office*.

Nou pe pran *Minor Offences (Fixed Penalties) (Amendment) Bill, 2021* e nou ava apel *LGB* pou fer Mosyon pou *Second Reading*.

**HON BERNARD GEORGES**

Mersi Mr Speaker. Mr Speaker, *Chief Whip* i ava fer nou loner. Mersi.

**MR SPEAKER**

Mersi. *Chief Whip, LGB* i pas sa Mosyon avek ou.

**HON SANDY ARISSOL**

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou bann Manm dan Lasanble Nasyonal. Bonzour tou dimoun ki a lekout, espesyalman bann zabitan Bel Ombre.

Mr Speaker, anba *Order 69(2)* mon *move* ki *Minor Offences (Fixed Penalties) (Amendment) Bill, 2021* i ganny lir en Dezyenm Fwa. Mersi.

**MR SPEAKER**

Mersi. Mon a ganny segonnman pou sa Mosyon? Onorab Esparon.

**HON REGINA ESPARON**

Mersi Mr Speaker, bonzour. Mr Speaker, Mosyon in ganny segonde.

**MR SPEAKER**

Mersi Onorab. E avek sa Minis i kapab fer lentrodiksyon son *Bill*.

**MINISTER ANTONY DERJACQUES**

Mersi Mr Speaker. Bonzour tou Seselwa ki a lekout. Bonzour *Leader of Government Business*. Bonzour *Leader of the Opposition*. Bonzour tou bann Manm Onorab.

Mr Speaker, i fer mon en gran plezir pou aparet devan Lasanble Nasyonal pou prezant en *Bill* pou *Minor Offences (Fixed Penalties) (Amendment)*, 2021 pou amann *Minor Offences (Fixed Penalties) Decree (Cap. 132)*.

I enportan pou note ki dernyen fwa sa Dekre ti ganny amande sete an 1996 e sa i plis ki 25an pase. Avek logmantasyon dan lakantite transport lo semen e dan sa bann dernyen lannen, in annan bokou plis Lalwa Trafik ki pa pe ganny obzerve, alors par bann motoris, sa in anmenn nou pou anmenn sa *Bill* devan.

Alors, Minister an konsiltasyon avek Lapolis e *Attorney Zeneral* in vwar li enportan pou revwar sa Lalwa pou fer li vin pli efikas. Sa bann lamannman pou ede minimiz lakantite lofans ki ganny komet lo semen, e sa an retour i ava ede ogmant sekirite lo semen pou tou bann motoris, bann pyeton e osi redwir lakantite aksidan.

Mr Speaker, permet mwan pou donn enn de statistik;

Lakantite tiket ki ganny donner par mwan i anviron 155. Sa mon pe koz bann statistik sorti kot Departman Transpor, pa Lapolis. Alors mon repet ankor, lakantite tiket ki ganny donner par

mwan i 155. Lakantite ki ganny peye par drayver i apepre 65, sa i reprezant 41 poursan.

Lakantite ki ganny met Ankour pou bann dimoun ki pa'n peye, i apepre 35 e sa i 22poursan. Lakantite dimoun ki pa'n peye e ki pa'n ariv Ankour i apepre 45 par mwan e sa i 29poursan.

An sa ki konsern *Highway Patrol Unit*, lakantite tiket ki ganny donner par mwan i apepre 1200. Lakantite tiket ki ganny peye par drayver i apepre 560 e sa i 43poursan. Lakantite ki ganny met Ankour pou bann dimoun ki pa'n peye, a sa moman i zero. Lakantite dimoun ki pa'n peye e ki pa'n ariv Ankour, alors i apepre 640 e sa i reprezant 49 poursan.

Mr Speaker, bann propozisyon pou lanmann sa Dekre i *comme* swivan;- Seksyon 2, definisyon 'Komisyoner.' Aparent ki Komisyoner Lapolis, sa definisyon pou osi prezan enkli *Director General*. Direkter Zeneral pou Transpor lo Later.

Sa i an vi ki bann *traffic wardens* ki tonm anba Departman Transpor lo Later. *Highway Patrol Unit* i osi donn tiket pou bann lofans miner anba sa Dekre.

Lot lamannman. Definisyon pou 'zour apropiye.'

Zour apropiye i pou sorti 3 zour pou vin 14 zour pou pey en *fixed penalty*. Sa i anliny avek logmantasyon ki pou vini dan pri *fixed penalty* dan regilasyon ki ti ganny aksepte par *Cabinet* pou donn ase letan pou bann drayver ki'n donn tiket pou vin peye.

I annan bokou konsern oparavan ki sa 3 zour pou pey sa bann *fixed penalty* pa ti ase. E nou espekte ki sa bann zour adisyonnèl pou sifizaman pou donn drayver ki'n ganny tiket pou pran zot responsabilite e pey bann *fixed penalty*.

Definisyon pou Minister, pou 'Minis.'

Minis Transpor dan sa lamannman pou osi vin Minis responsab pou sa Dekre e bann regilasyon anba sa, anba la. An vi ki relye ek bann lofans trafik lo semen.

Definisyon pou 'zofisye Lapolis.' Zofisye Lapolis pou osi enkli *traffic wardens* ki anba Seksyon 24A (2) *Road Transport Act*, an vi ki zot osi donn *fixed penalty* pou bann lofans trafik.

Definisyon pou 'Rezistrar Lakour Siprenm.'

Sa pou enkli Depite Rezistrar, *Assistant Registrar* e okenn lezot zofisye *Registrar* kot Lakour Siprenm.

Lafason ki Notice pou ganny servi ;

Lafason ki i pou servi pou ganny agrandi bokou plis pou fer li vin pli efikas ki pou prezan enkli osi landrwa travay avek travay lo zot transpor osi. An adisyon sa *notice* i osi kapab ganny servi avek en dimoun par lao 16an ki reste dan menn lakaz avek sa dimoun ki'n komet sa lofans, oubyen en *employee* azan ouswa en dimoun ansarz sa landrwa travay.

Amanman Seksyon 4 dan Dekre pou bann lofans miner. Seksyon 4(3).

*Notice* avan ti 14 zour e prezan in sorti 14 pou vin 30 zour. Apre ki en *fixed penalty* in ganny met lo en transpor e sa *fixed penalty* pa ganny peye dan bann zour apropiye, Komisyoner Lapolis ek Direkter Zeneral pou transpor lo Later pou annan 30 zour pou anvoy en *Notice*, avan prepar en *case* pou met Ankour. Savedir sa 14 zour prezan i 30 zour.

Direkter Zeneral pou osi kapab prezan anvoy *Notice* pou bann *fixed penalty* ki ti ganny donner par bann *traffic wardens*.

Seksyon 4(7), *Statements of Statutory ownership*;

Okenn dimoun ki ganny en *Notice* anba Seksyon 4(3) pou bezwen prodwi son *statuary statement of*

*ownership*. En *statutory statement of ownership* i en dokiman ki sertifye ki sa transpor i pou sa dimoun. En dimoun ki pa prodwi sa tel dokiman san en rezon valab, pou komet en lofans e sibir en lanmann R2000.

Mr Speaker, Seksyon 6. Lakantite letan pou lofis Attorney Zeneral anmenn en *case* Ankour prezan i en maksimom 6 mwan. Pou bann lofans ki'n ganny preskrir anba sa Dekre kont bann drayver ki pa pey zot *fixed penalty*.

Avek lakantite lofans trafik ki pe kontinyen ogmante lo semen, bokou plis *fixed penalty* pe ganny donnen. Sa i met en presyon enorm lo Lapolis e *Attorney Zeneral*, pou prepar bann ka pou met Ankour dan zis 3 mwan. Sa ti osi fer ki bokou dimoun ki pa ti pey zot *fixed penalty* pa ti pe ganny anmenn Ankour.

Sa logmantasyon 6 mwan i fer ki prezan Lapolis e *Attorney General*, pou aprezan annan sifizaman letan pou anmenn ban *case* devan Lakour.

Nouvo Seksyon 8 dan sa Dekre ;

Seksyon lofans anba sa Dekre. Pou okenn dimoun ki komet lofans anba Dekre e ganny kondannen, i pou bezwen prezan pey en lanmann pa pli o ki R20mil e

ki kapab ganny kondann ziska 3 mwan prizon. Sa nouvo seksyon i pou ede re anforse sa Dekre an totalite pou ki dimoun pa bezwen komet sa bann lofans trafik ki pli serye.

Mr Speaker, i annan bann regilasyon ki'n ganny aprouve par *Cabinet* anliny avek sa bann lamannman dan sa Dekre. I annan bann regilasyon ki ogmant bann pri *fixed penalty* relye avek *parking* ki pou vin R1000 e bann lofans *parking* ki pou vin R500.

Avek logmantasyon dan kantite lofans, Minister in konstate ki R200 i nepli efikas pou anpes dimoun kontinyen komet bann lofans.

*Cabinet* in deside pou pran en desizyon pou pli serye e ede kontrol e redwir bann sityasyon danzere lo semen, par fer monte *fixed penalty* pou vin R1000.

Aprè bann deliberasyon, pran konsern bann kominikasyon sorti kot piblik avek dan Lasanble Nasyonal, *fine* pou *parking* ti desann pou vin R500. Minister i reste angaze pou trouv bann solisyon pou ogmant lakantite *parking* sirtou dan rezyon Victoria. Nou pe anvizaze anmenn plis *multi story parking* dan lefitir pou amelyor sa sityasyon.

Mr Speaker, dan bann regilasyon ki konekte avek sa

lamannman dan sa bann *Bill*, pou annan bann regilasyon ki pou kouver bann transpor avek bann nimerò ki pa anliny avek regilasyon 58 - *Road Transport Regulations*.

Bokou bann plak nimerò transpor pa anliny avek regilasyon, ki i fer ki i difisil pou i idantifye nimerò sa bann transpor lo semen. Sa i kapab kree en sityasyon kot i annan en aksidan *hit and run* e dimoun pa pou kapab ganny idantifye par nimerò zot transpor.

Trwazyenmman, bann regilasyon pou kouver bann drayver ki anmenn manmray anba 10an lo moter, kont seksyon 74(2)(d) *Road Transport Regulations*. I annan logmantasyon dan lakantite dimoun ki pe anmenn marmray anba 10an lo moter ek lo *scooter*. E sa i danzere e nou bezwen protez sa bann manmray.

Mr Speaker, kwa ki devan Lasanble, se amannman sa Dekre atraver sa nouvo *Bill*. Bann seksyon ki mon'n kouver dan bann Regilasyon i zis pou montre ki an plis ki sa bann *Bill*, i annan bann regilasyon ki'n ganny propoze, ki'n ganny aprouve ki bann Manm Lasanble osi i pou ganny met devan zot.

E sa i lir ansanm avek bann lamannman ki nou pe

propoze pou ozordi devan sa Lasanble. Mersi Mr Speaker.

### **MR SPEAKER**

Mersi Minis. Nou a pran deba lo sa *Bill* prezan e mon annan Onorab Letourdie ki'n lev lanmen. Atann en pti moman Onorab Letourdie, mon a pran lezot non.

Permet mwan. Wi Onorab Labonte, permet mwan re pas lo mon lalis.

Mon annan dan sa kote, Onorab Romain, Porice, Adelaide, Roucou e apre Onorab Labonte, Onorab Letourdie mon'n fini mansyonnen. E dan sa kote mon annan Hon Loze, Uranie, Cosgrow e Aglae e osi Onorab Lemiel. Bann *Leaders* i kapab lev lanmen. Mon'n note Onorab Pillay deza e Onorab Georges i a kapab lev lanmen ler i oule. Onorab William.

Onorab Letourdie, ou kapab komanse.

### **HON JANY LETOURDIE**

Mersi Mr Speaker. Bonzour tou dimoun. Mr Speaker, selon mwan bann lofans miner i ganny konsider koman bann lofans ki pa sitan serye. Par egzanp si ou an devergonde dan piblik, pas lirin dan bann landrwa piblik. Mars touni dan bann piblik. Kas *speed limit*, pa met sentir sekirite letan pe vwayaze dan en transpor e lezot ankor.

Pou sa bann lofans Mr Speaker, pour sa bann lofans parey si en dimoun i ganny atrape, normalman son sarz i enkli pey larzan, sa ki nou appel lanmann. Oubyen mon mazine ou kapab al prizon osi, me pou en kourt peryod letan.

Mr Speaker, bi mazer pou fer pey en penalti se pou dekouraz dimoun pou vyol Lalwa. Penalti i devret pe fors sa ki'n komet lofans pou pran plis prekosyon, pou ki i a mazin defi letan i pe repet menm fot.

Me an zeneral i osi pou dekouraz tou lezot manm piblik pou vyol Lalwa zot osi.

Mr Speaker, fer pey lanmann koman en form penalti i kapab efektiv, me petet osi i kapab pa efektiv. Letan ki nou pe rod sa lazistis anver bann viktim, bann ki'n komet lofans anver nou sosyete an zeneral.

Dan sa ka mon panse se sa ki petet i fer annan sa nesosite, pou annan sa lamannman pou asir en Lalwa pli efektiv. Sa bann larzan, petet bann dimoun i demande kot sa bann larzan i ale, en dimoun ti demann mwan kot sa bann larzan i ale ? Me mon dir, me i kapab retourn kot Gouvernman kot i ava servi pou asir meyer servis piblik.

Me li sa ki'n ganny sarz pou peye Mr Speaker, byensir

i pou konplent aköz i vwar sa pa dan son lavantaz aköz i bezwen trouv larzan pou li pey son lanmen. Me mon konnen ki bokou dimoun pe dir la avek sa napa larzan, Gouvernman pa devret pe fer dimoun pey plis.

Me Mr Speaker, pou mwan sa i pa en depans ki'n ganny forse lo en endividi, pou ganny sarze aköz en lofans ki ou'n komet. I pa en komodite ki ou al aste dan en magazen, apre kot ou bezwen peye. I pa en komodite ki ou aste dan magazen pou ou aköz ki nou dir, si ou pa oule peye, napa lofans. Alors sa i pa ganny forse lo ou. Ou annan tout fason pou ou fer sir ki ou pa fer sa depans ekstra.

Mr Speaker, mwan personnelman mon napa difikilte avek sa bann sanzman, aköz mon vwar li koman en mwayen pou nou disiplin nou aksyon koman bann sitwayen responsab.

Mr Speaker, an terminen mon ti a kontan partaz en leksperyans avek Lasanble. Dan sizyenm Lasanble, ki mon ti en Manm, mon ti sorti Fisherman's Cove e letan ki mon ti ankor pe organiz mwan - mwan mon pa en drayver - me selman letan mon ti pe organiz mwan dan seat pasaze, mon ti'n ganny letan ariv kot Kordgard, mon pa ti

ankor ganny letan ris mon sentir pou mwan atase.

E ler mon ti ariv devan kot Kordgard ti annan *check* la e sa Polisye ti aret mwan. E i demann mwan mon non. Mon pe sey degaze pou mwan met mon sentir, mon pa ti reisir. Me i ti vwar mon pa ti ladan, mon ti pe sey *fiddle* avek.

Alors i ti demann mwan mon non e avek en lakoler prezan mon ti get li - konmsi mon dir, "be ou pa konn mon non ou?" Vre mon ti dir li. Pa akoz mon ti en Manm Lasanble, akoz mon ti deza popiler. Mon dir konmsi sel dimoun pa konnen Jany De Letouridie se li.

Mon ti ankoler, me apre mon ti realize poudir mon bezwen donn li mon non. E i ti donn mwan mon tiket R200 e ti en zour Vandredi. Son Mardi mon ti ale la kot nouvo Lakour, mon ti ale mon ti al pey mon *fine* ki mon ti'n ganny sarze.

An dizan sa Mr Speaker, se ki mon pe vwar poudir i komans par nou. Napa personn ki par lao Lalwa parey nou toultan dir. So, nou pa merit refize pou dir nou non e alors nou fer li nou devwar ki nou osi si nou'n ganny sarze nou al peye.

Me an menm tan mon pe dir avek bann polisye avek bann lezot dimoun, akoz nou tou nou kapab dir, ler nou pe

ale dan en transpor nou vwar en kantite fwa kot dimoun, menm polisye mon pou dir, transport polisye, mon vwar zot, zot zet bann *can* deor. Zot zet papye, zot menm zot lo telefonn. Zot menm zot pe kas deza sa bann Lalwa. Zot napa *seatbelt*.

Alors mon pe dir i komans par nou, apre pou nou kapab edik nou popilasyon ver keksoz ki byen. Alors Mr Speaker, mon napa okenn difikilte e mon pou siport sa lamannman. Mersi Mr Speaker.

### **MR SPEAKER**

Mersi Onorab Letourdie. Mon a apel Onorab Cosgrow.

### **HON WALLACE GOSGROW**

Mersi Mr Speaker. Bonzour ankor Mr Speaker. Bonzour Minis, tou dimoun ki avek Minis. Bonzour tou Manm.

Mr Speaker, mon lentervansyon lo sa Lalwa devan nou ozordi i enn ki pa pou tro long. Me selman mon santi ki i annan serten pwen petet ki devret ganny refer resorti ler ki nou pe analiz sa pti bout Lalwa, e nou pe fer serten amannman dan Lalwa.

Sa Lalwa i enn ki tre enportan Mr Speaker e mon kontan mannyer Minis in komans avek serten statistik dan son louvertir lo sa Prozedlwa. Minis in donn



bann diferan statistik lo penalti.

E sa bann statistik pou mwan i penn en portre Minis. Si ozordi pinisyon *or* annou dir li bann *fines* ki ganny mete e statistik i montre ki poudir i annan en bon pe dimoun pa neserman pran sa o serye. I pa sitan o.

Petet bann dimoun pa pe pran li o serye *or* zot pa pe pran letan pou zot petet al peye, apre letan i *relapse* e keksoz i mor lanmenm.

Minis si sa statistik ozordi i montre nou koumsa. Mon pe mazine dan mon lespri ler ou'n fer sa bann *fine* parey ou pe propoze dan Lalwa monte. E si Lalwa i pase, ki kantite dimoun ozordi ki pou deside desann, al peye akoz si ti pli ba par egzanp R200 pou en *parking fine*, ki zot dir i tro ba.

Ler in ariv R500 Minis, mon demann mon lekor ki kantite dimoun ki pou dir" be la mon ava al peye, akoz si i pa'n kapab pey R200, ki mannyer i pou pey R500?" Ou konpran?

I annan bokou keksoz dan sa Lalwa ozordi ki pe ganny diskite ki mon krwar i neser. I neser pou annan serten lord lo larout piblik. I neser pou annan serten lord par egzanp kot motoris i konsernen. Dimoun i bezwen *abide to* bann Lalwa ki ganny

met devan. Sa mon napa problemm avek sa, mon dakor avek sa.

Me nou bezwen osi annan, egzers serten rezonnabilite osi ler nou fer bann Lalwa e ler nou deside anmenn bann Lalwa devan, pou nou pous en pti pe sa responsabilite avek nou pep.

Mon dir sa Mr Speaker, akoz petet Minis i ava konnen poudir i annan serten prensip ki bann dimoun ki devlop Lalwa, si mon pa tronpe zot servi ler zot pe - sirtou ler zot pe met bann pinisyon dan bann Lalwa.

I annan en prensip ki ou dir sa pinisyon i bezwen omwen egal, si egal i sa term normal. I bezwen egal ouswa i reflekte sa lofans ki sa dimoun pe komet. Konmsi nou pa kapab en dimoun i dizon kas en Lalwa trafik. Nou deside met li lavi prizon. Mon pe donn en legzanp.

So sa pinisyon i bezwen annan serten relasyon avek sa krim ki sa dimoun in komet, sa lofans ki sa dimoun in komet e pou li vin en *deterrent* wi. Me nou pa kapab vwar sa dimoun ganny severman pini osi akoz i annan, petet i annan serten lenstans sa dimoun in fer en fot. I en premye fot.

So nou bezwen annan tou sa bann keksoz an konsiderasyon. Ler nou pe koz lo sa zafer pinisyon Mr

Speaker, ozordi ler nou get dan sa nouvo bann propozisyon ki pe fer, a mon pwennvi e nou'n tann bokou dimoun ki'n koze, ki'n dir. Ki'n fer bann *interview* lo televizyon. SBC mon krwar in *interview* detrwa dimoun - i annan bokou dimoun ki dir sa bann *fines* i en pti pe eksesiv. Sirtou dan sa moman ki nou pe viv ladan ozordi.

Larzan pa *readily available* pou pey *fines*. Larzan pa *readily available* pou lezot keksoz.

So pep Seselwa i vwar zot en pti pe kwense, ki sa bann lamannman i vin la ozordi anba sa nouvo Gouvernman, zot santi petet ti annan bann lezot lamannman ki ti en pe pli *pressing* ki petet Gouvernman ti devret kapab vin avek devan pou soulaz en pe pep Seselwa.

Sa enn lamannman ki la, malgre bokou pou *argue*, pou dir ki poudir i nesesser. Sa enn lamannman ki la ozordi i pe vini i pe vin tir larzan dan pos Seselwa dan plas met larzan dan pos Seselwa, parey nou ti koze.

Mon dakor zot pou dir sa dimoun in fer son fot, i bezwen realize. Me selman nou osi koman bann *lawmakers*, Gouvernman osi bezwen tenir kont osi ki poudir sa moman ki nou pe viv ladan i en moman ase difisil pou pep Seselwa. E petet i pa ti en

moman pou vin *increase* sa bann *fines*, sa bann *penalties* a sa nivo ki in ganny *increase*.

Mon krwar i annan keksoz ki nesesser anmennen me *timing* osi i enportan. Mazorite pep i dakor, i krwar poudir i bezwen annan serten *punitive measures* ki ganny pran. Me kan ki ou met sa bann zafer?

Sirtou la ozordi kot parey mon'n dir i annan lezot keksoz ki pe preokip pep Seselwa, sirtou avek sa zafer pri lavi, met larzan dan pos. So Seselwa i anvi vwar sa bann kalite Lalwa ki vin devan Lasanble. Non, pa Lalwa ki pini li, pini li tou lazournen.

So, avek sa Mr Speaker, mon ti a voudre vwar petet en lot lapros avek sa Lalwa e mon ti a kontan koz osi en pti pe lo sa zafer ledikasyon. Ou konnen i normal pou nou met sa bann mezir kot nou pini dimoun.

E nou pa vreman al get dan sa problem li menm kwa ki pe kree sa bann problem? Kaw ki pe fer. Mon a donn en legzanp parey *parking*. Ozordi *parking* dan lavil i en *nightmare*. Si ou'n desann en pti pe pli tar ki 9er, *parking* i en *nightmare*.

Prezan *parking* kot i annan, i *available*, bokou i bann *pay parking*. *Pay parking* prezan pou ou kapab, dizon ou prese, pou ou kapab

akse bann kupon pou *pay parking* i en lot *nightmare* ankor. So i arive parfwa. Mon pa pe dir i normal, me i arive parfwa ki dimoun i pri dan en sityasyon apre i vwar li bezwen al pey en gro *fine*.

So nou bezwen asize pran an kont tou sa bann zafer. E mon krwar Departman Transpor i devret ozordi, mon pa konnen kantite sa bann larzan, si dimoun ki pey *fine* i vin kot zot ouswa si i al dan *Consolidated Fund* apre zot ganny en Bidze. Me zot bezwen rod en fason pou donn pli ledikasyon.

Pa zis pini atraver Lalwa, me donn plis ledikasyon motoris. Donn plis ledikasyon, sirtou par egzant letan en dimoun pe komans aprann dray. I annan bokou plis ledikasyon ki devret ganny donner. E nou bezwen rod osi bann diferan keksoz ki nou kapab fer pou *alleviate* bann sityasyon.

Par egzant sirtou dan lavil, kot pou nou kapab fer nou sitwayen en pti pe pli *at ease*. Zot kapab ganny bann landrwa pou *park*. Menm si i *pay parking*. Fer bann kupon, bann fason *parking* pli *accessible*, dan en manner ki i ava annan mwens sityasyon *finer* e dan en manner ki nou pa a vwar sa mekontantman parmi sitwayen, ki nou ava kapab

annan en *buy-in* dan sa Lalwa e sitwayen i a vwar li responsab. E i pare pou li al fer bann peyman ki relye avek sa bann penalti.

So avek sa Mr Speaker, lo sa Lalwa, mon'n desid koz lo sa pti bout la. Lezot keksoz parey mon'n dir mon pa tro vwar li bann pwen kontansyon dan Lalwa. So avek sa Mr Speaker mon a *rest* la. Mersi.

### **MR SPEAKER**

Mersi Onorab Cosgrow. Mon apel Onorab Romain.

### **HON GEORGE ROMAIN**

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou bann Koleg Onorab e tou dimoun a lekout.

Mr Speaker, mon osi mon pou donn mon sipor pou sa lamannman dan sa *Bill*, akoz mon santi i annan tro bokou drayver ki annan tro bokou neglizans lo semen.

E mwan koman en drayver toulezour mon *drive*, mon osi mon vwar sa. Bokou drayver ozordi pa pe respe Lalwa lo semen, trafik. Parey mon a donn en legzanp, zot zis koup devan en *roundabout* zot pa fer letour. Zot zis pas par devan ou. Sa mon'n vwar plizyer fwa kot Le Mariner.

*Traffic lights* i rouz, ou arete, deryer zot ornen deryer ou, zot *overtake* ek ou. E ou

kapab zis mazine si ou en transpor pe sorti lo kote i koz en aksidan.

E mon krwar sa, parey Onorab ki'n koze avan mwan - mon krwar par egzanp in dir i pa e vwar nou pe met larzan dan pos Seselwa, i ti a voudre vwar sa plizoumwèn.

Me selman mon anvi zis dir Onorab, mon krwar osi pou ganny plis larzan dan ou pos, mon krwar osi ou bezwen pli responsab. E ou pa kapab neglizans, koz bokou aksidan lo semen, selman nou anvi met plis larzan dan nou pos. E sa pti remark mon ti a voudre pase Onorab.

Pou kontinyen lo sa *Bill* ki devan nou Mr Speaker, par egzanp osi ler ou realize, ozordi sa ki mon kontan zot dir pou tir li *from* 3 zour pou peye pou vin pou 14 zour, ki mon krwar sa i byen. Nou pou napa gran leskiz pou nou pey sa *fine*.

Me selman mon santi ki i mank landrwa ki bor ou kapab al pey sa *fine*. Akoz ozordi mon konnen, isi kot Lakour ki ou kapab al peye. Me parkont si ti annan detrwa lezot landrwa. Par egzanp dan Providence, kekfwa dan Laval, mon mazine kekfwa dan Anse Royale osi tou.

Ki en dimoun i kapab *at least* pa pe santi li pe deplase sorti lwen pou li vin peye.

Akoz i santi in fer en lofans, alor si bezwen peye.

Alors mon santi plis landrwa, lofis pou kapab al pey sa *fine* ti merit *available*.

Apre en keksoz mon ti a voudre pas en remark, lo kote parey bann *traffic warden* apre bann polisye ki aret ou ler pe fer sa *spot check, whatever* parey ou dir.

Mon santi enn ler zot lapros - sa mon ti a kontan met devan - mon konnen petet zot pe ekout nou, pou zot vin ek en pli bon lapros. Akoz enn ler, ler ou vini. Akoz mwan in arive detrwa fwa avek mwan, ou ki bezwen dir zot bonzour. Bonzour Mr polisye oubyen bonzour sa *traffic warden*. E ler ou dir zot, zot en pti pe ankoler. Zot kwa ou pe kekfwa gognard zot.

E mon santi la aprezan ler ou pe koz en zot. Akoz i dir dan Lalwa si ou refize donn ou non, ou donn en *false name* oubyen ou ladres, i annan en *fine* ki vin avek ki R20mil oubyen 3 mwan prizon oubyen ou kondann tou lede.

Alors mon santi lo kote sa bann *traffic warden* ek bann polisye ki fer sa louvraz, zot osi zot merit vin ek en fason pli disiplinèn. Lapros i merit vin pli byen, ki *at least* bann dimoun i a kapab ekout zot e keksoz i ava mars pli byen.

E alor se pi mon'n realize osi, ki enn de fwa. Parey dan Lalwa osi in dir, parey kot bann dimoun i park loto dan bann kontour, ki kapab koz bann aksidan. Me parkont sa bann menm polisye ek *traffic warden* zot aret bann dimoun dan bann kontour.

E mwan in deza arive avek mwan. Mon bezwen dir zot annou al pli devan, aköz i kapab koz en aksidan, en dimoun i kapab vini bat deryer ou loto. So sa osi i mon ti a kontan kekfw a i ganny get ladan en pti pe.

E pou fini Mr Speaker, mon pou dir osi si ou pa anv ganny *fine*, ou pa anv pey R1000, R500 oubyen R2000, zis pa kas Lalwa. Setou. I senp. Alors mon pou donn mon sipor pou sa *Bill* Mr Speaker. Mersi Mr Speaker.

### **MR SPEAKER**

Mersi Onorab Romain.  
Onorab Uranie.

### **HON ROCKY URANIE**

Mersi Mr Speaker. Bonzour Minis avek ou delegasyon. Tou koleg Onorab en bonzour zot tou. Minis mwan mon ti a kontan an relasyon avek mon zil, petet fer kler ki bor bann dimoun i peye zot *fine*, aköz zis semenn pase ti annan enn de dimoun, sirtou bann dimoun ki lwe bisiklet, Lapolis ti pe tir zot bisiklet lo

semen aköz zot ti'n *delay* zot peyman. Me zot ti pe sipoze pey Praslin dapre mon konpran. Me zot in *call* lofis. Lofis pa ouver, napa okenn repons dan lofis. So mon ti a kontan fer kler ki bor zot peye?

Aprè en lot kestyon mon ti a kontan, dizon en dimoun in sorti Glacis, in al Anse Royale, i pa'n realize poudir son *driving licence* i pa'n avek li. Prezan i napa okenn Lapolis ki'n aret li dan semen.

Ler in ariv Anse Royale i pe retour Glacis, i ganny aretet Point Larue, la ki dekouver son *driving licence* pa avek li e la in komet en lofans. Eski, i bezwen kontinyen pou al Glacis li. Eski ler prezan i pe monte, in pa sa la par egzanp Perseverance kot bann la i kontan arete, eski i ganny drwa ganny sarze 2 fwa pou menm keksoz? *Ok?*

Mon ti a kontan si i fer kler sa. Oubyen i montre laprev poudir be mon'n fini ganny sarze pli boner. Mon pe mont se mwan. Eski, fer kler si i pou ganny sarze 2 fwa.

Aprè mon pe gete, sa zafer en dimoun in met son transpor la en pti moman dan bor semen. Kekfw in al laboutik, in prese. En *emergency*. Zot met sa tiket lo son transpor.

Me i annan dimoun i dir ou ler li in vini i pa'n vwar tiket. I annan malisyè ki pase,

i tire sa. E li apre i pa konnen prezan in ganny sa li. Li apre pli tar i vwar li pe ganny pe ganny bann let, bann isi laba. Pe dir li poudir i pou bezwen pas Ankour, vin pey en pli gro sonm.

So mon ti a kontan zot fer kler ek sa. So mon ti annan zis sa de pti kontribisyon pou mwan fer. Mersi.

### **MR SPEAKER**

Mersi Onorab Uranie. Onorab Adelaide.

### **HON FRANCOIS ADELAIDE**

Mersi Mr Speaker. Bonzour Mr Speaker. Bonzour Minis avek ou delegasyon. Tou Manm Onorab e tou dimoun ki a lekout.

Mr Speaker, sa en topik ki mon vreman kontan pou deliber lo la aköz mon leker i bokou pres avek bann dimoun, sirtou pyeton avek bann drayver ki servi semen.

Me la avan mon komanse Minis, mon ti a kontan met a ou latansyon. I normal ki nou pe petet koz lo bann *fine*. E mon krwar Gouvernman osi i devret donn nou en *fair deal*, sirtou bann dimoun ki pe servi semen.

Akoz sa semen an zeneral li menm li i donn ou en pe problem ek ou transpor, e ki pou definitivman fer ou ganny en pe *fines*. E an plis ki sa Minis, ou a dakor avek

mwan. Ou osi ou desann sorti lo sid les Mahé dan bomaten, e ou kapab konpran poudir sa kalite trafik ki annan ler dimoun i ariv anvil, souvandfwa i annan en ta stres, menm pou li ganny en *parking* i difisil.

Mon krwar Gouvernman osi i devret get en kou ladan, aköz nou'n deza donn bann sizesyon ki en pe inovativ ki nou kapab servi pou nou kapab tir *stress* lo bann dimoun ki pe servi semen.

Mr Speaker, ler mon get lo sa *Bill*, sa *extend* letan ki nou'n donner, vreman i bon. Sorti 3 zour pou vin 14 zour pou peyman. Sa i ava donn letan pou bann dimoun kapab peye e ki pou napa gran, gran leskiz.

Me selman parey Onorab Romain in dir, nou devret annan plis landrwa pou dimoun kapab peye e ki sa bann keksoz zot kapab fer li okenn bann gran, gran stres.

E petet lo sa *Bill* osi i annan en keksoz petet nou bezwen met a latansyon Gouvernman. Ler nou pe dir *fines* i enportan pou Gouvernman osi, al mon pe met en pe *weight* lo Gouvernman, pou petet re verifeye en kou tou dilon semen.

Lontan ti annan bann *Highway Code* ki ti mete. Ou ti konnen la ou ti kapab al tan

kilomet, la ou pa kapab. Me ozordi i nepli annan preski sa bann *Highway Code* in preski sorti.

Lontan ti annan bann *Code* kot letan ti annan en lekòl ou ti vwar bann manmway pe koup semen. E tousala mon krwar zot devret komans re get ankor en kou. Pou fer sir ki Gouvernman i azour e piblik osi i konnen tou sa bann sir ki devret annan.

Mr Speaker, mon pou sipòrt ankor mon koleg Onorab Romain. Lapolis ler pe fer zot travay zot devret fer zot travay dan tout senserite. E par egzanp in dir, sa bann zafer *spot check* dan kontour, i en pe letan ki nou pe koz lo la e i pa tro aranze parey nou ti a krwar.

E ler ou pe fer sa, vre ou pe ede pou ou promot sekirite lo semen. An menm tan ou pe met bann dimoun ki pe servi semen an danze. So sa bout osi i enportan.

Minis, apre mon oule met a ou latansyon. Bann dimoun in dir mwan poudir i vre i annan bann dimoun ki vin pey zot *finés*, me apre zot ganny dir sa somonn in vini pou zot al Ankour. E i paret mwan i annan en pe manboulouk lo kote bann resi ki zot pe donner.

E sa i enportan pou gete. Akoz zot pe ganny trouve, *once* ki zot in vin peye e zot pe

ganny demande pou vin re pas ankor Ankour akoz zot pa ankor peye. Si ou napa ou resi avek ou, ou pou dan problemm. So sa osi i en keksoz ki ou bezwen gete ler ou pe koz lo bann *finés*.

Apre en lot ti pwèn ankor. Minis eski tou bann zofisye ki pou servi sa Lalwa, eski zot tou zot azour avek sa bann zafer *Fixed Penalty* avek *Minor Offence* la? Akoz par egzanp la, mwan osi mon lo semen. E n zofisye i aret mwan i dir mwan poudir mon glob deryer in brile e i pou *fine* mwan.

E ki mannyer mwan mon pou kapab defann mwan akoz lo sa glob napa *'use by date.'* Mon pa konnen kan i pou brile. So ki mannyer nou pou takle sa, pou ki ou pa vwar sivilyen avek Lapolis an konfli avek kanmarad.

Mr Speaker, ankor Minis mon oule koz en pti git lo sa zafer *tinted windows* akoz sa osi i ede pou fer dimoun ganny *finés*. E nou sipoze annan Lalwa ki pe vini me nou pa ankor trouve.

E i annan enn de dimoun pe demann mwan en pe konsey. Vi ki nou bann *Leaders* dan Lasanble, nou ganny trouve pe mars avek *tinted* lo nou loto antye. E sa mon krwar i en lofans.

E si piblik i vwar ou pe fer koumsa, zot osi zot ganny tante pou fer. So ki mannyer ou kapab zize ki sa dimoun li i kapab mete ki lezot dimoun pa kapab mete? Sa bann keksoz osi nou pou bezwen aranze pou ki nou ava annan en Lalwa pou tou dimoun, ki napa personn ki *above the law*.

Minis, atraver ou Mr Speaker. Minis mon oule demann ou ankor en kou. Vi ki Sesel pe bouz lo bann *platform digital*. Ozordi ou annan ou kart *license* i pa avek ou. Me selman ou pe sanz transpor, si ou kapab met li lo ou telefonn, mon krwar i en laprev ki ou kapab montre Lapolis poudir be la mon *licence* i la.

E eski i annan bann keksoz osi ki pe ganny fer lo sa kote pou ki sa kart *license* i ava petet vin dan en form elektronik ki nou kapab *display*. Nou pa a kapab ganny sarze?

E plis avek sa bann zafer *license* Mr Speaker, mon ti a kontan ki Minis osi i pran konsiderasyon ki zis prodwi en kart *license* zis koumsa, ou swa ou demann en dimoun pou prodwi li pou 24ertan, mon krwar ti en pe pli bon ki zis ou sarz li.

Me selman ou pa zanmen konnen si i annan *license*. So, mon krwar sa osi zot devret,

Gouvernman i devret get ekout ladan pou ki tou dimoun ki lo semen i ava annan en *license* ki i pe servi e ki *up-to-date* mon kapab dir.

Mr Speaker, mon ava ekout larepons Minis. Apre si i annan bann lezot keksoz nou ava kapab koze pli tar. Me an prensip mon kontan sa Lalwa. I pa vedir ki nou pe fer dimoun pey plis, me ou bezwen annan responsabilite letan ou lo semen, akoz ou kapab koz en lanmor en dimoun *anytime* ki ou pa pran ou responsabilite.

E avek sa de mo, Mr Speaker. Minis mon a esper ou larepons. Me selman dan gran liny mon krwar i ase korek. Mersi.

#### **MR SPEAKER**

Mersi Onorab. Nou a pran en poz la e nou a re pran travay 11er 15. Mersi.

***(BREAK)***

#### **MR SPEAKER**

Mon a zis eksplik bann Manm ki sa legzersis i pa ti en *planned fire drill* i aktyelman en *alarm* ki'n *set-off*. Me selman nou'n, nou a profit lokazyon pou nou not bann pwen ki nou bezwen regularize, bann febles kot i annan e nou a servi li *as best as possible*.

Mersi nou a kontinyen avek deba. Mon remersye bann Manm ki'n koze avan



pou zot entervansyon bref, *to the point* e mon pe obzerv limit 10 minit par entervansyon. Donk mon demann bann Manm pou kontinyen swiv sa legzanp. Mon apel Onorab Loze.

### **HON JOHAN LOZE**

Mersi Mr Speaker. Bonzour Mr Speaker. Mr Speaker 10minit *is more than sufficient*. Mr Speaker Parti *SNP*, e ler mon pe koz ou parti *SNP*, mon pe koz ou lepok ki i ti annan prensip, ou konn sa tre byen ou Mr Speaker ou ti ladan.

Minis ou konn sa pli byen ki mwan - akoz sa ti sa bann letan ki ou Minis ou ti koz fortman lo *rule of law*, ti enn ou *pet size* ki ou ti koz bokou lo la.

E enn bann keksoz ki zot *SNP* zot ti kontan koz bokou lo la pandan sa letan i enn keksoz ki mon ti kontan ekoute ler zot ti dir e toultan zot ti repete, ki ou pa kapab *over legislate* en pei.

Ou pa kapab *legislate* en pei *to the point* kot Gouvernman i ganny kontrol *ultime* lo son pep. E zot ti dir sa souvan an relasyon avek sa ki zot ti vwar. ‘Ti annan tro bokou Lezislasyon.’ Gouvernman i *over legislate*.’

E bokou ‘*petty Legislation*’ osi i en lot keksoz ki zot ti kontan dir.

En lot keksoz mon rapel zot ti kontan dir dan *SNP* sa bann letan se ki ‘tro bokou pinisyon.’ Ti annan bokou Lalwa ki ti pe fer provizyon pou pinisyon e souvan pinisyon ki zot, zot ti konsidere pa an proporsyon avek lofans ki ganny komet.

Sa ti bann keksoz ki zot, zot ti koz fortman lo la koman *SNP*. Ti zot bann prensip sa.

En lot keksoz osi zot ti kontan koz lo la sete balans, egalite devan Lalwa e annan en bon fason pou fer keksoz.

Nou vwar ozordi zot vini - e mon konpran zot, mon konpran tre byen ki zot pe sey fer, zot vini zot dir ou par egzanp ;- en legzanp mon tann Minis i site, i annan serten *number plates* ki pa an akordans e pa an regilasyon.

Alors li sa *number plates* i kapab koz en aksidan ouswa ankouraz *hit and run* e i pou annan en *fine*. *Fine* napa problem.

Lo lot kote ou annan ou dimoun ki'n *default* lo son *tax to the tune of millions*, li i ganny *amnesty*. I ganny en *amnesty*. En lot tretans devan Lalwa pou en lot kategori lofans, be zis enn i kapab in ganny komet par en dimoun ki annan mwayen, ki en milyonner li i kapab pey son *fees and fines*, li i ganny *amnesty*!

Tandis Mr Toulezour li ki i ganny persevwar konmkwa i annan en problemm avek son *number plate*, i ganny en lot tretans devan Lalwa. I ganny en *fee* e sepa en *fine* ki ogmante an relasyon avek sarz ki li in komet.

SNP dan Lopoziyon avek SNP ozordi dan la gouvènanans ki'n vin LDS natirelman, i annan en gran depar dan prensip ki zot in profese pandan en trantenn lannen, ki'n anmenn zot dan sa gran parkour ziska ki zot pe asiz la san sa bann sez kot zot ete ozordi.

E ozordi letan mon get zot, zot nepli pe profes bann menm keksoz ki zot in fer pandan 30an.

Pandan en trantenn lannen ou'n dir keksoz en fason e la ozordi ou'n vini ou sey aplik li en lot fason. Mon personnelman i pa mon zafer *one way or the other* parey zot in deza dir nou dan lepase, i pa nou pou dir zot ki mannyer pou *run* zot Gouvènanman. Be selman i mon pei egalman.

I egalman mon pei alors mon zis met devan zot ki promes ki zot in fer dan lepase i pa sa ki zot pe fer, ki zot pe delivre lo la ozordi. I toutafe e konpletman diferan.

E dan sa moman, dan sa moman kot sa pep in ganny envite ouswa anvoye pou mandyan zonnyon, nou annan

bann *extra charges* ki pou vin ganny mete lo li.

E mon kontan bann fason enteresan ki zot ekspoz bann keksoz. I toultan fot kelken, e sa kelken ki toultan *at fault* i msye ek madanm 'Toulezour' li.

Swa i en parese i pa pou ganny *welfare*, swa i pa pou ganny *URS* i napa responsabilite. I toultan annan en kelken - en '*other*' dan sa sosyete Sesel e Seselwa ki li i napa responsabilite li, ki li i *at fault* li. Sak fwa i pou ganny en pinisyon, i ganny arase en keksoz ouswa i ganny en pinisyon. I son fot, i *at fault*, i responsab pou sa ki pe arive ek li.

Be *à la même instant* parey mon pe dir zot i annan lezot dimoun osi ki *at fault* dan sa pei. I annan lezot dimoun ki egalman responsab dan sa pei e zot ganny *amnesty*. Zot ganny *amnesty*. Zot ganny eskize zot fot ki zot in komet.

Me leres ki pli ba li i ganny pini li. I annan en pinisyon. I bezwen sibir sa pinisyon e nou bezwen aplodir sa pinisyon ki li i pe gannyen.

E nou admet ki i en moman difisil pou tou nou pep. Si i pa ti difisil nou Prezidan pa ti'n pou'n debout devan Lasanble e envit sa pep pou al mandyan zonnyon !

I pa'n fer sa dan vid li, i konnen ki in fer li, in fer ki

akoz in santi ki sa i en moman difisil pou sa pep.

Be la ozordi mon vwar Minis i vini i dir nou i annan 155 ka *fixed* penalti par mwan. Be ou pou miltipliye sa par R500, par 12 mwan i fer pros R1 milyon Minis.

E lironi, lironi dan tousala ? Bomaten i annan en dimoun i dir nou li i dans pti galo' li, mon konnen dimoun i dans 'galo', i tay 'pti galo'. Selman li i dir nou i dans 'pti galo'.

Lironi ankor - Minis ki prezant nou sa bann *charges* ozordi in fek asize in zistifye R18mil pou en bann palto mal *fagoté*. Be sa pep li, sa Seselwa li, ki zot pe dir li i pa responsab si i pran son responsabilite, i pou anmenn tousala lo son ledò li ! I pou anmenn lavi *luxueuse* serten ki dans 'pti galo' lo son ledò.

E i pou anmenn ekstra pinisyon, ekstra *charges* ki zot met lo son ledò. Lo son ledò menm, li menm ki pou anmenn tousala li. Kreol. E i pou anmenn tou zot bann fo promes ki zot in fer li pou met larzan dan son pos, pou fer desann pri lavi, pou tir *burden* zeneral lo li. I anmenn lo son ledò menm sa li ! Pandan ki en bann pe dans 'pti galo' e pe met palto mal *fagoté*, R18mil !

Ou konpran en pe problem Minis? Mwan, mon napa naryen avek zot bann

*charges* ki pou ariv R930mil par an mwan ! I *ok* zot kapab mete. Mon problem se sa Seselwa, sa Seselwa ki li zot in lapès li ek tou sa promes pandan tou sa lannen, ki ozordi la i bezwen esper Zanvye 2023 pou son pos ganny en soulazman.

(Onorab Bistoquet ti ava fer mon an faver si ou reste ou trankil)

### **HON ROSIE BISTOQUET**

*(Off-Mic)*

### **HON JOHAN LOZE**

Mr Speaker...

### **MR SPEAKER**

En moman. La ankor en lot sityasyon. Bann Manm silvouple ler en Manm pe koze ekoute, ler ou ganny sans koze ou a koze ou a fer ou pwen. E mon pa kontan bann Manm sey enteronpe pou lot sey met lord. Onorab Loze ou a kontinyen silvouple.

### **HON JOHAN LOZE**

Mr Speaker mon pa pou long, mersi. Mon konsern mwan Mr Speaker, i Seselwa. I pa zot bann *charges*. I pa, mon pa pe kestyonn *legitimacy* zot Lalwa ki zot anmenn devan Lasanble. Zot kapab anmenn *it's ok*. Be sa *timing* pa bon.

Si ou konnen ou pou al donn Seselwa en larzan dan

son pos Zanvye 2023, ou pa kapab met sa Zanvye 2023? Akoz nenk 2023 ki Seselwa pou ganny en soupir dan son pos. *In the meantime* ou met *charges* ankor lo li e ou vir ledo ek tou ou promes ki ou'n fer pandan sa dernyen 30an?

E zot, zot *ok*, zot dans 'pti galo' parey zot dir zot met sout R18mil. Sa ! Sa ! La kot mwan mon pa kapab siport zot. Mon pa pe leve mon lanmen pou mon siport sa mwan! Mersi Mr Speaker.

### **MR SPEAKER**

Mersi. Onorab Michel Roucou.

### **HON MICHEL ROUCOU**

Bonzour Mr Speaker. Bonzour Minis avek ou lekip. En bonzour spesyal pou zabitan Mont Fleuri.

Minis mwan mon pou dir mersi Gouvernman ozordi, akoz nou vwar poudir tou Seselwa ozordi zot pe ganny en saler ki dan plas Gouvernman ki'n sorti dan lepase, ti pe dir ki i bezwen revwar saler, pou koupe, sepa i bezwen al revwar sepa kwa ankor.

Mwan mon pou dir mersi Minis, akoz mwan mon vwar poudir se ki Onorab ki'n koz avan mwan in sey vin konfiz nou pep ou kapab dir. Pou dir poudir sepa larzan, ogmantasyon, kan saler zot ti la zot, ti napa logmantasyon, zot pa ti mazine poudir sa

pep i bezwen en logmantasyon.

E ozordi ler nou vwar Gouvernman ozordi pe rod en fason ki demen i a kapab rod en mannyer ki sa pye fri, ki nou tou nou a kapab ganny en fri ladan, e ozordi enkrwayab ! I paret mwan ki Onorab avan mwan in bliye, in bliye Mr Speaker, poudir zot ti pe al koup saler tou Seselwa!

Minis mwan sa *Bill* ki zot pe anmennen i vreman enportan. Akoz mazorite fwa nou vwar poudir i napa sekirite lo semen, i nepli annan, sakenn drayver i dray akoz nou panse poudir nou dan nou prop lespas pou nou.

E zis en konparezon annou get bann dimoun ki pe *drive* bann *scooter*, souvandfwa ou vwar ou dan en sityasyon kot en dimoun lo *scooter* pe *overtake* ek ou lo kote gos. Ki si demen i arive kot ou sa drayver ou'n pran en desizyon pou arete, e sa i met lavi sa dimoun dan danze e menm i kapab perdi son lavi.

E mwan mon krwar sa bann *finis* ki pe ganny revwar, sa *Bill* li menm li, se ki i enportan ozordi. Akoz si nou pa fer li ozordi lekel ki pou fer? Eski mon zanfan demen ki pou bezwen vin anmenn si mwan mon pa anmennen ozordi? Akoz sansan plis bokou nou bann Seselwa pou perdi lav,i e nou pou vwar

poudir pou annan bokou plis aksidan.

E mesaz ki ozordi Gouvernman pe anvoy avek lepep deor, se ki si nou pa anvi vwar nou san sa sityasyon kot nou pe pey sa bann *fines* ser parey zot pe dir, se ki zis annou pa fer li. Annou pran nou responsabilite. E zour ozordi ou leve ou dir ou anvi vin en drayver, ou bezwen pe dray avek en responsabilite.

Responsabilite i pa zis sa *fines* ki ou pe gannyen, responsabilite i sa bann dimoun ki ek ou dan ou transpor ; bann dimoun ki lo larout ansanm avek ou e pa bliy ban dimoun ki napa en transpor ki la obor semen.

Souvandfwa nou'n vwar bann dimoun ki pe debout obor semen zot ganny tape. Zis lot fwa mon *witness* kot pres kot laboutik Mr Wayne-Hive en msye ek zon zanfan in ganny tape, aköz en drayver to pe dray dan en fason negligans.

E si nou pa fer li ozordi? Si nou, nou pa pran sa responsabilite pou nou anmenn sa devan, kan ki nou pou fer li? Eski toultan nou pou gete demen anvoy pou tan, be tou lazournen nou pou anvoye menm? E kan ki nou pou fer nou pep realize poudir in ariv sa letan pou nou pran nou responsabilite?

In ler pou nou les nou pep en kou, ou vwar? Nou pa kapab toultan fer nou pep depan lo Gouvernman li menm li. Nou bezwen anmenn bann Lalwa ki pou dir nou pep poudir sa letan i la pou nou leve, pou nou pran nou responsabilite. Aköz ler ou deryer volan i en gro responsabilite sa. Ou responsab ou prop lavi tou, ou zanfan, ou vwar?

E Mr Speaker, mwan mon krwar poudir i enportan ki mon'n ganny sans pou mon koz avek serten zofisye Lapolis lo sa 14 zour ki pe ganny demande pou amande. Se ki mon vwar ki li i enportan aköz i pou donn bokou bann drayver la deor ki pe ganny *fines* pou zot ganny letan pou zot al *settle zot bill* la.

Aköz nou vwar poudir sa 3 zour vreman i pa ti ase. Mon osi dan lepase mon'n ganny serten tiket mwan aköz serten landrwa ki mon ti'n *park*. Me selman mon pa'n pran li mon responsabilite pou mwan al pey li.

E bann ki pa pe peye, demen pou nou evite ki nou vwar nou dan en sityasyon, ki apre tou keksoz nou pou debout nek nou pou blanmen.

Nou bezwen pran nou responsabilite e nou bezwen vin en pei ki pe ganny gide *by the rule of law*. Nou pa kapab vin en pei kot sakenn i krwar i

kapab fer nenport kwa e zis en senp pti keksoz nou fer li vin politik.

Nou bezwen nou bann *Leaders* la anndan donn lanmen edik sa pep, *be it* lo nenport ki kote latab ou ete, zour ou'n vwar Minis i anmenn - I normal pou nou annan divers lopinyon.

Be selman nou bann *Leaders* nou, nou bezwen vin bann ki bezwen *lead* sa pep. Annou *lead* nou pep dan en bon semen. Annou aret fer zot krwar poudir tou keksoz i *about* nou pe depans isi, nou pe depans laba.

Minis mwan mon war sa *Bill* i bon, e sa *Bill* pou fer mon menn mon, premye mon menm mon mazin de fwa avan ki mon kas Lalwa. E mon konnen poudir avan ki mon sorti nenport ki destinasyon kot mon été, mon pou bezwen met mon *seatbelt*.

Mon pou bezwen mazine poudir mon annan mon bann frer la e ozordi souvandfwa nou vwar poudir bann aksidan i swa aköz lalkol neglizans. E mon pe swete poudir sa *Bill* ki a ganny aprouve par tou Manm Lasanble koman bann *Leaders*.

Mr Speaker mon dir mersi. Mwan a mon pou donn mon sipor sa *Bill*. Mersi Minis.

**MR SPEAKER**

Mersi Onorab. Onorab Labonte.

**HON ANDY LABONTE**

Mersi Mr speaker. Bonzour Minis, tou Manm koleg Onorab e tou zabitan La Rivière Anglaise ki pe ekoute. Mr Speaker depi bomaten, annefe i annan en pe letan depi ler mon tann sak fwa Minis i vin dan Lasanble ou toultan koz tann dir *timing, timing, timing*.

Me selman i paret mwan poudir ler mon pe get rezilta eleksyon ki ti sorti, ti kler poudir *timing was right* ler Seselwa ti deside met en mazorite *LDS* dan Lasanble, e en nouvo Gouvernman *State House!*

Alor i enportan pou zot pran kont ki nou konnen ki nou pe fer, e nou pou diriz sa pei dan en fason kot nou pep pou vin en pe pli responsab.

Alor pou retourn lo *Bill* ler mon pe get sa *Bill* Mr Speaker, en keksoz ki mon apresye, se ki i enportan pou nou pep konpran serten keksoz.

Si ou annan respe avek ou lekor, ou bezwen osi respe ou kanmarad. E i en pti git dezapwentan ler ou tann bann Manm Onorab lot kote ki'n koz avan mwan zot pe - Ou a krwar zot oule toler sa pep pou mazine toultan poudir pou zot reste O Pouvwar

Gouvernman i bezwen vwar larzan pou donn zot. Non !

Mwan mon krwar poudir en pep i bezwen pran responsabilite. Alor sa Lalwa li menm li, i pe fer nou pep konpran poudir ou pa anvi pey en *fine*, ou pa kas Lalwa ! Me selman si ou kas Lalwa ou bezwen fer fas ek la realite.

E en keksoz osi ki nou bezwen konpran, akoz ler mon'n tann Onorab Loze koze. Konmsi sa Lalwa ki nou pe diskite lo la, i pa enkli tou dimoun. Non ! Be napa en dimoun ki par lao Lalwa. Savedir ler nou pe vot lo la i enkli menm nou, si nou pou fer fo lo semen nou pou bezwen fer fas avek la realite. Alor i kler.

E ler mon'n tann Minis fer son lentervansyon in dir, ler in prezante 25an pase ki sa Lalwa i ganny revize. Alor i kler poudir pandan sa 43an zot pa'n kapab fer lesansyel ki nou ozordi nou pe sey fer pou nou edik nou pep, ki nou bezwen annan serten respe e protez nou popilasyon.

Akoz i vreman fer lapenn ler ou vwar en drayver lo semen, pa pe konport li ki mannyer i merite. E petet en lapel ki mon ti a kontan lanse avek bann zofisye Lapolis se ki menm zot, zot pa par lao Lalwa.

Akoz ou pa kapab vwar en zofisye Lapolis li i pe mal

konport li dan en transpor lo larout, alor mon krwar zot osi i bezwen annan en fason pou kapab dil avek zot e nou bezwen pran sa o serye.

Mr Speaker, en lot keksoz ankor ki vin dan mon lespri, se ki mon annan en group dimoun ki ti vot pou mwan ki ozordi mon dan Lasanble. E i annan bann dimoun ki vreman, si oule zot apel zot lekor ban *car lovers*.

So, i enpotan pou nou osi gete ki mannyer nou kapab rod en fason ki sa bann dimoun osi, i kapab annan en landrwa pou zot kapab detann zot, me ankor enn fwa avek respe kot i pou annan Lalwa, lareg ki pou diriz zot.

Malgre ki sa *Bill* i pa fer provizyon lo la, me selman i pa anpes nou pou nou rode ki mannyer nou kapab satisfere sa group popilasyon.

E Mr Speaker, en lot keksoz ankor se *speed limit*. Pou mwan mon annan en pti git konsern avek *speed limit* akoz koriz mwan si mon mal, i 40 kilomet par 'er' erdtan normal me lo *highway* i sipoze 65.

Konmsi ou zis demande si i apropiye pou sa *speed limit* lo 80, si i apropiye. Akoz konmsi ou a krwar i pa vreman fer sans. I en keksoz petet nou kapab get ladan pou nou kapab revize. Me mon vreman apresye ki *fixed*

*penalty* in sorti 3 zour ki ou'n kapab pey li dan 14 zour.

E an gro mon pou dir, mon pou siport sa *Bill* akoz i pe fer lesansyel e i enportan pou nou pep Seselwa konpran poudir nou pa pe fer sa pou pini zot. Non!

Nou pe fer sa pou edik zot osi. Akoz i enportan ki zot ganny ledikasyon lafason pou zot konport zot lo semen enkli nou tou ki la anndan dan sa Lasanble.

I konmans par nou, koman bann *Leaders* e tou dimoun ki fer keksoz kont Lalwa i bezwen fer fas avek la realite. In ganny koze konsernen *parking* dan lavil, ki mon siporte poudir i merit annan en amelyorasyon osi lo, pou nou annan en pe plis *parking* dan Viktoria.

Me an gro mon pou dir mon pou siport sa *Bill*, akoz i pe endik nou pep e i pe fer nou pep vin pli o serye. E mon ti a voudre ki lo lot kote zot konpran ler nou pe fer li. Nou pa pe fer li akoz pou nou sey fer krwar nou pep poudir en mal i vin en byen. Akoz en mal pou toultan reste en mal. Avek sa de mo, mon pou siport sa *Bill*. Mersi, Mr Speaker.

### **MR SPEAKER**

Mersi Onorab. Onorab Aglae.

### **HON EGBERT AGLAE**

Mersi Mr Speaker. Bonzour Minis ek ou *panel*. Mr Speaker, tou pei ki annan bann kad legal, kot i annan lord ek lape. Zot annan zot, bann kondisyon ki ganny *set*, parey dan sa *Bill* pe mete. Kot i annan bann penalti, ki ganny donnen pou etabli en baz lord, lape, dan li menm. Pou piblik e pou tou motoris osi.

E bann *fees* Mr Speaker i varye *across the world* - mon kapab dir, lemonn. Mon'n fer mwan bann pti resers, e mon vwar poudir, i annan bann pei ki son *fees* ki i pe donn ou pou en *fixed* penalti, i vremen o. Plizyer Dolar, \$200, \$300.

E osi, i annan bann lanprizonnman ki atas avek serten sa bann lofans ki ganny komet.

Pou mwan Mr Speaker, sa *Bill* ki devan nou, mon santi i pa pe devret mars li tousel. I annan bokou bann defayans, ki deza egziste, ki pe fer ki nou pou touzour annan bann Lalwa, sirtou Lalwa Trafik, ouswa Lalwa dan landrwa, lanvironnman piblik, ki pou kontinyen kase. Akoz i annan serten mankman ouswa dan Polisi, swa bann kad legal ki egziste.

Mon pou sit enn de pwen apre Mr Speaker, akoz mon pe dir sa. Mr Speaker, Lalwa Trafik li menm li, bann rezon ki en dimoun, ouswa endividi pou ganny *fixed penalty*, se



bann rezon par egzanj ; - *failure* pou met *seatbelt*. *Speeding*, *driving* anba lenfliyans, pe dray en transpor ki pa konformite avek regilasyon trafik, swa patant, swa lasirans napa.

I annan bann regilasyon *parking*, kot ou pe *park* landrwa pa dezinyen, *double yellow line*. Kot ou kapab annan en transpor ki – son - petet i annan serten defayans striktirel avek tel ki lalimyer, plak nimerò, ensidswit.

Sa i en pe bann penalti ki ganny aplike, en pti pe partou dan lemonn. E osi i annan bann bout ki konsern rasanbleman, imen li menm. Kot si bwar dan landrwa piblik, ouswa ou pe akt endesan dan en landrwa piblik, kot osi ou kapab ganny en *fine*.

Mr Speaker, mon pou pran en legzanp kot i konsern *parking*. Bokou dan sa bann sonm ki Minis in nonmen petet Minis pa'n al tro an detay poudir nou. Konbyen ladan ki *pay parking*, konbyen ladan ki *seatbelt*, konbyen larzan ki *reckless driving*, konbyen ladan, ki pe dray anba lenfliyans lalkol.

Me mon sir poudir, *seatbelt* i en konponan ase poursantaz ase enportan kot i konsern *fixed* penalti ozordi dan pei. E osi parey *parking*.

Me selman Mr Speaker, Minis ti monte lot fwa ler zot ti'n fer monte sa *fixed* penalti *from* R1000 e apre ti fer desann pou vin R500. E rezondet ki ti donnen, se ki nou napa ase fasilite *parking*, sirtou dan rezyon lavil ki mon dakor avek.

Me selman Mr Speaker, kestyon se, kwa ki nou pe fer? Eski nou pou kontinyen, penaliz nou drayver akòz in *park* dan en landrwa, sirtou kot napa *parking*. Kantmenm i pou fer letour, Mr Speaker i annan dimoun ki fer detrwa letour en *car park*, ouswa de letour lavil li menm, avan ki kapab ganny en *parking*.

Sa i korek, akòz mwan mon'n pas ladan. Pou mwan al kot en *building*. Ouswa ki ou bezwen fer se, al ek en dimoun fer *drop* ou laba, pou ou kapab akse sa servis ki ou pe al rode *without getting fined*, ler ou pe retournen.

So, zefor mon krwar i enportan pou nou armoniz enn de keksoz, ki pou fer ki kapab evite. Ki nou annan bann *fixed penalty* ki pe ganny donnen, dan en fason pou mwan, pa tor sa endividi. Me selman akòz lakoz lenfrastriktir ki napa ase, ki pa adekwa, ki fer ki ozordi ou pou vin viktim en *fixed* penalti.

Lot mansyon enportan Mr Speaker, i byen ou pou donn *fine*. Zot pe *increase*

zour, pou sorti 3 zour, pou al 14 zour. Me eski pa in ler pou zot konsider, akoz ou vin pey en *fixed* penalti, ou bezwen vin la kot Lakour.

Si ou sorti Baie Lazare, Takamaka, Port Glaud ou pou bezwen vwar ou pe desann, pou vin la. Eski lo nivo rezyon - parey nou kontan - nou bezwen mazin desantralizasyon. Se lo nivo rezyon annan bann landrwa, en *spot* kot zot kapab ale.

Par egzanp si nou poudir dan sid *or* dan was, petet dan sid, nou a dir Anse Royale. Nou kapab fer enn Anse Boileau. Petet dan les i ava annan son landrwa apropiye li osi.

Ki fer ki dimoun, i pou pli fasil dan li menm pour sa ki'n ganny sa *fixed* penalti, ale al peye. Akoz pou li, si ou napa en transpor pou ou ariv la, swa ou pou bezwen pran en lot transpor, an plis peye, pou vin pey ankor en lot *fixed penalty*. Sa i enn.

Lot pwen Mr Speaker, Onorab Adelaide, taler in koz en pti gi lo bann *tint*. Tou pei, laplipar pei ou pou bezwen annan ou en permi pou annan *full tinted windows*. E sa masyon ki'n dir poudir i ilegal, akoz anba *Road Transport Act*, i fer kler ladan ki se Komisyoner Lapolis ki annan drwa donn permi pou met *tint*.

E byensir atraver en prosedir kot ou met ou let. So, si ou'n ganny en let, napa nanryen ki ilegal, savedir ou'n ganny sa permisyon. E si zot santi zot bezwen aboli sa lo zot kote laba, zot kapab anmenn swa en *Private Members Bill*, dan en fason pou zot vini dir be *ok*, tire.

Me ozordi, i pa zis Manm Lasanble ki annan *tint* lo zot transpor. Dan Legzekitiv i annan, i annan lo transpor Minis ki annan. So annou, get keksoz.

Si ou anvi fer keksoz, Lalwa egal ouswa drwat, annou get tou kote. Pa target nou lo sa kote, dan en fason konmkwa zis nou ki annan. Sso-

Mr Speaker, lot pwen ankor mon krwar ki mon pou refer sorti, so lafason ki, serten penalti pe ganny aplike. Mon krwar Minis i bezwen, petet eklersi nou. Sirtou anba seksyon 8, kot i annan sa bann *Offences and Penalties*.

Par egzanp Minis, si en dimoun anba 'C', i donn en fo non, ler i pe ganny arete pou en lofans. Ouswa i kapab servi en non en lot dimoun, egzaktaman en fo non.

Eski ler en zofisyè - la ou'n koz *warden*. Pa souvandfwa, mon pa konnen si nou pou term *warden* ek Lapolis i mars parey, sa ki mwan, mon pe konpran. Me

selman souvandfwa se ou vwar Lapolis normal, ki vini aret ou. Sirtou dan rezyon sid was, mon vwar i mars koumsa.

Dan rezyon lavil mon vwar en lot kalite, ki ganny servi ki vin met sa zile, zonn *highlight*. Sa mon konpran poudir sa i bann *warden* menm, si mon pa tronpe. Be selman zot anba *Commission* Lapolis.

So, eski pa in ler pou, ler ou aret en dimoun dan son transpor, parey ou demann en drayver en *driving license*, demann li son kart idantite.

E si i napa, ou ava dir li be raporte *within*, parey zot fer avek drayver, *within 24hours* si ou napa, ou kapab raport kot sa Lapolis pli pres, e la ou ava ganny ou sarze, si ou pa'n fer li. Pou evite ki annan sa bann kalite mantalite parey nou pe dir.

### **MR SPEAKER**

Ou'n ariv 10 minit Onorab. Mersi.

### **HON EGBERT AGLAE**

Wi Mr Speaker. Mon pou terminen, mon annan zis de pwen, mon oule fer sorti. Lot eleman se. Landrwa kot ou pou al, ler en dimoun, ouswa en *body corporate*, ouswa en biznes in ganny sarze sirtou bann lakonpanyen ki annan zot transpor ki pa lo sa drayver

lo li menm, li dan en fason ou en lot. Se ki ou pou al *issue* sa penalti dan sa landrwa kot sa dimoun, i prezimen pe travay, ouswa ti pe travay.

Eski sa pa pou vin serten lenkonvenyans kot petet la, ou pou ganny *deny*. Sa dimoun pou *deny* sa keksoz, ou pa konnen, i pa lo son non. La *case* pou ale, pou al Ankour, i pa pou vin en zwe pran retour, li menm.

E dernyerman, servi teknolozi mon krwar i enportan pou nou kapab *regulate* en pe kot i konsern sa Seksyon Trafik, li menm.

Mr Speaker, mon krwar la ki pei, i annan parey en pes semi *ban* dan lenportasyon transpor fas a deviz. E lakantite volim transpor ki pe antre i limite. Annou sezi sa letan la pou nou kapab anmenn teknolozi dan nou sistenm trafik. Mon krwar i enportan.

I annan bokou pei ki'n vin avek sa. Sirtou bann *traffic warden* ki otomatikman koman en transpor i ganny arete, tou ou lenformasyon i ganny donnen. I la, ou konnen lekel *owner*, ou konnen, ou konn tou.

Eski pa in ler pou nou petet - mon konnen i annan serten travay pe ganny fer, pou nou kapab osi akseler sa. Pou kapab ganny lenformasyon *on the spot*. E la

si en dimoun, in ganny atrape avek, san permi ki swa *tinted* li menm. Me sa loto i annan en *registration number* li, ou pou konnen lekel son *owner*.

Ou a demann son *owner*, e son *owner* i ava dir ou. Parey Lalwa i dir ou, si i anrezistre lo ou non i bezwen pou ou e ou bezwen rann kont.

So, mon pa vwar dan sa pti Sesel li menm li akoz i annan serten keksoz ki bezwen ganny swa, retarde, ouswa pa kapab ganny *deal* avek. Kan napa okenn, sa pti git semen ki nou annan, kot ou pou al kasyet. E Lalwa i a pran aksyon ek sa ki'n komet son lofans. Avek sa Mr Speaker, mon poudir ou mersi.

### **MR SPEAKER**

Mersi Onorab. Onorab William.

### **HON WAVEN WILLIAM**

Mersi Mr Speaker. Bonzour Minis avek ou lekip. Mr Speaker, mon pou aport mon sipor pou sa Prozedlwa.

Mr Speaker, i fer mwan mazine ki letan nou ti dan sizyenm Lasanble, tou lede kote latab i annan bann size kot, nou'n tonm dakor an deor Lasanble, letan nou pe diskite.

Me ki letan i ariv pour nou vreman aplik li, kot i nesaser, nou tant pou rod leskiz akoz koman politisyen,

nou tou nou anvi bon rezilta. Nou anvi bon keksoz, nou anvi keksoz i ganny fer byen.

Be solman letan i ariv ler pou nou fer le nesaser kot i merite. Nou tant pou say en pti pe akote.

Mr Speaker, mon'tande, kot dan lepase bokou dimoun enkli lo nou kote, sa kote latab e lot kote latab Lopozisyon.

Nou'n dir poudir Gouvernman i tro *soft*, nou'n dir poudir *ex*-Prezidan Faure ti tro mou, ti tro *soft*. I pa'n le pran bann desizyon. Mr Speaker, mon vwar poudir nouvo Gouvernman ki'n dir ki i pou pran desizyon e fer aksyon. Mon vwar poudir i pe delivre,

Mr Speaker, laplipar nou isi anndan nou lo semen preski toulezour. E nou tou nou vwar dekalaz dan konportman bann motoris. Nou vwar bann diferan sityasyon dan *weekend* ki devlope. E ou ki en drayver si parfwa ou pa veye ou menm, Mr Speaker i pou ariv bann aksidan grav.

So Mr Speaker, ki mon pe sey dir la se ki nou, nou tonm dakor lo sa pwen poudir i bezwen annan lord. So mon vwar poudir sa Prozedlwa la, avek sa bann *fines* ki ava bann deteran. En dimoun, ki pa anvi ganny *fine*, i zis pa komet sa bann lofans.

Be Mr Speaker, sa ki mon'n note osi, se ki i annan bann zoli sizesyon ase enteresan ki'n sorti lo tou lede kote latab, ki mon santi ki Minister konsernen devret pran zot an konsiderasyon pou lavenir.

Akoz se koumsa ki nou pou avans devan. Akoz Lasanble, Manm Lasanble i annan drwa pou li fer bann sizesyon. E kot nou santi poudir realite in demande ki sa bann amelyorasyon, i ganny fer.

E mon dakor avek ou *Minister* ki, i annan sa nesesite pou fer plis *parking* pou bann motoris anvil. E osi vit ki zot kapab fer sa, i ti pou byen pou nou.

Me i malere ki ansyen Gouvernman pa'n fer ase. Nou pa dir zot pa'n fer keksoz. Pou met keksoz dan konteks se ki nou'n vwar volim transpor, trafik dan lavil.

Me dan sa *partnership* avek sekter prive, mon santi poudir, nou'n mank bann lokazyon avek bann nouvo *building* ki monte, pou nou kapab fer sir ki bann *parking* adekwat i ganny met an plas.

Mr Speaker, nou koz lo byen fer. Nou anvi keksoz ganny byen fer, nou anvi nou respekte Lalwa, nou anvi responsabiliz nou bann dimoun, nou anvi disiplin. Mr

Speaker, be i bezwen komans *quelque part*.

E mon vwar ozordi poudir an rezilta bann leksperyans, bann konsiltasyon, e konsiltasyon Mr Speaker, pa bezwen, pa devret aret la. Mon santi poudir Minister konsernen, vi ki annan bann zoli, bann konversasyon dan bann distrik. I annan bann pwennvi, i annan bann solisyon ki piblik menm zot kapab donner.

Mon santi poudir sa konversasyon, malgre ki nou pe pas sa Prozedlwa, sa diskisyon, sa dyalog, i bezwen kontinyen. Mr Speaker, mon dir sa aköz i annan en kantite keksoz dan distrik osi ki arive, ki ou vwar, ou demande pou dir be tyonbo en kou la.

Lekel ki sipoze ale dir sa bann dimoun, poudir be mon frer la ou pa sipoze pe *drive* lo en laplenn ;- lo en laplenn i pou bann zenn zwe foutbol lo la. Ou pa kapab *drive* en loto lo en, lo en *multi-purpose court* konmsi ou pe *take-off*, Mr Speaker! Dan *weekend* sa bann keksoz pe arive.

Mr Speaker, nou pa pou kapab depan zis lo bann gard trafik, ouswa bann *traffic warden*. Mon krwar poudir Seselwa an antye zot bezwen ini ansanm pou nou kapab ed Lotorite konsernen.

Mr Speaker, a sa pwen mon ti a kontan felisit travay ki bann gard trafik pe fer avek bann *traffic warden*. Mr Speaker, i pa en louvraz ki fasil.

E parfwa zot ganny menase. Me mon vwar poudir zot anvi fer zot travay, zot anvi vwar lord e lape.

E Mr Speaker, par vot an faver sa Prozedlwa, mwan osi mon ava pe kontribye Mr Speaker. E parey mon'n dir sa konsiltasyon i bezwen kontinyen ganny fer.

E Minis ankor mon enplor avek ou, ki sa bann zoli nide ki'n sorti - Par egzanp i vre, peyman ozordi, devret ganny desantralize. Peyman i devret kapab ganny fer par rezyon.

E mon santi poudir, ki i annan bann lezot keksoz ankor ki ava ganny fer par egzanp teknolozi in ganny mansyonnen.

Mr Speaker, i malere ki ozordi i annan serten, nou annan loportinite mon a dir pou nou kapab gannyen. So, mon ava demann avek Minis silvouple, pou fer le neser ki nou kapab amelyor bann servis ki zot pe donner.

Avek sa de mo Mr Speaker, mon pou aport mon sipor aköz mon santi poudir i en keksoz ki nou pe fer dan en bon direksyon. Mersi.

## **MR SPEAKER**

Mersi Onorab. Onorab Lemiel.

## **HON SYLVANNE LEMIEL**

Mersi Mr Speaker. Bonzour Minis avek ou delegasyon. Tou dimoun a lekout e mon bann koleg Manm Onorab.

Mr Speaker, ozordi devan nou Minis in vin avek en Prozedlwa ki pe rod laprouvasyon bann Manm Lasanble, lo pou ogmant lakantite larzan ki dan *d'autres mots* nou apel li *fixed penalty*. Ki bann plizoumwen drayver, pou peye, si zot kas serten bann lofans, oubyen si zot fer serten bann lofans, ler i ariv lo semen.

Letan mon pe get sa *Bill* li menm an zeneral. E nou letan sa *Bill* i vin devan nou isi dan Lasanble, enn toultan ki nou'n dir, nou rol apard ki *scrutinize*, pas Lalwa i enn. Me ler la, nou pe pas Lalwa, i enportan osi ki nou edik nou bann dimoun deor.

E a mon *avis* mwan mon pou met serten keksoz ki mon'n vwar dan distrik, lo semen ki pe pase. E ki kapab parfwa met an danze lavi swa pyeton, swa lezot drayver, oubyen lavi li menm li sa drayver, *en jeu*.

Ou konnen i annan de fwa ki letan nou lo en volan - mon pa konnen si nou bliy tou keksoz *or* nou bliy bann dimoun ki otour nou, nou pe

koz la lo kote bann dimoun ki mank serten responsabilite, letan nou lo semen.

Me i pa neserman osi kekfwa ki ler nou pe dir nou ogmant, nou pe ogmant *fixed penalties* pou sa bann dimoun ki pou anpes zot osi kontinyen fer sa. Akoz nou'n vwar ki i annan bann *fixed penalties* ki'n ogmante.

Minis in dir i annan en bon lannen pa'n fer monte. Me in annan enn de ki'n sorti en sonm pou vin en sonm. Me nou vwar ki dimoun *still* in kontinyen *drive recklessly* lo semen. Lanmor in kontinyen arive e dimoun i pa vreman pran son responsabilite.

So letan mon pe get sa *Bill* osi Minis, mon vwar nimer 6 zot in mete ki zot pou entrodwir bann provizyon pou bann lofans e bann penalti. Petet mwan lo sa kote mon ti a kontan ou eklersi mwan pti pe plis. Letan ou pe rann, ou pe donn nou ou larepons.

Akoz meton mwan mon vot, konmsi ou dir, mon vot an bonn fwa, lo sa *Bill*. Me selman apre, mon pa konnen ki bann lezot lofans *or* bann lezot penalti ki zot petet Gouvernman zot pe mazin vin avek.

La mon'n vwar enn la ki'n mete ;- par egzanp ou refize donn ou non, ou refize, oubyen ou servi en non en lot dimoun. Sa zot in sarz en

penalti R20mil, ki petet wi i annan pou vwar li, i ekstrenm. E petet dan lot fason osi, letan ou pou get li akoz nou bezwen toultan get de kote - petet i pou anpes, sa dimoun osi fer en bann lofans parey. Ou'n fer en lofans, akoz ki ou pa pou kapab donn ou non.

E la kot mon pou siport en pti pe, dan largiman kot Onorab Aglae in dir. Par egzanp en nenport ki dimoun i ganny arete, ou bezwen prodwir ou kart idantite, e ou bezwen fer sir ou annan ou *driving license* ki valid e i lo ou non.

Ler nou sa topik osi Mr Speaker, mwan i annan serten lensidan ki mon'n vwar, ki petet letan nou pe mazin lo kote *fixed penalty* osi;- ki i bezwen, nou bann *warden*, apre bann gard ki fer bann patrol lo semen sirtou. Mon krwar nou bezwen vin en pti pli vizilan.

Akoz ozordi i annan serten *trend* ki pe pase, kot ou vwar en dimoun avek en nimer, en plak nimer. Mon pa konnen mannyer zot pe fer sa bann kalite zafer mwan, en plak nimer devan i en serten nimer, deryer i en lot nimer.

E sa i danzere sa. Akoz par egzanp si sa bann dimoun koumsa i fer en aksidan ek ou, i tap ek ou. Demen, *or* nou pa konnen si sa nimer i anrezistre lo en dimoun. Akoz

si ou pe met en nimerò, lo ou transpor devan, en lot nimerò par deryer sa transpor, i vèdir i annan serten problem ki pase la.

E ler ou gete, i pa bann vye transpor sa Mr Speaker. I bann transpor ki ankor kapab pe marse lo semen, e ou pa konnen ki kalite bandisite ki pe pase, ki serten dimoun petet pe pran plezir dan fer sa bann keksoz koumsa.

E i kapab kekfwa sanmenm sa bann transpor ki pe enplik dan bann vol *or* dan bann lezot keksoz ki nou, nou pa konnen.

So, dan bann ka koumsa, nou bezwen vwar. La petet ou get dan sa laliny, kot si nou oule sa bann keksoz koumsa i arete. So, nou gete ki bann penalti *or* bann pinisyon ki kekfwa nou kapab dir i aplike pou sa bann dimoun ki *involve* dan sa bann tel pratik parey.

I menm osi, petet annan de ka kot ou vwar i annan serten transpor *or* mon pa konnen si annan serten, kekfwa i annan dimoun ki annan de, trwa transpor. Me ou vwar petet i annan de, trwa transpor ki kekfwa, an menm tan lo semen i kapab annan menm nimerò.

Sa osi i kapab i annan dimoun osi ki pe trafik bann keksoz koumsa ki, nou pou bezwen vwar e pou bezwen get

ladan ki mannyer i pou ganny *deal* avek.

Ler nou lo sa Lalwa *Minor Offences*, osi Mr Speaker. Mon vwar nou'n koz bokou lo kote konportman bann zofisye Lapolis. Mwan mon pa'n zanmen rankontre, mon'n ganny arete dan semen, wi. Donn ou kart, donn ou *driving license*, mon'n donner. E i kapab mon'n ganny arete tou, *speeding*.

Kekfwa ou pe taye, akoz *once* ou an retar, ou an retar. Me selman petet, ou pe, ou pe *drive* en pti pe pli vit. Me i annan serten zofisye Lapolis, mon pa kapab dir poudir mwan mon'n rankontre Zofisye Lapolis ki'n en pti pe brit ek mwan, non.

Mon'n rankontre, zofisye Lapolis ki vreman *pleasant*, koze byen. I annan petet ki pou remontrans ou. Me i annan kekfwa ki pou donn ou sa *fixed penalty*. Me parkont i enportan pou lezot dimoun, ki'n dir ki - *or* i annan dimoun la deor ki pe dir ou poudir bann Zofisye Lapolis li menm i en pe *rough*, avek zot.

Pa'n dir bonzour, *or whatever*, petet la dan sa ka koumsa sa i lo kote konportman sa bann dimoun. Zot bezwen fer sir ki ler nou pe *deal* avek drayver, nou pe *deal* avek nou lezot manm piblik, ki nou annan en fason ki



manner ki nou prezant nou avek sa dimoun.

E nou koz ek li byen, letan ki nou pe al donn li son *fixed penalty or whatever* ki nou annan pou nou adres li.

So Mr Speaker an zeneral, letan mon pe get sa *Bill* li menm, si nou pou koz, parey mon pe dir lo koteedik dimoun. Nou pe mazin lo kote nou krwar i pou fer dimoun pran plis zot responsabilite.

Nou pe mazine parey Minis in dir, i krwar i pou koup lo kote lakantite aksidan ki pou arive lo semen. Dan en kote ler ou get li ou balanse, ou vwar poudir be petet i annan dimoun ki poudir ou i byen, akoz parey mon pe gannyen la lo mon telefonn.

Menm mon annan dimoun dan mon distrik ki dir, i dir i annan dimoun mon santi i en pti pe, konport zot en pti pe tro dezordonnen lo semen, sirtou drayver in ler pou get en pti pe.

Me parkont koman en Manm Lezislater, konmsi mwan mon dout Minis, petet ou ava eklersi mon pou mwan konnen si mon pou lev mon lanmen pou siporte.

Mon ti a kontan petet ou reasir nou lo kote bann, lo kote sa pwen 6 kot i konsern sa bann lezot lofans e lezot penalti ki ou pe mazine *or* ki zot pou travay lo la, ki pou vin devan nou.

Akoz ti a byen letan nou pe vot pou en Lalwa, nou konnen egzakteman tou son detay, tou keksoz ki pou vin avek. Menm si nou pe dir nou pou kapab al fer bann lezot Lalwa, bann lezot lofans, met son penalti avek ki pou vini.

I enportan kekfwa nou konnen. E ler ki nou pe lev pou lanmen, nou konnen poudir wi nou'n fini pran sa desizyon, nou lev nou lanmen wi nou pou vote.

Oubyen nou pou bezwen tenir en pti pe akoz nou pa vremen konnen *what's next* petet dan sa bann lofans ek penalti ki zot pe mazine, pou al fer en pe pli tar ki konsern avek *Minor Offences and Fixed Penalties*. Mersi Mr Speaker.

### **MR SPEAKER**

Mersi Onorab. Onorab Loizeau.

### **HON NORBERT LOIZEAU**

Mersi Mr Speaker. Bonzour Minis avek ou delegasyon. Bonzour tou dimoun a lekout, bonzour tou Manm Onorab.

Mr Speaker, mersi pou donn mwan en sans pou koz lo en *Bill* sitan enportan. E ler mon'n ekout Onorab Lemiel Mr Speaker, in montre mwan ki Onorab Lemiel i en dimoun, i en Onorab ki'n ekout byen ki Prezidan Larepublik ti dir dan son diskour pou Leta Lanasyon e mon felisit li pou

sa. I mon koleg dan mon Komite.

In koz lo responsabilite. E mwan pou mwan Mr Speaker, responsabilite i en keksoz ki vreman enportan dan en pei. Akoz en pep san responsabilite, problem. E la Mr Speaker, permet mwan komans lo mon premye pwen.

Ou konnen isi Sesel nou, mon pa pe akiz Gouvernman. Sak Gouvernman i fer son travay dan son fason. Gouvernman i annan en keksoz ki zot pa'n gete byen. Konmsi pandan tou sa bann lannen Gouvernman pa'n vwar ki lakantite loto pe ogmante e semen napa, Mr Speaker.

Ozordi i annan plis loto ki semen! Nou'n fer *highway* wi, selman i al an montan dan sid. Me lo kote anvil, nou pe ganny sa problem *parking* akoz tou sa bann keksoz ti merit annan Mr Speaker. Ozordi laplipar bann semen. Sa bann semen ki antre en pe partou anvil, sa bann semen i egziste depi letan kolonyal, Mr Speaker. Antye partou.

Dernyen fwa nou ti vizite ek *Regional Council* ansanm avek Onorab Arissol lot lannen pase, nou ti vwar. Tou sa bann semen i an rin. Si ou koman sa par - Pa an rin ki manner, pa pe byen ganny *maintain*.

Si ou sorti depi Lari Hangar, desann kot Tisyon ankouri koz soz, i en problem e transpor i *park* partou kot i anvi. Sa i en pwen mon anvi refer sorti.

Me selman Mr Speaker, malgre sa, mon krwar nou bezwen pran nou responsabilite koman drayver, koman pyeton. Mr Speaker, mon a dir ou en keksoz. Konbyen nou ki'n al *Dubai*? Sa Seselwa ki'n al *Dubai* zanmen i koup semen an bonnavini. Ou konnen akoz? Akoz i konnen i pou mor ek sa kalite trafik. Zot pou marse, zot pou rod tou sa *underground* ki annan, tou sa *crossing* ki annan. E zot pa mars parey isi konmela ek en *mobile*. Vit, koupe. Me selman isi nou pa fer.

Isi nou pa fer nou Mr Speaker. Isi dimoun i fer sa ki i anvi, i *park* kot i anvi! Si ou al Langleter, isi dan Victoria. Dan Victoria i en dezord, nou konn tre byen. Napa *parking*, trouve napa *parking*. E Seselwa nou annan en labitid nou Mr Speaker. Si sa laboutik i la, fodre nou *park* la pou nou antre dan sa laboutik. Koumsa nou ete, pa nou konnen?

Me sa in la pou plizyer, en ta lannen. Pa'n fek arive la ler Gouvernman *LDS* in arive sa. I annan en ta lannen pe arive sa.

La *Shell*, deor? Deor ler ou al Langleter, partou. Onorab Cosgrow i frekan laba byen parey mwan menm. I konnen, mon zwer. Me pou al lo en *Shell*, zis ou vini ou antre la? Ou fer letour laba pa okazyonn trafik.

Be nou Sesel nou'n vin dan en kiltir ki tou keksoz i dan nou laporte. Nou pa pou *park* lo *stadium* pou nou vin kot Temooljee nou, marse. Nou pou oule *park* la obor kot Temooljee pou nou antre anndan kot Temooljee. Ou konpran?

Mr Speaker, tousala se bann lesefer ki'n arive. Aprezan i difisil Mr Speaker, pou tir sa dan dimoun. E meton en zour nou dir nou fer Victoria, okenn transpor pa annan drwa antre dan Victoria. Pou ou antre dan Victoria ou bezwen pey en *conjunction fee*. Nou pou kriy lasasen.

Pourtan ler nou al Langleter Mr Speaker, pou ou antre dan Lonon ou bezwen pey en *conjunction fee*. E zot, zot pli onivo lo kote teknolozi. Si ou pa'n pey ou krwar ou pe pase, bann la i *click* ou, ou vwar ou pti let i vini. Nou, nou pa ankor ariv sa nivo. Me i annan en Onorab in koz lo teknolozi. Me mwan mon krwar nou bezwen amelyor en pe lo kote teknolozi.

Nou annan *traffic light*, i annan *camera* lo la. *Call* en dimoun ki'n ganny atrape pe *cross* en *red light* or in aret lo soz. Pourtan in mete, pa in mete? Lo tou *traffic light* i annan. Zanmen mon'n tande en dimoun in ganny tyonbo.

E mon kontan, teknolozi i enportan, alors mon krwar nou bezwen al en pe dan sa laliny. Me selman Mr Speaker, responsabilite i enportan ki nou pran. Onorab Cosgrow in dir konmsi sa Lalwa pe vin dan en moman difisil.

Mr Speaker, Lalwa moman difisil, moman fasil Lalwa i bezwen la. E nou wi, mwan mon form parti *SNP* mwan Mr Speaker, parey ou. Depi lontan nou pe lager pou *rule of law*. E nou, nou Gouvernman i pran desizyon nou. Nou pa vin gete si ou dan moman difisil. Nou bezwen mars lo en lareg dan en pei Mr Speaker.

E ou a reste sezi lekel ki dan moman difisil pe fer keksoz ki enkrwayab Mr Speaker. Se bann ki nou pe koz napa. Zot ki pe bwar *Whiskey* dan kwen miray, Mr Speaker! Se zot!

Zot dan moman difisil Mr Speaker. Wi, Mr Speaker, zot lafen, selman zot pa swaf! Nou dan moman difisil nou Mr Speaker. Nou ki pou *park* dan en fason en mannyer. I annan en serten *discotheque*, mon pa

pou nonmen. I fer bann welele, Mr Speaker. Pase get lekel ki la.

Mwan, Onorab, bann Onorab, nou. Be bann ki dan moman difisil ki la, Mr Speaker!

*Ice box*, selman ler ou ganny *fine* ou gele i ser. Mr Speaker, mwan mon pou koz an term koumsa akoz mon santi sa i en fason pou nou kapab met en pe lord.

Ozordi i annan aksidan. Ozordi nou bann zofisye Lapolis pe travay entans e mwan mon pe vwar. I annan aksidan ki pe arive. Pou nou kapab koupe, nou bezwen met sa bann Lalwa pou nou redwir en pe sa bann keksoz.

E lo kote *driving license*, Mr Speaker, mwan koman en drayver, mon *driving license* pa sorti dan mon transpor. Ki mannyer en boug i *drive* selman i pa mars ek son *driving license*? *Driving license* in donn ou akoz ou'n ganny en *license* pou ou dray lo semen piblik. Ou kit se ou. Ou pa kapab kit se ou.

E en zofisye Lapolis i la pou *enforce* Lalwa. En zofisye Lapolis i demann ou non ou pa le donn li pou en rezon, selman nou pe konplent *fine* R20mi? Be ou dir ou non ou pa ganny *fine* R20, be pa i senp? Ki mannyer mwan mon dir mon non, Mr Speaker?

Mr Speaker, parfwa mwan mon panse nou en pep ki'n en pe tro ganny soutire an dot mo Mr Speaker. Kot si ou ganny en tiket. *MNA* i kapab *call* laba dir, ou konnen, sa la, soz. Mr Speaker, ou konnen sa bann *deal* mannyer i deroule. Be la anba *LDS* pa marse sa. Nou bezwen swiv lord. Si ou pa anvi ganny *fine* ou pa fer lofans. I senp. Pli senp ki sa. E lesefer i fer en ta keksoz Mr Speaker.

Ozordi nou annan en *carpark* kot La Perle Noire par egzanp. Eski mwan mon pou ale, mon pou al ek mon transpor mon pou zwe lanmizik for la dan *car park* La Perle Noire, kan i annan en ta *guest house*, bann kliyan in vini sorti lo lans pe repoze?

Eski Mr Speaker, be i en landrwa. Nou pa kapab zwe bor lanmer kot Savoy e zwe la tou. E ler bann kliyan. Aswar, bann propriyeter i *call* nou, konpran mwan?

### **MR SPEAKER**

Ou'n ariv 10 minit Onorab.

### **HON NORBERT LOIZEAU**

Mr Speaker, koman en pep nou bezwen pran responsabilite. E Lalwa i bezwen ganny met an plas dan moman difisil, dan moman fasil. Lalwa i Lalwa. Dan moman fasil si ou anvi kas Lalwa, ou ganny atrape. Si ou

pa anvî ganny atrape, ou obzerv Lalwa. Mr Speaker, i rete mwan ankor en 5 pwen.

### **MR SPEAKER**

Terminen silvouple Onorab.

### **HON NORBERT LOIZEAU**

Ok, Mr Speaker. Mon a termin zis lo sa pwen. Zis en pwen mon a termin lo la, lo kote neglizans.

Yer mon'n eksperyans en keksoz ler mon'n al simityer. Neglizans, lesefer Mr Speaker. E si Lapolis ti avri atan, ti'n *fine* sa zennonm, ou konnen ki i ti pou dir? Ar, mon'n vin simityer, i pa normal. Mon dakor La Toussaint. Me selman akoz La Toussaint ou *park* en *i10* dan milye semen ou blok trafik ki pou mont Belvédère, monte desann?

Mr Speaker, sa lensidan. Ler mon pe koz lo lesefer, mon pe koz lo sa bann sityasyon parey tou. E pa sa dimoun, e pa en dimoun byen eze ki fer sa. Toultan sa dimoun ki dapre zot i vilnerab, se zot ki pli dominer.

Akoz lontan ler ou fer sa la. Apre si gard in soz ou, nou kapab *call*. Dir "be larg li." "Larg li." Ou konpran?

Mr Speaker, mon a termin la e mersi pou donn mwan en pti sans pou dir de pti mo. Mon ti a kontan dir bokou keksoz ankor me

selman letan pa permet. Mersi Mr Speaker.

### **MR SPEAKER**

Mersi pou sa sakrifis Onorab. Mon bezwen demann *la vie Bills Committee* akoz mon konnen zot annan randevou dan *break*. I reste mwan Onorab *Leader* Lopozisyon e sa ki nou bezwen apel *the Member in charge of the Bill*, Onorab Arissol.

E apre byensir *summing-up Minis*, Komite. Alors eski ou mazine nou kapab prolonz sa sesyon, oubyen ou santi ou travay *Bills* - ? Akoz nou bezwen ou travay *Bills* dan *break*. Onorab Andre ou kapab adres mon lo la.

### **HON CLIFFORD ANDRE**

Mersi Mr Speaker. Mr Speaker par lefe ki nou annan bann reprezantan ki sorti kot *Attorney Zeneral* ki vin kot nou ek bann Minister relevan ki pe fer bann *sponsoring of bann Bill*.

Nou'n met *meeting* pou nou koman midi edmi. Mon ti a sizere ki bann Manm *Bills Committee* i ganny eskize, a leksepsyon Onorab Hoareau ki pou pas lo sa *Bill* si nou al dan Komite. Me napa gran, gran sanzman lamannman ladan. So kekfw nou pa ava ale, nou a sot Staz Komite.

Me selman pou nou pa fer nou bann *guest* esper nou,

Mon ti a sizere ki ou donn nou permisyon pou nou kapab eskiz nou lekor, lezot i a kontinyen.

**MR SPEAKER**

Si bann Manm napa lobzeksyon avek sa. Onorab Pillay.

**HON SEBASTIEN PILLAY**

Mersi Mr Speaker. Mr Speaker, mon krwar nou bezwen etabli en prosis. *Bills Committee* pa pou kapab absant Lasanble. Mon santi poudir i en pti pe *redundant* nou annan en *Bills Committee*. E si i annan bann lamannman ki pe ganny propoze i pa la pou ekout sa bann propozisyon, *it's as if* zot in fini dakor e in en *fait* akonpli.

Mwan mon sizere ki i annan lezot Komite osi ki sipoze pe zwenn 12.30. Mon konpran i annan COGA ki pe zwenn, la mon vwar *Chairperson HIV/AIDS* i lev son lanmen. So mon ava sizer pou pridans. Annou *adjourn* la e nou ava kontinyen apre. Mersi.

**MR SPEAKER**

Tre byen. Si i annan lezot Komite ki pe zwenn sa i fer en sans. Mon pa anvi met retar tou dimoun. Minis mon pou bezwen demann ou pou retournen apre midi e nou ava *adjourn* la e nou a re pran

travay parey labitid 2er pou nou terminen lo sa *Bill*. Mersi. Nou ava *adjourn*.

**(BREAK)**

**MR SPEAKER**

Bonn apre midi tou dimoun. Madanm Clerk mon vwar lasal i en pe vid, nou annan *quorum*? Non, nou napa. *Ok*, annou atann.

Tre byen. Nou pe kontinyen avek *Minor Offences Bill*. Nou ava apel Minis silvouple.

Bon, bonn apre midi Minis ek tou bann zofisye. Nou a kontinyen avek *Minor Offences Bill* avek 2 entervenans ki reste pou koze. Premye Onorab Sebastien Pillay.

**HON SEBASTIEN PILLAY**

Mersi Mr Speaker. Bonn apre midi. Bonn apre midi tou koleg Onorab. E bonn apre midi Minis avek ou delegasyon.

Mr Speaker, sa Lalwa i prezant nou avek en konteks enteresan ozordi. En konteks enteresan akoz nou bezwen apresye serten keksoz *regarding* ki mannyer lemonn parfwa i ofer nou swa loportinite, oubyen i donn nou serten leson ki nou bezwen tire.

Mon'n ekout byen bann entervenan lo lot kote latab, e annefe Onorab Lemiel lo nou kote in sey fer en *attempt* pou sey zwenn ek zot lanmwaye semen, me i paret poudir zot pa'n enterese pou ekout sa mesaz. E zot in prefer pou al dan lot direksyon ki nou ti konnen zot pou fer.

Ou pa kapab pandan plizyer lannen promot en kiltir anti etablisman, anti Lalwa. Atak tou Lalwa ki sa Gouvernman in anmennen pandan sa dernyen deseni ouswa de deseni, e apre ekspekte de zour ou lannmen koman ou ganny pouwar tou dimoun pou tonm dakor, e tou dimoun pou dakor avek bann keksoz ki ou pe propoze.

Tou dimoun pou kapab pran son responsabilite. Tou dimoun i sipoze kapab pran son responsabilite.

Me larealite i reste ki se par egzamp, atraver ou Mr Speaker - la mon bezwen veye, aköz *Standing Order* i dir mon pa kapab *impute* karakter en Minis, me selman si en dimoun i vin devan Lasanble i *impute* karakter en Manm Lasanble, parey Prezidan in fer, i paret i *ok*.

So mon pa pou *impute* karakter Minis. Me mon pou dir, pandan plizyer lannen Minis li menm ki'n en *advisor* legal en pe partou. Dan kwen legal, dan bann program lo

televizyon, in a plizyer repriz atak bann plizyer Lalwa ki Gouvernman in anmennen. E zisteman enn bann Lalwa ki mon rapel tre byen Minis in koz lo la osi dan lepase se sa Dekre ki nou annan la.

E sa Dekre ki pe ganny amande atraver en lamannman ki Minis pe fer ozordi. Ki enteresan, aköz sa lamannman i pe swadizan koriz en *anomaly* ki li menm li Minis in deza koz lo la e sa se rol ki bann *traffic wardens* i bezwen zwe vizavi zofisye Lapolis.

E rezon aköz, Mr *Road Transport Commissioner* ou Lalwa pa'n ganny respekte, se aköz bokou dimoun pa'n zanmen respekte rol ki bann *traffic warden* pe zwe. Aköz zot in toultan ganny dir ki bann *traffic warden* i pa bann zofisye Lapolis.

E ki zot stati legal pa ganny definir anba Lalwa. E ki fer ki ozordi Gouvernman i bezwen vin redefinir sa stati legal, pou donn li en lenterpretasyon pli kler e fer li pli fasil dan lenplimantasyon Lalwa.

Mon pa doute ki nou bezwen pran aksyon. Sa ki mon napa *trust* ladan, se ki kwa ki pou vini apre dan bann regilasyon. E ki mwan mon napa okenn kontrol lo bann regilasyon ki vin dan Lasanble, *nor* annan ase

pouvwar pou anpes sa bann regilasyon pase, apre ki'n mon'n ekout lamazorite Manm entervenir lo kote Gouvernman.

Akoz tou dimoun in komans avek "mon pou siport sa Lalwa." Mon krwar zot tou in dir pou siport sa Lalwa aköz se Gouvernman ki pe anmennen, tou dimoun pou siporte.

Personn pa'n konsider ki si regilasyon i vin dan en fason, enn antre nou pou bezwen anmenn en Mosyon. En Mosyon pou *quash* sa regilasyon ler i vini e senserman mon pe dir ek lepep Seselwa pa tro kont lo lot kote latab pou anmenn sa Mosyon. I pou bezwen atraver nou menm nou isi lo kote latab *US*, ki pou bezwen amenn sa Mosyon. Aköz tou dimoun i paret mwan i tonm dakor ek tou keksoz ki Gouvernman i fer ozordi.

E sa ki pli enteresan ankor, kot lepase par egzanp - atraver ou Mr Speaker, mon pou pik Onorab Roucou en pti kou - kot Onorab Roucou ti dir ek dimoun be al konplent ek *MNA*, in ganny en tiket ; - oubyen al konplent ek Lotorite ou'n ganny en tiket. Ozordi i dir ek sa bann dimoun pran zot responsabilite. I enteresan sa.

I enteresan aköz dan lepase par egzanp ler dimoun

ti pran portre zot tiket ti met lo *Facebook*, oubyen ti isi laba, tou dimoun ti siporte. Tou dimoun ti *ok* avek.

E se pour sa rezon ki mon dir avek Minis, Minis ou annan en latas difisil devan ou, aköz apre ki ou'n dan Lopozisyon pou plizyer lannen e ou'n efektivman e *very* efikasman ede pou kestyon lentegrite, oubyen Lotorite oubyen lefikasite bann Lenstitisyon Leta, ou ozordi vwar ou, ou menm ou bezwen enplimant lenstitisyon Leta.

E prezan ou pe vin fer li atraver en Lalwa ki ou pe demann mwan personnelman pou zis vot an faver, san demann ou serten kestyon. Mon senserman - (*sorry* Minis), me mon pou dezapwent lo sa kote.

Annou regard serten eleman sa Lalwa ki'n vin devan nou. Annou regard par egzanp sanzman sa bann *fines*. Mon asir si i ti ankor annan en Gouvernman *US* ki ti'n vin devan Lasanble avek en Lalwa pou ogmant *fines* dan sa moman, Seselwa ti pou *up in arshms*. Seselwa ti pou pe konplent.

E mon bezwen dir, i paret ki nou tou nou'n anval nou lalang e nou per pou koze, ki ler Lalwa pou ogmant *fines* i vini nou aksepte. Zis parey ler nou ganny dir poudir be tel dimoun pe *travel*, lakantite



dimoun ki pe *travel* dan Gouvernman, pe al tel isi, pe al isi, pe al laba. Pe al isi, pe al laba. Tou dimoun i bezwen aksepte.

Oli sa lanvi kestyonn Lotorite in fini? Mon krwar nou bezwen met sa an perspektiv, aköz mon pa konnen ki ou pe anmennen demen ek ou bann regilasyon.

E ou pou vwar anba sa Lalwa i fer ki lakantite keksoz ki kapab ganny fer dan mon lopinyon pou mwan, i met an serten dout, si Gouvernman avek en *super majority* ki i annan, i deside al ver en lekstrenm, lekel ki pou anpes li? E i en konsern sa.

Kot ou menm ou servi sa parol Minis Derjacques, Mon pa konnen si ou rappel - 'konsantrasyon pouvwar.' Zanmen mon a bliye kan ou ti dir sa. E ozordi nou'n vwar ou vin ek en Gouvernman ki konsantre pouvwar e ou vwar sa i *ok*. E Seselwa i paret zot pe aksepte sa. I *ok*.

Me mwan mon demann zot pou kontinyen *challenge* Lotorite, Seselwa. Kontinyen *challenge* Lotorite aköz i nesese pou zot teste si Lotorite pe fer en keksoz ki byen. Si par egzamp ou'n al kot *welfare*. Mon entrodwi sa Mr Speaker, *as an assign de - me* pou montre ki mannyer ou swiv bann prosedir.

Si i dir ou anmenn 4 *form*, ou anmenn ou 4 *form*, ou anmenn ou 5 *form*, ou anmenn ou 6 *form* ou. Fer tou ou prosedir aköz sa bann prosedir i la, ou annan *entitlement* anba Lalwa pou ou ganny en led.

Si pa oule ed ou apre, dan 5an fer ou desizyon. Si demen i dir ou fer ou *fine* R1000, be mon pa pou kapab anpes sa Lawal pase la mwan. Pey ou *fine* R2000 ou, dan 5an al fer ou desizyon.

Si ou bezwen, apre ki ou'n komet sa lofans. Parey mon'n tann Onorab lo tou lede kote latab dir. E ou ganny arete dan en kontour, ou ganny arete dan lot kontour. Ou ganny sarze R20mil, pey ou R20mil me dan 5an apre fer ou desizyon. Aköz se sa, sak desizyon ki nou fer i annan en konsekans.

E *whilst* ou pa kapab tir naryen *from* merit sa Lalwa i annan ki devan nou la, ki i annan serten merit. Me osi pa kapab anpese pou regarde an konparezon avek pouvwar ki sa Lalwa pe *provide* e pe donner. Kwa ki kapab ganny fer ki Lasanble pou pare li pou debout pou dir be mon pa pou aksepte sa enn?

E kestyon ki nou souleve prezan, se eski tou sa bann dimoun ki'n ganny en *fine* dan lepase, oubyen bann *case* ki *ongoing*. Kot si sa Lalwa pe fer

eklersi parey Minis in dir, stati legal bann *traffic warden*. Eski sa bann *case i stand*? Eski sa bann reprimann, sa bann kosyonn ki dimoun in gannyen i *stand*?

E mon pou mwan mon pe vwar serten konsern vini la. E en keksoz ki nou bezwen toultan mazine. Gouvernman ozordi pe trouv en difikilte pou li enplimant bann Lalwa ki a son dispozisyon zisteman, aköz politik ki in anmennen.

I bezwen ganny dir e zot, aksepte pa aksepte, vwala larealite. Zot in promot en klima anti-etablisman parmi popilasyon Seselwa. Zot in ensit Seselwa pou reziste okenn *attempt* pou enplimant Lalwa kan i nesaser.

Zot in ensit Seselwa dan plizyer lenstans kot Lalwa in ganny enplimante pou retalye, e ozordi zot vwar zot menm zot bezwen pe vin entrodwi mezir ki pou vin deplizanpli pli *draconian*. Pli serye, zis pou zot kapab met Seselwa anba kontrol.

Zot kapab dir mwan sa ki zot anvi. Zot kapab koz mwan '77, zot kapab koz mon *whatever* ki zot anvi dir mwan zot. Larealite ozordi i sa. E prezan nou pa ankor vwar sa bann regilasyon. Nou pa ankor ganny en *inkling* sa bann regilasyon.

Ozordi nou *still* annan sa *fame* deba li *tinted* par egzanp. Si en dimoun in met en serten kantite *tint* lo son loto. Si i kont koman *factory tint*, si i pa kont koman *factory tint*; - si i pou ganny en tiket, si i pa pou ganny en tiket. En Onorab in menm dir fer tou dimoun menm parey. Me mon napa problem ek sa mwan. Mon napa problem ek sa.

Me eski zot pe reelman regard bann keksoz ki pe ganny fer? I annan menm en largiman bomaten ki mon'n tande, ki eski se Komisyoner ki devret donn sa dispansasyon?

Akoz Komisyoner i sipoze enplimant Lalwa e ki mannyer Komisyoner si i enplimant Lalwa i pe donn en dispansasyon ki en derogasyon ek en Lalwa. Tousala i bann kestyon reel ki ozordi nou bezwen fer fas avek.

Nou annan sirkonstans kot mwan mon konnen, kot bann motoris i vin dir ou, poudir be mon'n ganny arete. Mon'n ganny en tiket aköz mon annan en *strip*, en *visor* lo mon loto zot apel sa, ki anpes soley tap dan zot lize. Tousala i bann kestyon ki bezwen demande.

So *as* nou vot sa Lalwa, eski i annan en diskisyon ki pe ganny *entamer* avek bann motoris pou vwar ki mannyer

sa bann Lalwa pe ganny aplike? E mon'n tann Onorab Labonte atraver ou Mr Speaker, koz lo bann motoris ki'n vin koz ek li. Mon'n vwar li in fer en pti largiman en pti pe fay, fay pou sa bann dimoun. Me mon a fer en largiman en pe pli for.

Zwenn ek sa bann dimoun. Gouvernman zwenn ek sa bann dimoun e vwar ki bann keksoz ki annan ozordi dan teknolozi an se ki konsern bann transpor ki pe ganny swa modifye, ki'n vin en lar dan li menm. Ki'n vin en *sport* dan li menm parfwa.

Me mwan mon konsider li primordyalman en lar, aköz estetikman *whilst* ki mwan mon pa kapab *achieve* sa nivo konpetans pou modifye en transpor parey mon vwar sa bann zenn pe fer. I annan ki fer li dan en fason fantastik.

E ler ou vwar sa transpor pase, ou regard sa kreativite ki'n al dan met bann serk, bann *spoilers*, bann lezot keksoz ek sa transpor, i montre ou poudir i annan en serten abilite parmi zenn Seselwa pou fer sa. E i en kalite koz ki popiler an *La Réunion*, ki popiler dan lezot pei osi.

Sa i en posibilite kot si ou annan en lavwa for pou anmennen. Ou dir be Gouvernman i bezwen kapab konsider sa bann keksoz.

So, nou vwar nou a en moman Mr Speaker - mon konsyan letan - nou vwar nou a en moman kot nou pe regard sa Lalwa e nou pe regard sa Lalwa vizavi lofans, vizavi reprimann. E sa Lalwa i sipoze parey i dir ou, bann lofans miner.

En kestyon ki Lasanble i bezwen demann son lekor, si en *minor offence*, ou komans pe ganny sarze *around* R2000 pou en *minor offence*, nou pe al ver en direksyon met *deterrence* dan Lalwa ki bokou pli serye. Si sa i stratezi ki Gouvernman aktyel i oule pran, *so be it*. Sa i son stratezi.

Nou, nou la pou *remind* zot ki pli ou met *deterrent* pli serye, pli ou met plis presyon lo popilasyon, plis ou pou ganny dimoun ki pou *push back*.

Zisteman parey zot, zot ti fer ler zot ti dan Lopozisyon. E ki paret ki dimoun in ekout zot, in anmenn zot la. E prezan dimoun pe ganny sa menm keksoz ki i pa ti oule gannyen. So i enteresan tousala.

E dezyenmman, dan lenplimantasyon sa Lalwa e en keksoz ki'n toultan ganny dir dan sa Lasanble ki mon rapel bokou politisyen in dir, se ki Lalwa. Nou annan bon Lalwa, selman i pa pe ganny enplimante.

Eski Minis ozordi pe reasir nou ki kapasite pou enplimant sa Lalwa - kapasite pou asire ki bann notis i ava ganny donnen ler i devret ganny donnen.

Kapasite pou pa asire ki lafason ki bann notis i ganny ekrir lo bann transpor pou kapab ganny fer dan en fason profesyonnel. Eskiz sa nou pe ganny reasirans ozordi?

Zis pou donn ou en pti legzanp Mr Speaker, i annan sa *strip* ki SACOS i donnen pou met lo transpor, kot ou met ou lasirans. Parfwa i dekolé avek soley. Mon konnen plizyer dimoun in rankontre sa sityasyon e ler i dekolé ou lasirans i tonbe.

E ler sa lasirans in tonbe, si en *traffic warden* in pase i vwar ou transpor in *park* dan en landrwa, ou pou ganny en tiket.

Me ou lasirans i *current*, i *valid*. Sa transpor i annan en *current valid insurance*. Son nimerò i kapab ganny tyeke *again*, si son lasirans i i *valid* oubyen non. Eski fot sa dimoun ki sa zafer in dekolé? Mon pa konnen.

*All this* i bann keksoz ki pe arive *really*, pandan sa letan ki mon pe koze ek dimoun *around there*, la deor la. E ou pa kapab blanm sa bann zofisye ki fer sa louvraz, aköz sa i sa ki Lalwa i dir zot.

Eski Minis pe dir ek nou ki sa *interface* ant sa bann *traffic wardens* avek lasirans i pou pli fasil. Ki ou pou kapab konnen poudir en transpor son lasirans i *current* ozordi menm si ou pa prevwar li afise, *for whatever reasons*. *And then* ou ava *take to task* sa dimoun ki'n deside pou pa afis son lasirans.

Akoz mon pa pe dir i en leskiz pou ou pa met en lasirans lo ou transpor, i pa fer en sans sa. Ou bezwen annan lasirans lo ou transpor. *Ignorance of the law is not an excuse*.

E mon dernyen pwen mon lo la se tretman bann dimoun ki pou fer sa lenplimantasyon sa Lalwa.

Eski mon pe ganny dir ozordi apre midi ki pou annan *training* ki pou ganny ofer pou sa bann dimoun? Pou annan bann kondisyon travay pli adekwat ki pou ganny ofer pou sa bann dimoun? Eski nou pe regard dan lokasyon kot zot ete ozordi, dan sa landrwa kot zot pe fer zot louvraz.

Si nou pou donn zot en landrwa en pe pli apropiye. Vi ki nou pe donn zot pouvwar polisye osi. aköz ler nou pe 'conot' zot *alongside* polisye, nou pe donn zot bann pouvwar Polisye. Eski tousala nou pe ganny dir?

So, i annan bann *genuine concern* ki napa naryen pou fer avek largiman, mon pou dir politik. Me i annan bann konsern ki annan pou fer ek largiman politik ki nou bezwen avanse.

So avek sa Mr Speaker, mon pou ekout avek lenpasyans. Mon pou atann avek lenpasyans *Right of Reply* Minis lo sa Lalwa. Mon ti a kontan ekout byen Minis ki manner i repozisyon sa largiman ant en klima anti-etablisman, e en klima fer dimoun konpran lenportans Lalwa e Regilasyon dan en pei. Mersi Mr Speaker.

### **MR SPEAKER**

Mersi Onorab. Onorab Sandy Arissol.

### **HON SANDY ARISSOL**

Mersi Mr Speaker. bonn apre midi Minis avek ou delegasyon. Bonn apre midi tou dimoun ki a lekout enkli bann Manm. Mr Speaker, premyerman mon ti a kontan dir Minis Derjaques felisitasyon avek ou bann teknisyen pou travay ki zot pe fer. Mon kontan bann lamannman ki zot fer an relasyon avek lavi toulezour.

La mon'n aprann poudir Gouvernman i annan serten semen ki zot in demarke, ki letan mon pa ti la mon'n tande. An relasyon avek sa, so

mon ti a kontan felisit Minis pou sa bann demarkasyon semen. Mon aprann Mont Fleuri in ganny en zoli non semen. Sa krwaze Mont Fleuri ki debous en pe trafik an desandan. E la mon aprann sa menm krwaze semenn Mont Fleuri pou al ganny en *roundabout* pou debous ankor trafik, pou asire ki sirkilasyon dan nou pei i al bokou byen.

Dezyenmman, mon ti a kontan felisit Onorab Lemiel pou son lentervansyon. Onorab Lemiel mon anvi dir ek ou, lo nou kote latab nou'n apresye ou lentervansyon. Tou sa ki ou'n dir i bann keksoz pozitiv. E ler ou'n fini koze ou'n menm dir poudir ou pou ekout lentervansyon Minis, pou ou kapab decide lo ki fason ou anvi vote.

Me pwen ki mon'n anmanse letan Onorab Lemiel in koz Mr Speaker, se bann difikilte ki parfwa nou menm nou koman drayver nou rankontre, oubyen parfwa nou menm nou bann drayver nou fer e sa i poz ensekirite pou bann manm piblik ki servi semen.

E parfwa Onorab Lemiel in menm dir ki i annan dimoun ki konplent an relasyon avek fason ki bann zofisye Lapolis i koz avek li. So letan Onorab Lemiel in koz tousala Mr Speaker, ou santi poudir i annan en dezord la

deor. E se pour sa Gouvernman, en Gouvernman responsab i bezwen pran bann aksyon responsab.

Nou pa kapab baz Lalwa lo kou lavi oubyen decide si sa Lalwa la i sa moman apropiye oubyen i pa apropiye. Fodre pa nou, nou vin en Gouvernman ki iresponsab. Parey Onorab Loze in dir Mr Speaker, letan nou ti dan *SNP* sa bann letan, nou ti en lopozisyon byen responsab e Minis Derjaques i rapel byen parski Minis Derjaques i enn bann dimoun ki ti koz bokou lo *rule of law*, sa bann letan nou ti dan *SNP*.

E letan nou dan *SNP* zanmen nou ti amenn dimoun 10er bomaten kot Lorloz pou bwar lalkol koman en Lopozisyon serye, letan nou ti dan *SNP* sa bann letan, zanmen nou ti anmenn dimoun, *dress zot up* koman *Teletubbies* pou donn en bal kot Lorloz. Zanmen nou ti fer sa. Parski nou ti en Lopozisyon responsab.

Nou pa kapab en Lopozisyon dan Lasanble, koz lo en lot nivo. Apre ou ganny en lot *Leader* Lopozisyon an deor Lasanble Nasyonal pe ankouraz bann lezot kalite aktivite ki pa responsab.

Se pour sa rezon nou, nou annan en diferans ant nou avek zot. Letan nou ti dan *SNP* e ozordi nou'n vin dan

Gouvernman e se pour sa rezon nou dan Gouvernman ozordi. Parski dimoun in swiv nou, in vwar poudir nou ti responsab, e se pour sa rezon ozordi nou annan en zoli non semen anler Mont Fleuri pou debous trafik, pou asire ki trafik i *flow* byen dan nou pei.

Mr Speaker, ou konnen, mon toultan mon get ban drayver koman bann dimoun serye. Akoz mon dir sa? Parski pou ou kapab dray ou byen al aprann tes, premyerman. Ou bezwen al pas tes, ou bezwen rod en *package*, apepre 2 mwan, 3mwan depandan ou leksperyans pou ou kapab ganny en *license*.

E ler ou ganny ou *license*, avan ou ganny ou *license* ou bezwen al pas ou tes teori, ou bezwen al pratik lo semen.

E pratik ou bezwen fer li avek en zofisye Lapolis. Deza sa dan li menm i montre pou ou vin en drayver ou bezwen en dimoun serye e ou pe *deal* avek Lalwa.

Alors en zofisye Lapolis i akonpanyy ou pou asire tou bann *move* ki ou'n fer i an akor avek nou Lalwa Sesel, pou ki ou pa fer bann lofans zisteman parey Onorab Lemiel in dir.

Be letan ou fini ganny ou *license* Mr Speaker, ou al labank. Si ou annan ou mwayen ou pran en pti *loan*. Ler ou pe pran en *loan* avek

labank, i an annan bann kondisyon ki vin avek. Parske labank osi i konsider ou koman en dimoun *serye*. Parski ou pe al lo semen e ou pe *deal* avek lavi dimoun.

Alors Labank i demann ou, ou pou bezwen pey en lasirans pou ou transpor. Kontan pa kontan, koman en drayver ou pou bezwen pey ou lasirans.

Person pa konplent lo la Mr Speaker. Ou bezwen pey en *road tax*. Personn pa drayver pa konplent lo la. I ariv en moman letan dan lannen kot nou transpor i bezwen al tes pou ou kapab retourn lo semen ankor. Ou al peye menm ankor. Personn pa konplent lo la, Mr Speaker.

Alors sa i montre poudir bann drayver zot responsab. Se pour sa rezon mon'n dir tou drayver i responsab. Se pour sa rezon ler *Cabinet* ti pran sa desizyon le 21 Me. Le 21 Me *Cabinet* ti pran sa desizyon, sa in vin dan lavwa piblik, dimoun in fer zot komanter. Sakenn in donn son reaksyon, me selman Gouvernman in santi poudir wi, nou koman en Gouvernman *serye* nou bezwen montre en keksoz diferan avek nou pep. Lalwa dan en pei i enportan.

Ozordi Mr Speaker, letan nou pe koz Lalwa, tou dimoun i bezwen met en mas ozordi. Napa personn ki konplent. Ou

konnen akoz? Parski sa i Lalwa ki nou bezwen *abide* avek. Ler ou voyaze, ou bezwen prezant ou paspor lo Erport, ou pa kapab vin ek ou kart idantite. Be nou tou nou prezant nou paspor. Parski sa i Lalwa e nou bezwen *abide* avek.

Be alors kote difikilte i vini, pou ou pey en lofans, pey ou penalti si ou'n komet en lofans? Pa kapab annan difikilte. Parey tou mon bann Manm in dir, si ou pa anvi pey okenn penalti, ou pa komet en lofans. I senp. Setou. Sa le pwen.

Alors, nou Gouvernman responsab i pe fer ki tou bann prosedir an norm avek Lalwa - e Minis Derjaques ki la i konn sa tre byen ansanm avek son bann teknisyen ki'n dan sa profesyon pou plizyer lannen, poudir i annan serten lamannman ki bezwen ganny fer an relasyon ek bann Lalwa.

E mwan mon *happy* avek sa Mr Speaker. Parski menm nou pe koz kou lavi, kestyon ki nou bezwen demande, konbyen drayver ki komet sa bann lofans an zeneral?

Prezan sa ki pli enteresan Mr Speaker, koman ou ganny en tiket nou tou nou taye nou al peye. Nou pa kit li dormi dan lakour nou. Akoz nou al peye? Parski nou konsyan koman en drayver responsab, poudir nou'n kas

Lalwa. Alors nou ale nou pey nou *fines* e nou evite fer li ankor.

Mon napa problem ek sa. Dan en monn sivilize ozordi kot nou pe viv, i enportan pou nou edik nou dimoun *the rule of law*. Annou pa servi *the rule of law* avek pri lavi oubyen konpar li avek en latet zonnyon. I pa feren sans!

Nou bezwen toultan edik nou dimoun pou mont lo en lot nivo. Fer li bouz de lavan e fer sir i reste azour avek norm.

Me parey Onorab Lemiel in dir avek nou, i annan plizyer keksoz ki pe arive ozordi lo semen. Swa avek drayver, swa avek sa ki pe gid drayver. Oubyen nou menm nou koman pyeton parfwa nou met lavi bann drayver an danze.

Zis parey lontan letan ou ti lekol ti dir ek ou, ou ki bezwen get transpor. Ozordi non, se transpor ki bezwen get sa dimoun ki mars lo semen.

Be mwan mon ti a kontan letan mon lo sa pwen Mr Speaker, felisit bann *warden* ki pe fer sa travay anvil. Felisit zot, menm i annan en pti git zot, menm avek soley, lapli, zot la pe asire ki sa travay i ganny fer byen.

Me selman parey in ganny dir, i avan enportan pou nou letan nou pe pas lo bann Lalwa, annou pa get zis

Lalwa. Me annou get osi nou bann dimoun ki ed nou kapab deservi sa Lalwa.

Ou get *training*. Fasilite ki nou donn zot. Kekfwa lakantite zot ki annan pou kantite landrwa ki nou annan. E laten Minis i la konsernan transpor, i ava enportan osi pou nou lyez ek *Planning, Licensing* pou asire ki bann *building* ki ganny fer sirtou dan lavil.

Eski zot pe osi *provide* fasilite *parking* pou bann drayver? Sa i a fer ki ozordi dan en monn modern nou ava anpese ganny bann penalti, parski ler mon pe vin kot *licensing* li menm li i annan en landrwa pou mwan park koman en drayver. Me ou pa pe ganny vwar pe *park* lo 2 laliny zonn, oubyen ou pe *park* dan ‘*no zone parking*’ e ou pe komet en lofans.

Tousala i mars de kote Minis, atraver ou Mr Speaker, pou ki Gouvernman ansanm avek lasosyete, nou vwar ki mannyer nou zwenn kanmarad lanmwatye semenn. Annou pa zis etabli bann *fixed* penalti.

Me osi annou rode ki mannyer nou koman en Gouvernman nou kapab anpes nou dimoun ganny sarze pou bann pti lofans. Me si Gouvernman i osi kapab revwar fasilite *parking*. Kote i



annan ase lespas. Ou konpran?

Parski ozordi i annan en keksoz mon'n remarke, i annan en *parking* deryer Sham Peng Tong. Kot Sham Peng Tong Plaza i annan en *parking* la. Kot vye *STC* ti ete lontan. Obor labank, deryer *Credit Union*, i annan en *parking* la. Souvandfwa ler ou vin *park* la. En zour ou zwenn en boug zonn, demen ou zwenn en dimoun rouz, apredmen ou zwenn enn ver, i vini i koste ou, i dir ek ou. E la i en *parking* prive la, ou pa ganny drwa *park*. Ou bezwen pey en pti larzan.

Mon pa ti konnen si i annan *parking* prive anvil, kot ou bezwen pey en endividi en larzan pou ou *park*. Mon ti krwar *parking* i pou Gouvernman e i annan son *pay parking fees* anler. Ou a met ou kupon e ou *park* ou peye.

Be aparaman i annan, parski mwan plizyer fwa ler mon vin la mon sey *park* la, i annan en garson i vini i vini i sorti, e *park* la, sa i en *parking* prive sa ou bezwen koz ek sa imsyè laba anndan. Mon pa ti konnen si i annan *parking* prive.

Kekfwa tousala i ava en portan pou ledikasyon piblik, pou mon prop ledikasyon pou nou konnen, eski *parking* anvil i *parking*, nou annan

*parking* prive, nou annan *parking* premye *class*, dezyenm *class*, trwazyenm *class*? Konmsi i ava enportan pou met tousala ater. Pou ki Gouvernman pa ganny vwar poudir i pe kree bann diferan klas dan pei an relasyon avek *parking*.

Me prezan Mr Speaker, mon ti a kontan letan Minis pe fer son entervansyon pou donn nou serten leklersisman an relasyon avek sa.

Mon ti a kontan lo mon kote remersye tou bann Manm ki'n koze e mon asire Minis ou ava donn nou en pti entervansyon, pou nou kapab nou osi konpran, konn en pe sa ki pe pase.

Me selman mon ti a kontan ankòr enn fwa Minis felisit ou pou sa travay. I annan bann desizyon ki nou koman en Gouvernman nou pou bezwen pran, menm si dimoun pou ankoler. Menm si dimoun pou *upset*. Me si i bon pou sekirite pei, i bon pou sekirite nou bann sitwayen ki servi semen. Mon krwar nou pou bezwen enplimant li, san pran an kont sa ki dimoun i dir.

Me selman parey mon'n dir, sa in sorti. Sa diskisyon depi le 21 Me, savedir dimoun in ganny sans pou li donn son leksplikasyon, rod klarifikasyon. Met son pwen devan. E mon asire zot in

gannyen kot zot biro, zis parey lo nou kote, nou osi nou'n gannyen.

Avek sa Mr Speaker, mon ti a kontan aret mon pti lentervansyon la pou letan ki zot in donn mwan. Mersi.

**(APPLAUSE)**

**MR SPEAKER**

Mersi Onorab. Byen mon ava envit Minis pou prezant son *Right of Reply*. Onorab Pillay, ou pou al lev en *point of order*, *matter of privilege*, kwa?

**HON SEBASTIEN PILLAY**

*(Off-Mic)*

**MR SPEAKER**

Eskiz mwan, les-les mwan adres ou en pti pe lo sa pwen. Souvandfwa ou pe lev *matter of privilege*, ou pe lev *point of order*. E souvan i vin bann pwen ki pa avans nou dan nanryen. I vin zis enteripsyon.

*(laughter)*

**MR SPEAKER**

Prezan mon le demann ou, mon anvi respekte ou drwa pou koze. E ler ou entervenir, mon anvi konnen ki ou pe al dir en keksoz ki ed *mwan run* sa Lasanble. Me malerezman, souvandfwa mon dezapwente.

Ou konnen ki arive? I en problemm liberalis. Zot akiz nou liberalis, tro liberal. Ou

les tou dimoun koze, drwa i ganny abize.

E sa i parey pou nou Gouvernman. Nou Gouvernman i dir tou dimoun i annan drwa koze. Ki nou vwar lo bor Lorloz? En dimoun avek plakar ki dir "tir sa boufon *State House*". Liberalis si i pa ganny respekte

...

*(Interruption )*

**MR SPEAKER**

Silvouple!

*(Interruption )*

**MR SPEAKER**

Onorab, bon.

*(Interruption )*

**MR SPEAKER**

Mon... Onorab Pillay mon demann ou pou konpran mwan. E si ou entervenir pou ed mwan pou kapab *run* sa Lasanble byen.

Prezan annou fer parey, dan Lalwa i dir. Dir mwan briyevman ki pwen ou le adres Lasanble lo la?

Zis dir mwan ki pwen? Ou napa mikro? Mikro silvouple, kote ki'n alimen?

**HON SEBASTIEN PILLAY**

Bon. Mersi-mersi bokou. Ou,

realize poudir mon'n tenir  
mwan byen trankil ...

**MR SPEAKER**

Mersi.

**HON SEBASTIEN PILLAY**

... apre ki ou'n fer ou bann,  
ou bann *show*, ou bann *sport*  
ki ou'n fer.

*(Interruption)*

**HON SEBASTIEN PILLAY**

Ok?

*(Interruption)*

**HON SEBASTIEN PILLAY**

Non-non-non-non! Non-non!  
Non-non-non-non!

**MR SPEAKER**

Eskiz mwan, ki sa?

**HON SEBASTIEN PILLAY**

*(Off-Mic)*

*(Mic switched off)*

**MR SPEAKER**

Ki sa ki ou'n dir mwan? Ki sa  
ki ou'n dir mwan mon'n fer?

**HON SEBASTIEN PILLAY**

*(Off-Mic)*

**MR SPEAKER**

Ki ou'n dir mwan mon'n fer?

**HON SEBASTIEN PILLAY**

Ki manner koman Speaker  
mon demann ou laparol, ou,  
ou pou al eksplik mwan - ou  
pou denigre mwan lo- . Non-  
non ou pou denigre...

*(Mic switched off)*

*(Interruption)*

**MR SPEAKER**

*(Off-Mic)*

**HON SANDY ARISSOL**

Mr Speaker ou mikro i  
tennyen.

**MR SPEAKER**

Ah! Swa ou dir mwan ki pwen  
ou le adres lo la, oubyen  
silvouple mon pou demann ou  
kit lasal! Dir mwan ki ou  
bezwen?

***(APPLAUSE)***

*(Interruption)*

**HON SYLVANNE LEMIEL**

*(Off-Mic)*

Nou tou ava ale!

**HON ANDREY VIDOT**

*(Off-Mic)*

Nou tou ava ale!

**MR SPEAKER**

Zot ava ale zot tou si zot oule.  
Byen.

*(Interruption)*

**MR SPEAKER**

Wi?

**HON SEBASTIEN PILLAY**

Mwan, mwan pe dir ek ou koumsa ou pou donn mwan respe dan Lasanble! Ou pou donn nou respe sa kote latab dan Lasanble!

*OU* pa le donn nou respe

...

*(Interruption)*

**HON SEBASTIEN PILLAY**

... e *NOU* pa *PARE* pou nou ekout ou koman *Speaker*,

**MR SPEAKER**

*Onorab!*

**HON SEBASTIEN PILLAY**

... akoz ou klerman *bias* dan ou desizyon!

*(Interruption)*

**HON SEBASTIEN PILLAY**

Ki mannyer koman en *Speaker*, depi bomaten en Prezidan i ava ensilte Lasanble, ou a les li ...

**MR SPEAKER**

*Onorab!*

**HON SEBASTIEN PILLAY**

... fer, ler mwan pou mwan koze dan Lasanble, ou a dir

ek mwan koumsa poudir ou pa avans *OU*?

*(Interruption)*

**MR SPEAKER**

*Onorab!*

**HON SEBASTIEN PILLAY**

Mon ganny drwa lev mon ledwa pou koze dan Lasanble. E *pa OU* ...

*(Mic switched off)*

*(Interruption)*

**MR SPEAKER**

Leres Manm i a gard lord silvouple!

***(Leader of the Opposition exited the Chamber and all other US Members walked out)***

**MR SPEAKER**

Byen, mon ti'n apel Minis pou fer son repons lo deba. Minis ou a kontinyen.

**MINISTER** **ANTONY DERJAQUES**

Mersi Mr *Speaker*. Mr *Speaker*, ankor enn fwa mon a donn enn de sif. Isi Sesel a sa moman la nou annan apepre 33 mil veikil ki pe roule. Sa i enkli Mahe, Praslin avek La Digue.

Sak lannen nou annan apepre 1200 nouvo veikel ki antre lo nou bann larout isi Sesel. Bann ki sorti lo larout i annan zis apepre poursan. Savedir sa i montre parey bann Onorab, espesyalman Onorab William in fer sorti, sak lannen nou napa semen ki ganny kree apart ki Providence - *Highway*. Avek bann pti semenn ki nou fer espesyalman dan bann vilaz. Be nou annan bokou plis loto ki antre Sesel.

Savedir ou pe vwar deplizanpli nou annan en problem e dernyen fwa sa Lalwa ti ganny amande ti an '96, savedir 25an pase. E si ou multiplie 1200 loto sak lannen apepre, fer li 1000 sak lannen. Pou 25 an nou'n ganny 25 mil nouvo loto Sesel ki pe roule. Prezan tir en pe, 5poursan, nou'n ganny apepre 20 mil.

Be sa ki'n arive, napa bann *parking*, napa bann plan avek *Planning Authority* pou fors bann dimoun ki fer bann nouvo striktir kree *parking space*.

E anmenm tan kot bann laboutik, partou Mahe, Praslin zis la aprezan i annan bann marsan ki fer en pti *parking*, ouswa ki fer laboutik bouz en pe pli lwen avek laboutik. Fer en pti *parking* kot dimoun i kapab antre.

Selman dan en fason sistematik, planifye ti napa bann *parking* ki ganny kree, pou zwenn sa demann 1200 loto sak lannen. Dan sa 1200 ou bezwen pran an kot, *SPTC* i annan 200 bis. *Taxi* nou annan apepre 470 ki pe roule. *Omnibus* nou annan apepre 350. *Car hires* pe *increase*. Bann dimoun pe *apply* pou bann *Limousine*, pou bann *luxury transportation*.

Plis e plis lotel pe ganny kree, pe ganny abati. Plis lakaz, plis pti semen kot bann nouvo *flats*, bann nouvo lakaz. Alors i annan sa problem.

Ki nou'n deside e nou ti diskite ek Lasanble dernyen fwa nou ti la an Me, ler nou ti vin fer en *Statement* lo *SPTC*, an menm tan nou fer en *Statement* lo *Minor Offences* ek bann *increase* dan bann penalti, pou *parking* par egzanp.

Ler nou ti prezant R1000 e zot ti diskite ek nou dan Lasanble, zot ti demann en rediksyon, nou ti redwir. Nou ti fer li vin R500 e an menm tan admet, nou ti dir ki napa ase *parking*. Sa i enn bann rezon ki nou'n redwir.

Prezan *PS* avek son Departman, avek nou *unit* lo Polisi avek Lalwa, pe travay tre pre ek kanmarad pou nou fer en *concept*, pou nou kapab prezant avek *Cabinet* dan sa twa semenn ki pe vini, ki

manner nou anvizaze fer avek sekter prive, *multi story car parking Victoria*.

Alors wi, bann Onorab ki'n demann sa bann kestyon enkli Onorab Lemiel ki'n kit lasal, nou pe fer sa bann plan e nou pou travay lo la.

Nou'n ganny demann kestyon osi koman en Gouvernman ki nou krwayans, si nou'n kit nou bann prensip ki baze lo Lalwa. E si prezan nou pe pran en lot pa, akoz nou'n ganny sa eleksyon.

E nou annan Egzekitiv ki pe pran desizyon pou reform. An menm tan nou annan en Lasanble ki 2tyer i pou LDS, pou en parti politik ki bann Manm Lasanble in ganny elekte anba.

LDS ek Gouvernman, pou 30an in travay pou retourn Sesel anver en demokrasi miltiparti anba Lalwa e anba en Konstitisyon. Se sa son bi.

Dan son lalit ler in kestyonn bann lenstitisyon avek bann Lotorite, in kestyonnen akoz sa bann prensip demokratik, miltiparti i pa ti pe ganny aplike. E in bouz pei, in bouz Sesel e i ankor pe seye, pou fer ki isi Sesel nou ganny demokrasi ki matir.

Kot nou annan en popilasyon ki tou son bann dwa e ki annan tou son bann

drwa lekspresyon avek son drwa pou li asosye e son drwa pou li par egzanp protestasyon dan en fason legal e kontrole. Se sa. Gouvernman pa'n abandon okenn prensip, annefe i pe enplimant bann prensip ki'n debout pou sa bann prensip pou plis ki 30an.

An sa ki konsern bann sizesyon, ki i annan bokou sizesyon ki pozitiv. Par egzanp Onorab Romain in koz lo, i annan tro bokou negligans. Savedir bann drayver lo semen.

Nou rekonnet i annan en kantite loto e par egzanp sa *weekend* kot en *road block* dan sid, en dimoun in ganny arete dan son loto, ler Lapolis pe vin kestyonnen, pe vin *inspect i take off*. E in *injure*, in koz dimal 3 zofisye Lapolis avek 2 sivilyen.

Sa i montre ou sa negligans akoz konsonmasyon lalkol ek drog. E pli anpli tro bokou transpor lo semen. Espesyalman dan *week end*.

Wi, Onorab Romain, nou pe rod bann lot fason pou nou kapab desantraliz peyman bann tiket. Par egzanp bann ki La Digue, zot bezwen e zot pou kontinyen pey Praslin, ziska ler Lakour Siprenm i decide si nou pou re anvoy Mazistra dan en fason pli permanan La Digue.

Alors bann dimoun La Digue zot pey Grand Anse kot

Lakour Mazistra. Dan sid, akoz Mazistra prezan in ganny anvoye kot Anse Royale, bann dimoun i kapab al pey kot Lakour Mazistra, Anse Royale.

E si ou get dan sa bann lamannman ki nou pe fer, nou'n enkli ki *the Registrar of the Supreme Court is also the Deputy Registrar and Assistant Registrar*. Savedir nou pe fer li vin bokou pli rezonnab, aksepte ek lagal pou zot kapab pey dan bann lot landrwa. E nou ava regarde si pou La Digue nou kapab fer li bokou pli fasil. Nou a rod en fason.

Me nou pou bezwen sa *Scheme* kot nou ti pe sey kree en *Government House* La Digue, kot tou bann sant, *Social Security*, Pansyon, peyman *Licensing* i vin dan en sel batiman. Kekfwa sa i ava en lide ki nou ava kapab *incorporate* ansanm avek sa *Government House*, La Digue.

Onorab Adelaide, wi i annan en kantite *stress* konmela akoz i annan en kantite *road blocks* e nou pe sey fer, avek sa pti Bidze ki nou annan pou nou get ki nou a kapab fer, par egzanp kot *STC* pou nou aret kot i annan sa *single lane*. Kot 3 semen i zwenn enn, i vin en *double lane*.

Nou pe regard kot Erport ki mannyer nou pou kapab fer en nouvo *third lane*. Nou pe

regard bann *roundabouts* par egzanp Onorab Arissol in fek mansyonnen ankor. Kot Mont Fleuri. Nou pe sey fer tou sa ki nou kapab, selman Bidze ki pou devan byento. Zot pou vwar ki *Land Transport* son Bidze in sorti vreman o kot i ti ete dan R55mil e la nou pe ganny zis apepre 26mil. Selman *SLTA* i vreman aktiv. Nou pe met koltar, nou pe agrandi semen e nou pe sey fer tou sa ki nou kapab espesyalman avek zot bann *MNA*.

Toultan nou vwar, par egzanp sa *weekend* let mon'n pas Pointe Laure, mon'n vwar en nouvo landrwa kot in met koltar. *Weekend* avan mon'n trouve Praslin kot nou pe met koltar obor kot bann *farms* e kot nou pe grand bann semen.

Savedir *SLTA* avek *Land Transport*, konstaman toultan nou pe fer bann semen, nou pe aranz bann semen. Selman avek sa pti Bidze ki nou annan. Selman parey Minis *Finans* in dir, lekonomi pe fer byen.

E si ou regard bann sif ki pe antre, parey mon ti dir zot semenn pas, Merkredi menm *IMF* in dir ki nou lekonomi lannen prosenn pou grandi, e nou kapab espekte grandi par 7.7poursan. E dezyenm lo lalis i Moris, zis 6.4.

Savedir lekonomi Sesel pe bouze. Touris pe arive e

Bidze nou pe anmas bokou plis larzan atraver *tax*, akoz bann viziter pe antre e i annan bokou plis dimoun ki'n antre dan lanplwa.

An sa ki konsern bann Onorab kot in dir, par egzanp Onorab Loze avek Uranie, ki sa pa en letan pou nou entrodwir en *increase* dan *fixed penalty*. Larepons zot in fini reponn. Enn ki, sa se zis si ou kas Lalwa. Me si ou annan disiplin e ou obeir tou bann provizyon legal, ou pa pou al peye sa bann *finer*. Ou pey bann *finer* si ou kas Lalwa.

Bokou plis dimoun in antre dan Lanplwa. Ti annan apepre 4mil dimoun ki ti dan URS, zot tou zot i antre dan lanplwa e si ou anvi gard ou saler dan ou pos, zis pa kas Lalwa. Gard ou saler, anmenn kot ou.

Mon kontan ki Onorab Adelaide osi i apresye ki nou'n reform sa bann Lalwa, pou fer ki peyman pou sa bann *finer* i sorti 3 zour pou vin 14 zour. E nou'n rann larepons ki bann *spot finer* nou kapab pey dan sid.

Lo *tint* lo laglas, lo vit veikil, Sa regilasyon pe ganny travay lo la. Egzakteman a sa moman la i kot *Attorney General* e nou bann *Legal Advisors*. Mr Kenny Elizabeth ek bann lot, zot pe travay avek *Attorney General*, apre

konsiltasyon avek Lapolis lo la. E byento i pou dan bann regilasyon e i pou ganny met devan zot koman bann Onorab. Tou bann Regilasyon ek S.I. i ganny plas devan zot e si zot anvi okenn diskisyon zot kapab *file* en Mosyon.

Selman si zot anvi konsiltasyon osi zot kapab kontakte nou, e ou ava koz direktteman si i neser avek nou *Legal Advisor*, Mr Kenny Elizabeth.

Nou anvi osi bouz dan sa semen kot nou pou entrodwi teknolozi. Pour lemoman nou pe fer bann reform dan Minister Transpor. Se pour sa rezon a sa moman la i annan en *Bill* osi pe ganny diskite kot *Attorney Zeneral*, kot nou'n fini travay lo la aprezan nou pe get bann lamannman.

Sa *Bill* pou fer ki (*RTC*), *Road Transport Commission* i antre direktteman anba Departman Transpor, anba PS Andre. Sa pou fer osi ki bann *traffic wardens* prezan pou ganny bokou plis sipor.

Par egzanp kot zot pou ete, parey *Leader* Lopozisyon in demande, zot pou sorti *Premier Building* e zot in fini antre,( non zot pa ankor). Nou pe rod en plas pou zot antre kot *Quadrant House*. Savedir nou pe gete ki mannyer nou kapab donn zot bokou plis lekipman. Kot zot kapab ganny sipervizyon direk par PS



avek bann dimoun dan son Departman.

Nou annan sa lanvi pou fer li vin bokou pli efikas, bokou pli profesyonnel. Nou pe komans avek bann Lalwa a e nou pe komans avek bann reform. A lafen dizour nou pou bezwen vwar ki bann *traffic wardens* pou ganny sa sipor, pou zot kapab *enforce* sa bann Lalwa ki nou pe demann zot pase ozordi. Tousala i mars ansanm.

Savedir ou pou vwar bann Lalwa in ganny reform, Regilasyon pe ganny met an plas. Departman pe ganny transformen e tousala i ganny ansanm, i vin Minister ki pou bokou pli efikas ek profesyonnel an sa ki konsern tou sa bann Lalwa.

I annan en kestyon lo, kot *police officers* i enkli *traffic wardens*, sa i korek. Selman sa i spesifik. I pa ou *Police Forces Act* sa. I senpleman pou sa *Road Transport Act* ek son bann regilasyon. Savedir tou sa ki en *Police Office* i kapab fer, sa *traffic warden* osi pou kapab fer. Spesifikman pou sa bann Lalwa.

E si ou regarde, bann Polisye, sak mwan zot *deal* avek apepre 155 ka. E bann *traffic warden*, sak mwan zot *deal* avek 1200 ka. Savedir zot *deal* avek bokou plis bann ka. Zot bokou pli *busy* e zot rikord

pou bann dimoun ki peye i 46 pousan.

I annan 53 pousan dimoun ki pa parey sa bann tiket. Alors sa bann reform i nesaser. Tou lede dan Departman avek Lalwa osi pou fer ki bann *traffic wardens* i fer en travay, kot zot kapab ariv en nivo kot sa pousantaz kot bann dimoun i peye, ouswa zot ganny persekiter dan en fason *successful* i vin bokou pli o.

Selman nou dan Minister Transpor, nou pa la zis pou pas Lalwa pou pini dimoun. Sa bann Lalwa i koman e *deterrent* pou anpes ou kas Lalwa. Pou ou annan bokou plis disiplin, pou ou kapab donn proteksyon avek sekirite tou bann manm piblik ki servi semen, ki servi trotwar.

Tou nou bann viziter i bezwen vizit Sesel dan sekirite avek *safety*. Se sa nou bi. I pa nou bi pou *increase*, senpleman akoz nou anvi reform Lalwa. I pa nou bi pou kolekte plis larzan akoz nou, nou anvi plis *tax* sorti kot Seselwa. Nou bi se tou bann dimoun i bezwen an *safety* ek *security* lo semen.

Mr Speaker, avek sa enn de mo, mon pe demann ki bann Onorab i dakor an prensip e vot an faver sa bann amannman, avek sa Lalwa. Savedir *Minor Offences (Fixed*

*Penalties) (Amendment) Bill, 2021.* Mersi.

**MR SPEAKER**

Mersi Minis. Nou a aprezan pran vot lo merit zeneral sa *Bill*. Manm ki an faver lev lanmen silvouple? Mersi. Tou Manm in vote.

Vot lo *general merit of the Minor Offences (Fixed Penalties) (Amendment) Bill, 2021*. 24 Manm in vot pour, zero kont e zero abstansyon. Alors sa *Bill* in aprouve lo *general merit*. E Madanm Clerk a fer *Formal Second Reading*.

**MR SPEAKER**

Mersi Mr Speaker. *A Bill for an Act to amend the Minor Offences (Fixed Penalties) Decree (Cap. 132)*. Mersi Mr Speaker.

**MR SPEAKER**

Mersi, mon vwar *dan track version* i annan enn de amannman, pa bokou. Me kantmenm nou a pas dan Staz Komite (*Sergeant*), pou pran bann amannman. Lo *Bills Committee* lekel ki pou *lead*? Onorab Hoareau.

**HON JOHN HOAREAU**

Bonn apre midi Minis ek ou delegasyon. Bonn apre midi tou dimoun a lekout. Bonn apre midi Mr Speaker. Bann

lamannman ki'n ganny fer lo sa *Bill* i *comme* swivan:

Nou ava komans lo *Clause 2 (iii)* katriyenm paragraf. *Magistrates*'i annan s'. Nou desann nou al lo *subsection (5) (d)* 'by affixing it to a vehicle' nou tir 'in', nou delete the word 'in'. Kontinyen lir, 'which the person is occupying or', la nou insert 'which' - 'is in his possession.'

Nou al lo *Subsection 6*.

**MR SPEAKER**

*Panel* i pe swiv e si zot annan okenn komanter ki zot oule fer zot kapab lev lanmen. Minis wi.

**MINISTER ANTONY DERJAQUES**

Mr Speaker, apre konsiltasyon avek *Legal Advisor*, Ms Julia Jean avek *Legal Advisor* Kenny Elizabeth, tou lede i korek. Mersi.

**MR SPEAKER**

Mersi. *Ok*. Ou a kontinyen Onorab Hoareau.

**HON JOHN HOAREAU**

Yes Mr Speaker, nou al lo *subsection (6)*, dernyen aliny nou tir *therewith*, nou met en *full stop after "served."*

**MR SPEAKER**

*Panel* i a lev lanmen si zot annan en komanter ki kont, *otherwise continue*.

**HON JOHN HOAREAU**

Ok, nou al lo *Clause 8(1)(d)*, la nou pou *insert the following 'not being the person referred to in the notice, removes 'or interferes'* kontinyen ziska lafen. Ok.

**MR SPEAKER**

Minis, wi.

**MINISTER ANTONY DERJAQUES**

Mr Speaker, *Legal Advisors* tou lede in lir e zot tou lede zot dakor.

**MR SPEAKER**

Mersi. *Yes Vice-Chair.*

**HON JOHN HOAREAU**

Mr Speaker, sa ti bann lamannman ki nou ti annan pour lemoman. Mersi.

**MR SPEAKER**

Mersi, bann lamannman in ganny aksepte. Okenn Manm ki anvi fer lezot komanter, keston oubyen amannman? Non, si napa nou a re pas dan Staz Komite silvouple.

Mersi, Onorab Arissol ou a anmenn Mosyon pou *Third Reading*.

**HON SANDY ARISSOL**

Bonn apre midi Mr Speaker. Avek gran plezir. Mr Speaker, anba *Order 76(1)* mon oule *move* ki *Bill Minor Offences*

*(Fixed Penalties) (Amendment) Bill, 2021* i ganny lir en trwazyenm fwa. Mersi.

**MR SPEAKER**

Mersi. Mosyon a ganny segonde. Onorab Arissol in lev lanmen premye, mon a donn li sa. Phillip Arissol.

**HON PHILLIP ARISSOL**

Mr Speaker, Mosyon i ganny segonde.

**MR SPEAKER**

Mersi. Mosyon in ganny segonde. Nou a pran vot lo *Third Reading*. Manm ki an faver lev lanmen silvouple? Byen tou Manm in vote.

Vot lo *Formal Third Reading lo Minor Offences (Fixed Penalties) (Amendment) Bill, 2021 as amended, 23* Manm in vot pour, zero kont e zero abstansyon. Alors Mosyon in aprouve par Lasanble e Madanm Clerk a fer *Third Reading*.

**MADAM CLERK**

Mersi Mr Speaker. *This Act may be cited as the Minor Offences (Fixed Penalties) (Amendment) Act, 2021, and shall be read and construed as one with the Minor Offences (Fixed Penalties) Decree, Cap.132, which is hereinafter referred to as the "principal Act"*. Mersi Mr Speaker.

**MR SPEAKER**

Mersi Madanm Clerk. Alors mon deklare ki sa *Bill* in pase par Lasanble.

Avek sa mon a remersye Minis ek son delegasyon pou zot partisipasyon e mon a swet zot bonn lapremidi. Bon restan apre midi e bon depar, bon kontinyasyon. Mersi.

Vi ki i 3er, mon krwar nou kontinyen avek lot *Bill* avan nou pran *break*. Madanm Clerk nou a pran en *pause* teknik parey labitid e ou ava rape *staff* pou *sanitizing*.

*(technical break)*

**MR SPEAKER**

Bonn apre midi Vis-Prezidan, Ekselans Ahmed Afif. Dan ou delegasyon mon vwar Mr. Wendy Pierre, *Registrar General*. Vis-Prezidan eski Mr Frank Ally pou zwenn nou apre?

**THE VICE-PRESIDENT MR AHMED AFIF**

Bonn pare midi Mr Speaker e tou bann Manm Onorab. Wi, i pou zwenn nou, selman i annan en pti komitman an se moman, i pou zwenn nou koman i kapab.

**MR SPEAKER**

Mersi. Byen. Nou la pou travay lo *Companies and Associations (Interim Measures) Bill, 2021*. Mersi

Vis-Prezidan pou zwenn nou pou sa sesyon travay. Avek sa mon ava envit *LGB* pou prezant Mosyon pou nou fer *Second Reading sa Bill*.

**HON BERNARD GEORGES**

Mersi Mr Speaker. Bonn apre midi Mr Speaker. Bonn apre midi Vis-Prezidan. Bonn apre midi Madanm *Registrar Companies and Association*. Mr Speaker, anba *Order 69(2) mon move ki Companies and Associations (Interim Measures) Bill, 2021* i ganny lir en Dezyenm Fwa. Mersi.

**MR SPEAKER**

Mersi, mon a ganny segonnman lo Mosyon? Onorab Sandy Arissol.

**HON SANDY ARISSOL**

Mersi Mr Speaker. Bonn apre midi *VP* avek ou delegasyon, bonn apre midi Madanm. Mr Speaker, Mosyon i ganny segonde. Mersi.

**MR SPEAKER**

Mersi. *VP* Mon a envit ou pou entrodwi sa *Bill*.

**THE VICE-PRESIDENT MR AHMED AFIF**

Mersi bokou Mr Speaker. Bonn apre midi Mr Speaker, *Leader Biznes Gouvernman*, tou bann Manm Lasanble. Tou dimoun a lekout, bonn apre midi.

Mr Speaker, anba Lalwa Lakonpanyen Domestik, *Companies Act 1972*. Bann lakonpanyen ki'n ganny anrezistre anba sa Lalwa zot annan en lobligasyon pou soumet avek lofis Rezistrar Lakonpanyen sa ki apel zot bann *annual returns* avek zot kont odite tou le lannen.

E zot osi annan en fre anyel, R500 ki zot bezwen peye avan, ouswa zour laniverser zot lanrezistremen zot lakonpanyen pou kapab mentenir zot non lo rezis avek Rezistrar.

Ban Lasosyasyon osi ki ganny anrezistre anba Lalwa *Registration of Associations Act*, zot osi zot bezwen soumet avek Rezistrar Lasosyasyon zot bann *annual return* avek zot kont odit tou le lannen. Zot osi bezwen pey Rezistrar en pti poursantaz lo okenn profi ki depas plis ki R1000 ki zot in fer pandan sa lannen.

I enportan pou masyonnen Mr Speaker, dan lenstans kot sa bann antite zot pa swiv sa bann obligasyon legal, i annan bann penalti administrative ki Lalwa i donn Rezistrar pouwar pou aplike.

An Zen 2020, lannen pase *Companies Act '72* ti ganny amande pou entrodwir sa fre anyel ki bann lakonpanyen zot bezwen peye. Adisyonnelman bann penalti aplikab kont bann

lakonpanyen, si zot pa soumet zot *annual return* ki ti ganny revize. Ki fer ki le moman ki en lakonpanyen pa soumet son *annual return*, i bezwen pey sa bann fre swivan: ki komans R5 mil si en lakonpanyen i an retar par 60 zour. Ziska en total R15 mil si sa retar i ariv 120 zour.

Egalman, provizyon ti ganny fer ki sa fre anyel i vin anfers an Zanvyè 2021. Savedir sa lannen. Anba sa lamannman Lalwa 2020, i annan en penalti R25 pou tou le semenn ki en lakonpanyen pa pey sa fre.

Lalwa i fer provizyon ki sa bann antite ki pe fer sa bann soumisyon e peyman e zot osi pa pey bann penalti aplikab, ki Rezistrar i annan pouwar pou retir zot lo rezis.

Mr Speaker, preski menm konsekans legal i egziste pou bann asosyasyon. Me dan lenstans i pou en lofans e se sekreter ki pou responsab pou en *fine* pa plis ki R25 pou tou bann zour pandan ki sa lofans i kontinyen.

E pareyman se bann defo dan swivi lobligasyon legal i persiste, Rezistrar i annan pouwar pou retir okenn lasosyasyon lo rezis ofisyel.

Mr Speaker, lentrodiksyon sa bann amannman 2020 ti'n espekte anmenn plis disiplin dan nou bann lakonpanyen domestik. Spesyalman

pandan en moman kot nou pe fer tou sa ki posib pou Sesel pa fini lo okenn lalis nwar oubyen lalis gri avek bann Lorganizasyon Enternasyonal atraver bann revy ki nou pei pe pas atraver.

Alors lekspektasyon se ki sa bann amannman ti pou ed Rezistrar dan demars pou annan en rezis azour e prop.

Mr Speaker, malerezman avek COVID-19 an 2020 e 2021, sa bann plan in ganny severman afekte. Akoz mazorite bann lakonpanyen, lasosyasyon zot pa'n kapab satisfere zot bann obligasyon legal.

Bann rankont par egzant ki Rezistrar Zeneral in fer avek sektè prive. Lasanm Komers Sesel, Lasosyasyon Biznes Praslin parmi lezot. In permet lofis Rezistrar ganny en bon apresyasyon bann defi ki'n afekte bann biznes e lasosyasyon koze par COVID-19.

Mazorite zot pa'n vreman kapab fer zot operasyon e par konsekans sibir bann difikilte finansyel. E atraver bann restriksyon enpoze, zot bann loperasyon komersyal, administrative e legal in ganny afekte. Zot in vwar li enposib pou zot rankontre pou fer zot bann rankont anyel.

E par konsekans, fer li enposib pou zot pran bann desizyon oubyen egzekt bann

tranzaksyon nesese anba sa 2 Lalwa. E par egzant odit bann kont e menm prodwi sinyatir lo bann *annual returns*.

Alors Mr Speaker, atraver sa bann konsiltasyon in annan en propozisyon pou entrodwir en plan amnesti pou lenplimantasyon par Rezistrar. Kot sa bann antite zot ava ganny en lespas letan pou zot re organiz zot e fer le nesese, pou anmenn zot lekor azour avek sa 2 Lalwa. E atraver sa *Bill* ki nou pe met devan zot ozordi, nou pe fer ki lenplimantasyon sa amnesti i vin en realite.

Atraver sa bann amannman nou pe proze, ki bann konpanyen domestik avek bann lasosyasyon zot ganny ziska le 31 Zilyet 2022, lannen prosenn zot soumet zot bann *annual returns* avek zot bann kont odite pou sa 2 lannen 2019 ek 2020 ki ti'n sipoze ganny soumet pandan 2020 ek 2021 respektivman.

Mr Speaker, propozisyon se si ou lo rezis le 31 Desanm, alors ou pou annan ziska le 31 Zilyet son lannen swivan pou ou desarz sa bann lobligasyon. Adisyonnèl man pou permet bann lakonpanyen pou pey sa fre anyel, pe ganny propoze ki bann antite ki pa ankor pey sa fre pou lannen 2021, zot pou annan ziska le 31 Zilyet 2022 pou fer sa peyman.

E egalman pou bann asosyasyon ki devret pe pey sa poursantaz profi e ki pa ankor peye pou sa 2 lannen 2020 ek 2021, zot pou annan ziska le 31 Zilyet, 2022 pou zot fer zot bann peyman avek Rezistrar.

Alors Mr Speaker, pou permet sa bann lenplimantasyon legal, i enportan pou sispann laplikasyon bann provizyon ki enpoz penalti e sa ziska le 31 Zilyet, 2022. Kot lekspektasyon se ki bann antite pou ganny ase letan pou fer le neserer anba sa 2 Lalwa.

Finalman Mr Speaker, lefe ki sa bann propozisyon amannman i sipoze pe ed sa bann antite, ki parmi i osi bann pti binez ki'n etabli anba bann lakonpanyen pou re organiz zot legalman e operasyonnelman. Par konsekans sa pou kontribye dan bann zefor ki pe ganny fer pou fasilite nou lanvironnman fer biznes Sesel.

Mr Speaker, mon oule remerci ou e tou bann Manm pou zot latansyon, konsiderasyon e mon kont lo zot sipor pou sa *Companies and Associations (Interim Measures) Bill*. Mersi bokou.

### **MR SPEAKER**

Mersi Vis-Prezidan. Nou a pran deba lo sa *Bill*. Manm ki pou entervenir. Onorab

Labrosse in lev lanmen pour lemoman, i a komanse.

### **HON RICHARD LABROSSE**

Mersi Mr Speaker. Bonn apre midi Vis-Prezidan. Bonn apre midi Mrs Pierre. Bonn apre midi tou bann koleg Manm e tou dimoun ki a lekout, espesyalman bann dimoun Plaisance.

Mr Speaker, sa *Bill* ki devan nou pe demann Lasanble pou aprouv en mezir enterim, pou ed bann lakonpanyen, biznes ek lasosyasyon ki'n an defo avek zot bann lobligasyon legal anba *Companies Act* pou vin *compliant* avek zot bann lobligasyon.

*COVID-19* parey sanson in dir, nou pa'n envit li se nou, me in vin se nou li menm. Parey tou lezot pei dan lemond, bokou biznes isi Sesel in vwar zot dan bann sityasyon ki zot pa'n zanmen mazinez zot ti pou ladan en zour.

Sesel koman en pti pei avek resours limite in trouv li osi pe trimouse ek bann nouvo fason fer keksoz. Sa in fer ki bann biznes in vwar zot pe bezwen revwar zot bann *business model*, ek zot loperasyon anmezir ki zot in sey konbat sa moman difisil ek bann defi ki'n vin otour zot.

An rezilta sa peryod difisil i annan bokou biznes ki pa'n

kapab tenir. I annan biznes ki'n bezwen *downsize* zot loperasyon e fer arete serten travayer pour ki loperasyon zot bines i kapab kontinyen soutenir dan sa peryod difisil.

Mr Speaker, alors mon pou rekonnèt sa zefor ki lofis Rezistrar Zeneral pe fer, pou fer sir ki tou bann lakonpanyen ek lasosyasyon, ensi ki bokou bines, sirtou bann ki nou apel zot bann pti biznes, ki pa ti'n parey Mr Speaker, pou fer fas avek sa evantyalite, i ganny sa loportinite pou zot met zot anliny avek zot bann obligasyon legal.

Dan bann sityasyon parey i enportan pou fer sir ki an menm tan ki nou pe anforse bann Lalwa, nou osi pran an kont bann diferan lobstak ki bann biznes, lakonpanyen, lasosyasyon pe fer fas avek. Ki zot vwar zot dan bann sityasyon kot zot pa kapab onor bann lobligasyon. Sa nou pe koz lobligasyon legal.

Alors mon apresye ki atraver sa *Bill* biro Rezistrar pe pran sa an kont e fer sir sa an bonn balans ant sa lobligasyon legal e osi annan serten fleksibilite ki pe donn sa bann lantite pou redres zot.

I enportan note ki en bon mezir *compliance* dan biznes i lakle pou ou kontinyen bouz devan. Ler biznes i *comply*

avek son ban lobligasyon legal i montre lefikasite son loperasyon e osi kliyan ensi ki bann Lotorite i annan konfyans dan ou servis ki ou pe ofer.

Mr Speaker, mon'n tann bokou lo sa mo *Ease of Doing Business* dan Sesel. E la mon krwar ek sa *Bill* ki Rezistrar Zeneral pe met devan, i montre siport Gouvernman pou ed sa bann lantite ki nou vwar zot dan bann difikilte pou kapab onor zot bann lobligasyon.

Alor mon pe lans en lapel spesyal avek tou bann linite ki swa ou en lakonpanyen, biznes ouswa lasosyasyon ki'n anrezistre anba *Companies Act*, espesyalman bann ki dan mon distrik Plaisance, pou sezi sa loportinite e fer sir ki zot oner zot bann lobligasyon legal. Sirtou bann ki zot *audited accounts in due* depi dan sa 2 ou 3 dernyen lannen.

Silvouple fer sa zefor spesyal. Al apros ou bann oditer e fer zot fer sir ki ou bann zafer i annor. Vin devan e vin demann lenformasyon kot ou pa asire. Me non pa reste deryer ouswa pou konplent pou dir personn pa pe get dan zot *welfare*.

Zot in koze, Gouvernman in ekout e biro Rezistrar in ekoute. Sesel ozordi pe koz lo bon governans avek latransparans. Alor i enportan



ki nou zwenn ansanm nou tou pou fer sir ki bonn gouvrenans avek latransparans i pas zis de mo ki nou koz lo la, me nou osi aplik li dan nou bann prosedir.

Pou fini Mr Speaker, mon swe se pou vwar biro Rezistrar Zeneral ariv lo en lot nivo. Mon ti ava voudre ki zot kapab enkorpor en pe plis servis teknolozi dan zot bann prosedir, ki a *facilitate* bann tranzaksyon e fer servis pli vit e pli efikas.

Ki sa i ava ankouraz dimoun pou *access* zot lofis e zot sistenm pli fasil. Akoz par ler se bann lenstans kot bann prosedir tarde e dousman ki kree bann defi, kot dimoun osi ki fer dimoun pa onor zot bann lobligasyon ler zot in vini parfwa zot vwar bann gran laliny.

E sa - mon konnen i pa en leskiz - me selman nou konnen ki mannyer letan i ete.

Avek sa Mr Speaker, mon pou dir mon pou donn mon *full* sipor sa *Bill* e mon pou swet lofis Oditer Zeneral tou le meyer. Mersi.

### **MR SPEAKER**

Mersi Onorab. Onorab Waven William.

### **HON WAVEN WILLIAM**

Mersi Mr Speaker. Bonn apre midi Vis-Prezidan avek Mrs. Pierre. Mr Speaker, *comme*

*habitude* Vis-Prezidan dan son prezantasyon, letan i fer i fer li tre kler.

So, i en *Bill* ki pa difisil. Mon'n ekout avek bokou latansyon. I senp e mon krwar poudir dan sa partenarya, sekter piblik avek sekter prive, i enportan ki tou lede parti, sirtou nou tou nou konnen globalman kwa ki'n arive avek sa pandemik *COVID* ki'n afekte tou parti konsernen, an sa ki konsern lekonomi e fer biznes.

In difisil mon kapab dir, pou travay anba bann kondisyon ki pa fasil. So, mon vwar ki in annan bann dyalog, in ekout par Gouvernman. So, vwala akoz ki sa Prozedlwa pe vin devan nou. E mon krwar i fer zistis avek sekter prive. E mwan mon ti annan enn de pti *query* Vis-Prezidan letan i fer son *summing-up*.

Nou konnen poudir i annan serten bann biznes ki pa'n peye, pa'n kapab prezant devan zot *annual report* avek zot bann kont. So, sa bann ki an deor 2019, pli lwen. Eski zot tonm dan menm kategori? Eski menm aplikasyon tretman pou ganny fer anver zot?

E dezyenmman, Vis-Prezidan nou konnen poudir *under the Ease of Doing Business* i annan plizyer bann konplent kot biro Mazistra, *Registrar*, kot i konsern bann

dokiman ki perdi. So mon ti a kontan ganny en pti pe mon reasirans ki laba i annan serten bann lamannman pe ganny fer, sirtou an servan bann teknolozi kot bann kliyan ki vin rod sa servis zot pa santi zot en pti dezapwente.

So avek sa de pti mon, Mr Speaker i en lamannman ki byen e dan bon direksyon. E mon pou donn mon sipor. Mersi.

### **MR SPEAEKR**

Mersi Onorab. Swivan,  
Onorab Henrie.

### **HON GERVAIS HENRIE**

Mersi Mr Speaker. Bonn apre midi Vis-Prezidan e Mrs Pierre. E tou dimoun ki pe ekoute, sirtou bann dimoun dan distrik Mont Buxton, kominote biznes si i annan zot.

Mr Speaker, mon krwar depi bomaten i annan en mo ki'n ganny dir en kantite fwa, se 'responsabilite.' Mon krwar sa Prozedlwa i pou ede met bann konpanyen, bann lasosyasyon pran zot responsabilite. So, nou pa pe zis dir zot pran zot responsabilite.

Me Gouvernman pe zwenn zot lanmwatye semen e i enportan ki tou bann konsernen i sezi sa demars ki nou pe fer ozordi apre midi.

Parske kominote biznes in lev serten konsern.

Zot lasosyasyon la ki reprezant zot, *SCCI* in tandé, in met sa bann serten konsern devan Gouvernman. E ozordi alors Gouvernman i vin avek sa mezir, ki ava ede fasilite sa bann diferan group *operate*.

E i malere ki dan sa moman ki nou pe diskite sa Prozedlwa osi enportan, nou napa Lopozisyon prezan. Parski Lasanble Nasyonal mon vwar li i sa landrwa kot i bezwen annan en lavwa tre pozitiv dan konstri nou Nasyon, batir nou Nasyon. Fer nou vin pli for. Kit sa pei en pli meyer landrwa kot nou ti zwenn yer.

E wi, nou kapab difere dan nou fason vwar keksoz. Me i enportan ki nouvo zenerasyon politisyen, nou vwar en landrwa kot nou kapab zwenn dan milye e mon ava eskiz *panel* pou sa kalite sityasyon kot in vin zwenn. Kot napa Lopozisyon e i anbarasan.

Bann zenn profesyonnel i vin pou vwar sa kalite *behavior* ki nou Lasanble. E lo mon par e lapar *Caucus* mon eskiz zot pou vin vwar nou dan sa kalite sityasyon.

Donk sa mezir Mr Speaker, parey in ganny dir pou asiste bann lakonpanyen domestik, avek en dele letan ki mon vwar li i tre rezonnab ziska milye

lannen prosenn, pou zot akonplir zot bann lobligasyon legal ki zot annan anba *Companies Act and Registration of Association Act*. E sa i konsern zot bann *annual returns and Audited Account*.

E sa ki nou merit osi dir, se ki aprezan i osi annan sa zafer R500 ki sa bann lakonpanyen i peye e bokou dimoun deor pa konn sa. Donk la i en moman pou zot tande poudir zot bezwen pey sa larzan ki ou peye letan i tonm laniverser ou lakonpanyen.

Donk tou lakonpanyen i ganny sa sertifika e ki zot met avek lafyerte dan resepsyon zot bann biznes. So, mazin zot dat ki zot ti anrezistre, al pey zot larzan.

Nou pe dir zot responsab e nou pe donn zot sa loportinite pou fer. E menm bann lasosyasyon i annan en poursantaz profi ki zot bezwen peye lo zot *account* si i plis ki R1000. Donk sa osi bann Lasosyasyon i bezwen konnen.

Ou konnen souvandfwa nou vwar poudir i annan bann dimoun, zot form en lasosyasyon, pa neserman konnen pou ki rezon zot fer sa. Ouswa en konpanyen, me selman zot pa konn tro zot rol.

Donk i enportan ki bann *Chairman*, bann *Vice-Chair*, bann Sekreter, bann Trezorye

bann lasosyasyon i konn zot rol.

E bann lakonpanyen letan zot i anrezistre zot bezwen konnen si zot en *sole trader*, si zot en *partnership*, si zot en Lakonpanyen. Tousala i zot responsabilite pou zot konnen, pou zot kapab *fulfill* zot bann lobligasyon legal ki Lalwa i demann zot.

E parmi tou sa bann zafer ki nou pe dir, nou bezwen osi avoue Mr Speaker, ki annan bann lakonpanyen ki pe pran zot rol tre serye. Ki zot pe pey zot bann zafer aler. Ki swa zot ganny *reminded* ou si nou, zis zot bann bon sitwayen, donk zot fer li. E nou bezwen ankouraz zot pou fer sa.

Pou sa mezir vin efektiv, la koman *Registrar General* i la avek nou, nou bezwen dir poudir son lofis i bezwen pran zot travay tre serye pou zot asire poudir zot, sirtou zot *compliance unit* i *up to speed*.

VP, kekfwa nou kapab ganny en parol poudir zot pou ganny sipor finansyel, Bidze pe vini, zot kapab *recruit sufficient manpower*, pou zot kapab swiv sa bann lasosyasyon, bann lakonpanyen pou *remind* zot poudir alo, ou dwa nou en pti larzan.

Nou, nou pe dir tou dimoun pey son *faire share*, ki evantyelman dan *long term* nou kapab fer desann bann

*rate tax* Sesel. Pri lavi i kapab desann. Ki nou tou, sa administrasyon pe sey son mye pou ki alafendefen sa larzan dan pos Seselwa ki lopoziyon i koz labous plen, nou pou gannyan evantyelman.

So, nou pe travay pou al dan sa direksyon. So an menm tan sa *compliance unit* i ava fer sir ki tou bann lasosyasyon e lakonpanyen i azour avek bann Lalwa ki zot merit pe swiv.

Zis par egzanp avek sa legzersis, i annan en estimasyon apepre Gouvernman i kapab anmas R5milyon ki pa move. I en granm ase konsiderab pou al dan fon Gouvernman, e mon ti demann serten lenformasyon avek biro Rezistrar Zeneral ki mon'n resevwar.

I annan apepre 7780 lakonpanyen sesel, anrezistre e 700 lasosyasyon. Donk, nou kapab mazine si tou dimoun i pey son *fair share*, ki mannyer pei i kapab benefisye pou nou kapab kontinyen soutenir? Akoz sa larzan i al dan *Consolidated Fund*. Nou kapab soutenir nou sistenm ledikasyon, soutenir nou sistenm lasante. Kontinyen donn nou bann dimoun aze en pansyon.

Donk i annan en kontribisyon ki nou pe fer, pa

zis kale pa pey ou pa e apre ou le desann kot Lorloz. Non, nou tou nou bezwen fer *nou fair share*.

E la osi nou bezwen dir avek bann Lasosyasyon. Zot pe ganny ase letan, alors organiz zot. Met zot lekor annord, pey sa ki zot dwatet pey, konn zot responsabilite e lobligasyon moral. E sa i ava osi permet nou Rezistrar annan li en rezis bann Lakonpanyen Lasosyasyon ki annord e azour.

E ki alor Sesel dan bann revi ki bann Lorganizasyon Enternasyonal i fer, par egzanp *FATF* e *OECD*, i kapab vwar poudir letan i *comes to compliance* legal nou annord. E nou stati i kapab monte.

Tousala i bann keksoz ki kolektivman nou bezwen pe travay ansanm pou akonplir. E koman en Lasanble nou merit pe koz avek en sel lavwa pou kit nou lizye lo Brans Egzekitiv, pou asire poudir sa pe ganny akonplir.

E mon ava termin avek sa Mr Speaker, pou rapel dimoun poudir wi, Gouvernman in atantivman, in zwenn kominote biznes e bann lasosyasyon dan milye semen pou kapab donn zot sa dele letan pou regle zot bann kont.

Nou'n konpran poudir dan letan *COVID* in difisil pou zot zwenn, pou kominike. Pou fer

zot bann *AGM*, pou fer zot bann odit. Dimoun pa'n kapab zwenn pou siny bann dokiman. Ouswa zot in dir poudir lannen pase ler ti annan sa lamannman, an Zen 2020 in napa osi piblisite otour pou zot konnen zot bezwen pey sa R500. Donk nou pe sey aranz tousala, me nou pa kapab termin san pouse.

Nou'n tann koz lo *digital economy*. Nou bezwen met sa pwen devan Egzekitiv poudir bann fasilite *online* pou dimoun soumet bann dokiman avek Gouvernman, i bezwen vin osi vit posibil.

Koumsa ki demen pou napa leskiz poudir mon pa ti kapab ariv tel bor, tel bor. Me dan konfor nou prop lakour, nou lofis nou kapab asire ki tou nou bann lobligasyon legal i ganny akonplir.

Donk, avek sa Mr Speaker mon pa vwar difikilte pou siport sa propozisyon ki devan nou. Akoz i pe ede fer pei e kominote biznes vin meyer. Mersi.

### **MR SPEAKER**

Mersi. Mersi Onorab. I 3er edmi. Nou a gard nou *Schedule*, nou pran en *pause* la e nou a retournen 4er.

**(BREAK)**

### **MR SPEAKER**

Byenveni *Attorney Zeneral Frank Ally* dan ou delegasyon. Nou a rebran deba. Onorab Woodcock.

### **HON WAVEL WOODCOCK**

Mersi Mr Speaker. Mr Speaker parey plizyer bann entervenans ki'n pran laparol avan mwan, zot in eksplik sa vreman byen.

Provizyon ki pe ganny fer dan sa *Bill* se provizyon pou *extend time limit* pou en lakonpanyen ouswa lasosyasyon soumet zot *audited account ek annual report* an 2022 - *to be precise* le 31 Zilyet 2022.

E sa i aplikab pou bann konpanyen ek bann lasosyasyon ki *due* pou zot *submit* zot *audited account ek annual report* pou lannen 2020 avek 2021. So sa peryod in ganny *extend* pou ziska 2022 e pou napa okenn penalti ki pou aplike pou zot. E an plis ki sa *annual fees* ki zot sipoze peye osi in ganny *extended* ziska 2022.

Mr Speaker nou lekonomi i depan bokou lo sektor prive, e *survival* bann biznes i enportan, par lefe ki reveni ki en pei i kolekte i atraver bann aktivite ekonomik ki bann biznes, ki bann lakonpanyen i fer. Isi sektor prive ou kapab dir ki pli gro moter nou lekonomi.

E nou Gouvernman anba direksyon Prezidan

Ramkalawan ek son *Cabinet*, in pran bann gro desizyon Mr Speaker pou relans nou lekonomi, pou re pozisyonn nou, pou nou kapab fer nou pei pour ki ozordi nou lekonomi pe refer, nou pei pe refer nou, sirtou nou lendistri *tourism* ki pe *recover* ase byen ki annefe si ou al tre byen nou kapab fini en pti pe pli ba ki 200mil viziter.

E an menm tan Gouvernman a pe bouz, i annan lentansyon pou diversifye nou lekonomi, i pou antre dan bann lezot sekter, investir dan bann lezot sekter e ankouraz bann lezot lantreprenarya, bann lezot antreprenner, pou antre dan bann lezot sekter menm nou bann Zil Elwanye.

I malere Mr Speaker e mon en pe dezapwente ki nou pa pou tann lo lot kote latab ki zot annan pou dir lo sa *Bill*, par lefe ki resaman zot in zis opoz tou keksoz. E i pa ti pou drol si zot ti pou opoz sa Prozedlwa ki devan nou. Annefe *anyway* parey parol i dir ler manrmay i pa konport zot paran i bezwen pran disiplin avek zot.

Mr Speaker Sesel biznes ti ater net! Nou ti ater net nou ti lo nou zenou e Gouvernman dan son kler vwayan in vwar poudir nou pou bezwen fer bann keksoz, pran bann

desizyon pou nou reorganiz nou pei, nou lekonomi.

E tou bann desizyon ki sa Gouvernman in fer, i bann desizyon ki'n ed nou ariv kot nou ete ozordi. E sa Prozedlwa ki devan nou i enn desizyon enportan ki sa Gouvernman pe donn bann pti biznes, bann mwayen biznes, bann gro biznes pou zot kapab respir en pe.

Akoz nou tou nou konnen nou'n konn tre byen nou'n eksperyans sa, lekonomi ti ater net en kantite biznes ti bezwen fermen, i annan en bann ki'n - mon mazin Praslin li menm.

Ozordi *in fact* Mr Speaker ler ou pou get enn de biznes zot pe sey *recover*. Akoz ler nou ti'n pas dan *COVID* parey bann *car hire* par egzanp, en bon pe zot ti bezwen vann zot plizyer zot bann transpor;- *downsize* - *scale down* zot lakonpanyen zot, zot kapab *survive*.

E Gouvernman in konpran, in atraver bann konsiltasyon avek plizyer bann parti prenan, zot in war poudir i annan sa lenportans pou nou ed bann biznes donn zot sa letan pou zot soumet sa bann dokiman nesaser, *extend* sa peryod, pou donn zot sa letan pou respire, pou refer, re anmas larzan - re organiz zot biznes.

Non selman ki parey mon'n dir *COVID* in afekte bann biznes, me in annan en lenpak ase signifikan e enportan e serye lo bann travayer osi. Nou pei ti pas dan en peryod en letan kot malerezman bokou nou bann frer in bezwen ganny fer *redundant* sirtou lo Praslin, La Digue. Malerezman Onorab Uranie pa la pou konfirm sa.

Kot nou ti ganny atake vreman, vreman for, kot en letan ti annan *scarcity* ti napa preske ditou travay, e dimoun ti pe *struggle* pou zot kapab ganny en pti louvraz pou met manze lo zot lasyet.

Me ozordi avek bon desizyon ki Gouvernman in pran pou re ouver nou pei, nou'n war poudir nou lekonomi in *kick-start* akoz sa bann bon desizyon ki nou Gouvernman in pran e enn sa bann bon desizyon se programm vaksinasyon.

E ozordi i annan pre 4mil lanplwa ki *available*. E si mon pa tronpe dapre dernyen statistik ki Minis Lanplwa ti dir devan sa Lasanble, mon krwar i annan anviron 900 dimoun ki pe rod louvraz e nou annan nou apepre 4mil *jobs* - louvraz ki *available right now*.

E Mr Speaker ozordi personn pa pou bezwen - personn Mr Speaker pa bezwen pran en laliny pou al

*kick* obor Lorloz. Akoz louvraz i annan pou tou dimoun. I nepli en letan ozordi pou nou sey manipil dimoun avek en 500 en 600 ouswa en *line* R25.

Mon krwar R500 ozordi pou servi sa bann dimoun, olye ki nou pou ankouraz sa bann dimoun pou pran bann lanplwa. Akoz biznes pe refer Sesel. Biznes pe refer Sesel akoz bon desizyon ki nou Gouvernman in pran.

Ozordi personn pa pou bezwen vann zot nanm pou en boutey *Jameson* Mr Speaker! Tou dimoun Sesel i annan loportinite pou zot travay. E menm pou relans zot biznes. Ti annan en letan fasilite kredi i ti annan en *issue*. Mon rapel labank bokou bann biznes ti pe konplent poudir labank pa ti pe donn kredi.

E la nou war lenformasyon ki nou'n gannyen se ki bann labank pe re komans donn kredi ankor. Pe donner bann *incentive* menm Gouvernman a pe met plizyer *incentive* an plas.

Zisteman sa wikenn ki'n pase la Onorab Gill si i ti la, i ti'n kapab konfirm sa - ti annan en miting avek *SeyCCAT*, e *SeyCCAT* pe ofer bann *Grant* pou bann pti biznes dan *Blue Economy*. E i annan plizyer milyon atraver *Blue Bond* e lezot mwayen finansman pou dimoun kapab antre dan biznes.

Bann dimoun ki annan bann lespri inovativ, ki annan zot *project memorandum*, ki annan en nide en biznes menm ki pou anmenn en valer azoute pou nou pei dan nou lekonomi. I annan tou loportinite ozordi pe reganny kree pou nou kapab refer nou pei.

E in annan plizyer desizyon ki Gouvernman pe pran aktyel, parey sa enn ki la pou donn sa peryod gras ziska lannen prosenn, pou bann biznes kapab - parey mon dir re debout lo zot lipye. E mon konnen ki pou annan ankor bann lezot desizyon ki Gouvernman pou vin avek, ki pou vreman ed bann biznes.

Annou pa - Ou konnen problem ki nou war se ki i annan, i *sad* Mr Speaker se ki nou annan en parti - mon pa konnen si aköz mon konnen poudir en *Leader* pe fer en kote, lot *Leader* pe fer lot kote ennler zot *clash* avek kanmarad enn pe fer dezord an deor, lot pe fer dezord dan Lasanble Nasyonal.

Konmsi mon santi poudir i annan en pe konfizyon, aköz menm ennler ler ou ekout bann Manm lot kote latab koze la, ou war poudir i annan en *misalignment*. Ou war enn ou 2 kekfwa Onorab Lemiel ouswa Onorab Gill, ou war konmsi i pe konpran travay ki Gouvernman pe fer. Me i

annan en bann ki zot zis la pou kritik tou keksoz! Napa naryen ki byen!

Nou Gouvernman atraver *EXPO* ki nou pe partisip ladan ozordi pe dir ou anviron plis ki 15mil dimoun in vin devan *EXPO* pe war loportinite lenvestisman dan Sesel. Sesel pe ganny ekspoze lo en nivo *global*. E nou Prezidan atraver bann *Press Conference* ozordi tou dimoun i oule *interview* Prezidan Sesel.

Akoz i pa anbaras nou, i pa koz lo '*grow fish*', *gasification* ouswa en bann zafer pou fer nou kanmi dan dimoun - Nou Prezidan i pe kree en repitasyon enternasyonal pou nou pei e ki bon, ozordi tou *CNN* partou i oule entervi nou Prezidan.

Nou bann Minis ozordi, Minis pour Sanzman Klima ek Lanvironnman, Minis pou *Foreign Affairs*, ozordi Sesel pe ganny kredibilite e respe atraver lemonn! Si ou war apre pou en Prezidan Lanmerik i koze, Prezidan Sesel i koz apre li apre en lot Prezidan enn sa bann gro pei pwisan bann pei pli for dan lemonn, (*La France* Prezidan i koz apre nou Prezidan) i montre respe ki zot pe donn nou Prezidan, menm si nou sorti dan en pli pti pei dan lemonn!

**(APPLAUSE)**



**HON WAVEL WOODCOCK**

E premye fwa dan - mon swiv byen sa bann zafer deba lo *Climate Change* e premye fwa mon war en Prezidan koz avek sitan pasyon e ki konnen ki i pe koz lo la. Ki i pe pouse lo sa *issue*, lo sa problemn Sanzman Klima ki pe enpakte nou pei ozordi e sa i en keksoz ki nou bezwen sipor ban pei enternasyonal.

E nou bezwen kontinyen koman en Gouvernman, kre loportinite pou nou bann Seselwa, bann biznes kapab antre dan nou Lekonomi Ble, e lezot loportinite ki sa pei i kapab ofer.

Ozordi zot bezwen komans *think outside the box*. Nou pa kapab annan sa bann lespri akeyir Kominis, Sosyalis Marksisis lepase, bann vye lespri ki'n fini! Ki'n antere ki'n pouri. Ou konnen?

Bann lespri 'Zonm Lib' son letan in fini. Ozordi i letan pou nou gete ki mannyer nou pou bouze nou pei pli devan, ki mannyer nou pou ed bann biznes;- ki mannyer nou pou ouver laport pou Seselwa kapab investir, pou Seselwa kapab bouze.

Non, pa zis Sesel me pou Seselwa osi kapab bouz deor, pou al partou dan lemonn. Nou pa'n war. Nou'n war *very few* Seselwa ki'n perse partou dan lemonn. E mon ti apresye

ler mon war en antreprenner lokal ki baze Praslin pe *showcase* son prodwir aletranze.

En loportinite pou lezot biznes Sesel al ekspoz, al *market* zot bann prodwi ki zot annan aletranze. Mr Speaker sa Gouvernman dan en letan in sitan difisil ki lemonn pe pas ladan, i *still* pe pran bann linisyativ ki pe ed nou pei. Zot pe mazine sa pti biznes deor, zot pe mazine sa *medium small micro enterprise* deor.

Akoz nou annan en lentre pou nou ed nou bann dimoun. Akoz nou lekonomi i bezwen *recover*, akoz nou kont lo la pou nou *survive* konman en Nasyon. Alor Mr Speaker mon santi ki sa Prozedlwa ki devan nou i enn ki bon. I malere ki lot kote latap pa la pou siport nou lo sa Mosyon. Si zot ti pou siport nou lo la.

Me nou lo sa kote latap mon konnen ki nou tou nou pou siport sa Prozedlwa ki devan nou, pou nou ed nou bann frer ek ser ki dan biznes Sesel. Avek sa 2 mo mon dir ou mersi Mr Speaker.

**MR SPEAKER**

Mersi Onorab. Onorab Georges *Leader* Biznes Gouvernman.

**HON BERNARD GEORGES**

Mersi Mr Speaker. Mr Speaker mon ti anvi koz apre Onorab

Pillay apre midi, me mon pa mazin ki i pou entervenir lo sa enn *Bill*. Alor mon a ferm deba. Mr Speaker mon pa anvi repet sa ki'n ganny dir. Si mon pe pran laparol apre midi se pou 2 rezon prensipal.

Premyerman bomaten mon'n tann bokou dimoun lo lot kote latab eksprim zot ase fortman lo size *over legislating*. Ler nou ti pe koz lo *Minor Offences (Amendment) Bill*.

E pou zot sa ki nou ti pe fer, se nou ti pe servi en marto en pe tro gro pou kas en pti problem. Mon pa dakor Mr Speaker. E se pour sa rezon ki mon krwar l apre midi nou devret zwenn sa largiman ki zot ti fer bomaten, e pou eksplik akoz ki sa Gouvernman pa mazin parey zot, zot mazin.

Mr Speaker ler nou regard sa ki pe arive dan nou pei, nou vwar ki sa enn Gouvernman, sa enn dan administrasyon depi sa lan ki i la, pe pran (parey Prezidan in dir nou ler i ti devan sa Lasanble semenn pase) bokou letan pou anmenn e pou *update* bann Lezislasyon dan nou pei. E la ozordi nou pe *update* 2.

Natirelman dan sa travay, i pou bezwen annan dan serten konteks en ranforsisman lo striktir legal ki mannyer i ete. E se sa ki nou ti fer bomaten, ti annan

serten defayans. E bokou dimoun sirtou lo sa kote latab in koz for lo akoz nou bezwen antreprann en bann mezir en pe pli sever lo bann defayans ki arive dan bann lofans ki relye avek transpor piblik, avek transpor avek lafason ki nou dray lo semen, avek la fason ki nou park. Avek annefe bann *minor offences*.

Me dan en regar filozofik nou pa kapab zis aret la. E apre midi nou ganny en legzanp ki mannyer sa Gouvernman - non selman i reser leto kot fodre resere - me i osi asoupi kot fodre asoupi. E se sa mon krwar ki en Gouvernman responsab parey in ganny dir avan mwan, i fer.

I pa *one size fits all*. I bezwen target bann Lezislasyon dan en fason egzakt e spesifik e fer bann keksoz ki spesifik, pou fer ki kot fodre annan plis responsabilite Lalwa i fer sir ki sa i arive.

Me dan bann landrwa kot dimoun i bezwen ganny ankouraze pou zot fer en keksoz ki kekfwat zot pa'n ganny letan oubyen zot in defayan lo la, donn zot sa loportinite pou zot koriz zot fot.

E nou ti vwar pa tro lontan pase ki SRC ti anmenn menm kalite Lalwa devan nou isi, pou donn en *moratorium*, pou donn en letan pou bann

dimoun ki pa ti'n pey zot taks vin devan e peye.

E s ase toutafe filozofi en Gouvernman a en baz liberal. I pou donn ou lankourazman kot ou neser pou ou kapab avanse e olye zis pini, pini, pini, parey nou vwar dan lezot pei. E donk oubyen menm isi dan bann lezot lepok.

Alor Mr Speaker mon krwar ki nou bezwen annan sa lespri filozofi dan nou latet. E nou kapab ganny en lide ki sorti atraver legliz, sirtou legliz Katolik.

Me osi tou ban legliz kretyen ki annan sa posibilite tanzantan ekskonminyen en dimoun. E tou dimoun i krwar ki ler ou ganny ekskonminyen dan en legliz - savedir ou'n ganny sase dan en legliz, ou'n ganny met apar, ou napa drwa vin konminyen. Ou napa drwa vin pran lakominyon Dimans bomaten. I pa sa ditou.

Ler ou ganny ekskonminyen o kontrer, se pour ou ganny en sans reform ou lekor e retourn komans en meyer dimoun. E set egzaktaman sa kalite filozofi ki nou vwar atraver sa bann lamannman ki Gouvernman pe anmennen, e sa enn ki i pe anmennen la apre midi.

Pou donn en sans bann dimoun pou zot *recover*, aköz sa Gouvernman sa ladministrasyon i realize ki ler ou donn en dimoun en pe plis

divan anba son lezel, ou pou ganny bokou plis rannman *down the road*.

Alors se pour sa rezon Mr Speaker ki mon ti anvi pran laparol apre midi, pou sitye sa 2 Lalwa ozordi ki dan zot konteks respektif. E mon ti a kontan avan konklir osi etandonnen ki Mrs Pierre i la ozordi e *Attorney Zeneral* ki efektivman *quote - unquote* 'son boss' aköz Departman *Registration Division* i tonm anba Biro *Attorney Zeneral*.

Pou mwan dir 2 mo an faver *Registration Division*. Mr Speaker i fasil pou nou kritike e nou tou ki annan travay pou fer avek sa Departman, avek *Registration Division* nou fristre annan defwa. Napa leksepsyon dan sa ki mon pe dir la, aköz keksoz pa bouz osi vit ki nou ti ava swete.

E nou tou nou konpran sa, e nou konnen bann rezon i ganny evoke apre midi, i annan en mank kapasite, i annan en volim travay in ogmante enormeman e nou bezwen al dan en *e-government*. Dan en fason elektronik bokou pli vit pou kapab asoupi sa volim travay ki nou bezwen fer ozordi.

E mwan mon ti a kontan dir 2 mo an faver sa bann, Mrs Pierre avek son bann *staff* ki travay dan en fason devoue, pou avek bann konplent ki zot annan pou sey amelyor sa

servis e anmenn zot servis devan.

E dan a konteks mon ti a kontan ki dimoun i realize ki Prezidan Larepublik i annan 3 sapo ki i mete, i *Head of State*, i *Head of Government* e i *Commander-in-chief of the Armed Forces*.

Sa Mrs Pierre ki la ozordi i li menm li *Registrar General, Land Registrar, Registrar of Companies, Registrar of Associations, Registrar of Trademarks, Curator of Vacant Estates* ki la nou pou tir avek li byento e *Stamp Duty Commissioner*.

Donk i annan en kantite sapo ki sa madanm i mete e mon krwar ki nou bezwen pran sa an konteks. E la ki *Attorney Zeneral* i la fer en pledwari pou sey trouv en fason pou nou amelyor sa landrwa travay ek sa bann *staff*. I devret.

I annan en bann *staff* ki la depi ler mwan mon en Avoka zot, zot la e nou ankor pe travay avek zot. Se bann dimoun ki travay tre byen e nou bezwen felisit zot pou sa travay ki zot fer.

Alor Mr Speaker se pour sa 2 rezon ki mon'n pran laparol apre midi e mon ti a kontan Vis-Prezidan konnen ki malgre ki nou pe koz avek en bann sez vid lo lot kote latab, lo sa kote nou, nou pou

siport son Prozedlwa apre midi. Mersi Mr Speaker.

**(APPLAUSE)**

**MR SPEAKER**

Mersi Onorab. Mon envit Vis-Prezidan pou fer son repons lo deba.

**THE VICE-PRESIDENT MR AHMED AFIF**

Mersi bokou Mr Speaker. Bonn apre midi Mr Speaker e tou bann Manm Onorab.

Premyerman mon ti a kontan remersye zot pou zot bann mo lankourazman. Parey zot konnen Gouvernman pe travay dir, vremen dir pou nou dan en fason ou en lot sorti dan sa bann difikilte ki *COVID* in anmennen lo sa pei.

E ozordi sa Prozedlwa ki devan nou pe adres enn bann problem ki sekte biznes pe rankontre.

E sekte biznes an sa ki konsern lanrezisteman zot lakonpanyen, sa bann *annual fees* ki zot bezwen peye e bann penalti ki ganny enpoze ler zot pa'n kapab onor tou zot bann obligasyon, pou bann rezon ki en kantite fwa ti an deor zot kontrol.

Alor nou koman en Gouvernman responsab, ki realiz lenportans sekte prive koman vremen en moter sa

lekonomi, nou'n santi ki nou bezwen zwenn zot lanmwatye semen. E se pour sa rezon ki sa *Bill* in ganny anmennen esansyelman zisteman pou permet ki zot kapab onor zot bann lobligasyon ziska lannen prosenn.

Mr Speaker mon'n ekout byen bann komanter ki plizyer Manm in koz lo la, e sirtou nesesite pour ki Biro Lanrezisteman i vin bokou pli efikas. E mon kapab asir zot ki nou'n antann sa lapel byen for. Nou realiz bann kontrent ki Biro Rezistrar Zeneral i anba la.

E wi, dan Bidze ki pe vini nou pou donn en pti pe plis resours pou sa biro kapab ganny mendev sifizan, pou li kapab fer e delivre son travay selon son manda ki li i annan.

Ti annan en kestyon ki ti ganny demande si bann sonm ki zot dwa pou bann lanmen avan 2019, pe osi dan sa amnesti ki pe ganny donner? Larepons se non zot pa ladan. Parske sa ki nou'n ekri dan sa Lalwa se zis zot ki pe ganny ekzonere - pa ekzonere me aktyelman zot kapab pey ziska lannen prosenn.

E rezon i senp Onorab, mon krwar ti Onorab William ki ti demann sa kestyon, se parske ler Lalwa ti pe komans ganny enplimante, ti annan en diskisyon avek sa bann dan lepase pou zot onor zot

lobligasyon. E zot in fer en serten kantite e Rezistrar Zeneral i dir avek mon laplipar anefe ti'n nobou *settle* sa ki zot ti bezwen.

Me selman an 2019 ki zot ti pou dwa an 2020, sete la kot problemm ti vini. E alors akoz problemm in vin akoz sa peryod spesifik, se pour sa rezon ki nou'n fer sa lamannman, pou permet zot ganny sa letan ekstra pou zot kapab soumet zot bann papye pou lannen prosenn.

Mon krwar ki zeneralman nou pe fer tou sa ki nou kapab, pou asire ki lanvironnman pou biznes i kontinyen reste en lanvironnman ki for, ki met Sesel lo en lesel tre o vizavi *Ease of doing business*. Nou anvi ki nou monte lo la.

E Rezistrar Zeneral osi pe fer son mye avek tou bann devlopman dan *digital economy*, pour ki nou kapab a lavenir vwar bann lanrezisteman ki pou ganny fer *online*.

La ozordi mon pa kapab don ou en dele letan, parske i annan en pe travay preliminar ki pe ganny fer - par egzanp pour *scan* tou bann dokiman ki pou al *online*. Sa i bezwen ganny fer davans.

Pou met son sistenm an plas petet sa i a pran mwens e apre pou nou teste son sistenm pou ale.

Me selman nou pe met tou sa ki nou kapab de kote, pou nou fer sir ki nou kapab annan prodwi en pti pe parey sa ki nou annan kot *Planning Authority*. Kot dimoun i vin soumet zot aplikasyon *online*, zot pey *online*, e zot ganny zot larepons *online*.

Se sa direksyon lo sa Gouvernman i anvi ale. E la kot nou vwar sekter prive i annan en problem nou vin lanmwatye semen pou ed zot. E avek devlopman dan lekonomi ozordi, mon vwar ki mon annan gran konfyans ki pandan bann mwan e sertenman bann mwan ki devan nou, ki sa lekonomi pou amelyor bokou.

E avek sa amelyorasyon biznes a fer pli byen. So malgre ki ozordi zot soufer en pti pe, nou a zwenn zot lanmwatye semen e mon konnen en sa pou anmenn gran benefis pou tou dimoun. Mon espere ki mon'n nobou reponn laplipar bann kestyon ki'n met devan nou.

Mon kapab asir zot ki si i annan keksoz ki nou pa'n koz lo la, nou kapab toultan fer sir ki lo en nivo administratif, nou ava tann zot konsern a tou moman ki sa i ganny leve. E nou la pou nou fer biznes e lanvironnman biznes enn ki favorab pou tou dimoun. E fer sir ki lekonomi i kontinyen grandi parey i devret.

Avek sa mon remerisi ou Mr Speaker e mon ekspekte ki zot pou vot an faver sa *Bill*. Mersi.

### **MR SPEAKER**

Mersi Vis-Prezidan. Nou a pran vot lo sa *Bill* lo merit zeneral. Manm ki an faver lev lanmen silvouple? Mersi. Tou Manm in vote.

Vot lo *General Merit of the Companies and Associations (Interim Measures) Bill, 2021*, 22 Manm in vot pour, 0 kont e 0 abstansyon. Alor sa *Bill* in pase lo *general merit* e madanm Clerk a fer *Formal Second Reading*.

### **MADAM CLERK**

Mersi Mr Speaker. *A Bill for an Act to extend the time limit within which, (1) A company may pay its annual fee that is due during the year 2021.*

*(2) A company and an association may submit their outstanding annual returns and audited accounts and (3) An association may pay the percentage of its profits for the years 2019 and 2020; and to suspend until the 31<sup>st</sup> July, 2022 the application of penalties payable by a company and an association for failing to file their annual returns and audited accounts; and for matters and audited accounts, and for matters*

*incidental thereto.* Mersi Mr Speaker.

**MR SPEAKER**

Mersi. *Bills Committee* zot in pare pou diriz nou dan bann *amendments*? Lekel ki pou pran? Onorab Andre. *Ok.*

**HON CLIFFORD ANDRE**

Onorab Henrie Mr Speaker.

**MR SPEAKER**

Onorab Henrie ki pou pran. *Ok* byen. Dan sa ka nou a pas dan Staz Komite. E Onorab Henrie ou kapab *lead the way.*

**HON GERVAIS HENRIE**

Mersi Mr Chair. Ankor enn fwa bonn apre midi tou dimoun. Premye lamannman ki nou pe propoze i dan Lartik 4 (2) dan dernyen laliny *section 114(3) of the Companies Act, Cap 40* nou pe sizere ki annan en lespas la ki i ganny tire.

Nou pe fer li koumsa akoz Mr Speaker papye ki mon annan, napa bokou, me selman napa ki nou'n agree avan avek.

**MR SPEAKER**

Tre byen. Labitid *VP* ek *panel* nou a kontinyen si ou annan okenn – kler - ki zot anv i fer okenn komanter aret nou zis lev lanmen silvouple. Kontinyen Onorab Henrie.

**HON GERVAIS HENRIE**

*Ok.* Apre nou al dan touzour *Clause 4 (e)* dan katriyenm laliny kot i konmans '*the yearly revenue and expenditure,*' apre *expenditure* nou oule met en virgil. E nou ava touzour dan sa menm *Clause* sizyenm laliny kot i komans 2020, nou oule met en virgil apre 2020.

Apre nou pou al dan *Clause 6,* kot i komans *notwithstanding.* *Ok.*

**MR SPEAKER**

*Un instant,* Attorney General i oule fer en pwen. Attorney General wi.

**THE ATTORNEY GENERAL**

**MR FRANK ALLY**

Mersi Mr Chairman. Nou ti a kontan aport en pti lamannman dan *Clause 5* pou retir *sections 6(2)* nou tir sa (2) akoz i paret mwan i annan en keksoz ki'n garde akoz ti annan en *6(2)* me ler nou'n tir *6(2)* nou'n bliye tir *6(2)* so nou a tir sa *6(2)* dan tou sa *bracket* tou. Mersi.

**MR SPEAKER**

Byen. *Bills Committee* ou swiv sa e *LGB* ou pe not li dan ou versyon.

**HON GERVAIS HENRIE**

Mr Chair mwan, lekel ki pe *Track* nou - ? Onorab Georges, *LGB* pe *track.* *Ok very good.* So nou lo *Clause 6...*

**MR SPEAKER**

Onorab Georges ki fer sa devwar toultan.

**HON GERVAIS HENRIE**

So, nou lo *Clause 6* dan dernyen laliny kot i dir “*until the 31st July, 2022*” so nou oule tir sa mo ‘*the*’ avan *31st*.

Nou pou al dan *Clause 7* kot i komans ‘*notwithstanding*’, dan dezyenm laliny kot i komans *annual fee*, nou oule met mo ‘*an*’, konmsi i a vin ‘*an annual fee*’ dan son dezyenm laliny. Dan sa menm *Clause* dernyen laliny *the end of the 31st July*, e la nou oule tir sa ‘*the*’ avan *31st* e pou *purpose* konsistan si nou ti kapab azout ‘*st*’ avek, i a *ok*? *Ok*.

Nou kontinyen. Nou pou al dan *Clause 6(4)* dan son dernyen laliny kot i komans avek “*suspended until*” la osi nou oule tir sa mo ‘*the*’ devan *31st July, 2022*.

**MR SPEAKER**

Ou'n dir *6(4)* ou ouswa *7(4)*?

**HON GERVAIS HENRIE**

*6, urgh 7(4)*. Mon prezant en leskiz, *7(4)*. *Ok* nou pe swiv mon ava al lo *Clause 8* dan trwazyenm laliny ki komans avek ‘*until*’, e la osi nou oule tir sa mo ‘*the*’ avan *31st*.

Aprè nou pou al dan *Clause 9* dan dezyenm laliny

kot i komans *Cap 201*, ankò sa fraz li lir ‘*before the 31st*’, so nou oule tir sa mo ‘*the*’ avan *31st ok*, nou pa pou tire? *Ok* so Mr Speaker savedir pou reste, *before the 31st day of July ok* so i reste parey. *Ok*.

**MR SPEAKER**

Dan mon versyon, sa laliny zis avan *Associations Act, Cap 201* i, *ok* i korek *sorry, yes* i byen, mwan ti pe mal regarde.

**HON GERVAIS HENRIE**

Donk. Aprè Mr Chair nou pou al dan *schedule 1*. Dan sa paragraf ki komans avek

**MR SPEAKER**

*Un instant, Attorney General* oule fer en, avan no al lo la-

**THE ATTORNEY GENERAL****MR FRANK ALLY**

Mersi Mr Speaker. Mr Chairman si, mon war poudir dan *Clause 9* Lasanble i anvi kit *before the 31st*. So eski i *ok* pou nou *therefore insert* en *before the 31st of July, 2022* dan *Clause 10* dernyen laliny? Ouswa nou kit li parey *before 31st of July*?

**MR SPEAKER**

Wi, Onorab Georges ou pe adres sa ou?

**HON BERNARD GEORGES**

Yes Mr Speaker. Mr Chair mersi. Annefe rezon mon



krwar ki i reste dan 9 se aköz dan 9 zot in servi sa formil *the 31st day of July*. Tandis ki dan tou lezot landrwa i zis *31st July* - napa '*day of*.' So ler ou annan *day of* ou bezwen met en '*the*', me ler napa *day of* ou kapab '*do away with the, 'the*'.

**MR SPEAKER**

Korek AG? Ok. Onorab Henrie.

**HON GERVAIS HENRIE**

Ok, mersi Mr Chair. So nou lo *schedule 1*, dan paragraf ki komans avek 15 dan son senkyenm laliny ki konmans '*in a civil action,*' sa mo *Magistrates* in ekrir avek *Magistrate's* apostrophe 's' nou oule ekrir li in *plural 's' apostrophe Magistrates' Court*.

**MR SPEAKER**

AG wi.

**THE ATTORNEY GENERAL**

**MR FRANK ALLY**

Mersi Mr Speaker. Mr Chairman sa *rules* si mon memwar i servi mwan byen, i ganny ekrir koumsa. Non?

**MR SPEAKER**

Onorab Georges.

**HON BERNARD GEORGES**

Mon'n tyeke Mr Chair e mon krwar ki i 's' apostrophe si mon memwar i byen. Mon konnen ki mon'n tyeke *unless* ki i annan en - *unless* ki mon

memwar i defayans mon krwar ki i 's' apostrophe.

Yes *it's a common mistake* ki menm lo Lakour Mazistra *next door* ou war ki zot in met *Magistrates Court* koman son *sign*, me *actually* i *Magistrate* i toultan in the *plural Magistrates' apostrophe Court*.

**MR SPEAKER**

Dan Lalwa ki nou ti pase bomaten ti annan menm soz, i ti 's' apostrophe. Byen AG ok korek Onorab Henrie,

**HON GERVAIS HENRIE**

Dan sa menm paragraf Mr Chair dan son sizenm laliny ki komans avek "*recovery of government debts*", nou oule met insert en *bracket* zis avan sa mo *summary procedure*.

**MR SPEAKER**

Onorab Henrie repas lo la silvouple. In met, dan versyon ki mon pe war i met *bracket* apre '*debts*' apre i met '*summary procedure*' i an en '*bracket*' apre selman i napa en '*bracket*' avan.

**HON GERVAIS HENRIE**

Wi sanmenm sa nou oule met en *bracket* komansman. Devan mo '*summary*.'

**MR SPEAKER**

Tre byen mon konpran.

**HON GERVAIS HENRIE**

Apré dan son *Clause 2, 2(a)* ankor dan dezyenm laliny ki komans avek *section 329 (a)* nou oule tir sa mo 'the' avan *31st*.

E pour rezon konsistan nou kapab azout 'st.' E dan sa menm *Clause* Mr Chair dan son katriyenm laliny ki konmans avek 'of R500' nou oule *delete* sa mo 'in' avan mo 'such', so i lir; "of R500 or such other sum."

Sa i le sel lamannman ki *Bills Committee* ti annan Mr Chair.

**MR SPEAKER**

Tre byen. *Panel* pa'n lev lanmen? *VP* korek lo sa bann pwen? Tre byen. Mon annan en lev lanmen laba, Onorab Andre.

**HON CLIFFORD ANDRE**

Mersi Mr Chair. Mr Chair mon annan zis en pti, apré dan *2(a) 31st July*, i annan en *comma* apré *July*. Zis pou nou ganny li byen nou ti'n rekomande ki i annan en *comma* apré *July* ki pa'n ganny dir, mersi.

Dan *2(a)* dan *Schedule (1) 2(a)* apré, 'the' nou'n tire *31st July*, *there is a comma*.

**MR SPEAKER**

Yes. Onorab Georges oule adres sa?

**HON BERNARD GEORGES**

Non Mr Chair. Mon ankor pe rode. Mon ti anvi adres en lot pwen ler ou pare, kot mon pa war, *schedule ok, sorry, apologies*.

**MR SPEAKER**

Ti lo paz 8 sa.

**HON BERNARD GEORGES**

Wi, *what is the amendment?*

**MR SPEAKER**

Oule Onorab Andre i repet?

**HON BERNARD GEORGES**

Wi, *in fact* nou'n tir en *comma* after *July yes*. Sorry, yes nou'n tir sa *comma*. Onorab Andre i annan rezon i annan en *comma* ki ti apré *July* ki nou'n tire.

**MR SPEAKER**

Tre byen.

**HON BERNARD GEORGES**

Mr Chair mon ti anvi re ganny en pwen ensinifyan me etandonnen ki nou pe fer li, mon bezwen fer li. *After the long title* i annan en pwen *at the end of the long title* ki nou ti'n omit. Fodre nou *insert* en pwen. Mersi.

**MR SPEAKER**

*So back to the beginning* en?

**HON BERNARD GEORGES**

Yes. An Act - for an Act to extend, ti devret annan en pwen *at the end*.

**MR SPEAKER**

Byen. Okenn lot pwen? *From Members?* Non, ok dan sa ka nou'n fini avek *amendments* e nou a repas dan staz Lasanble.

LGB i a prezant Mosyon pou *Third Reading of the Bill please?*

**HON BERNARD GEORGES**

Mersi Mr Speaker. Mr Speaker anba *Order 76(1)* mon *move* ki *Companies and Associations (Interim Measures) Bill, 2021 as amended* i ganny lir en Trwazyenm Fwa. Mersi.

**MR SPEAKER**

Mersi. Mon a ganny segonnman. Onorab Arissol.

**HON SANDY ARISSOL**

Mersi Mr Chair. *Bill as amended* i ganny segonde. Mersi.

**MR SPEAKER**

Mersi. Manm a vot lo *Bill* lo *Third Reading* lo Mosyon *Third Reading*. Manm ki an faver lev lanmen silvouple? Mersi. Tou Manm in vote.

Lo *Formal Third Reading Companies and Associations (Interim Measures) Bill, 2021 as amended* 23 Manm in vot pour, 0 kont e 0 abstansyon.

Alor sa *Bill* in aprouve lo *Third Reading*. E Madanm Clerk a fer *Formal Third Reading*.

**MADAM CLERK**

Mersi Mr Speaker. *This Act may be cited as a Companies and Associations (Temporary Measures) Act, 2021*. Mersi Mr Speaker.

**MR SPEAKER**

Mersi. E avek sa Lasanble in pas sa *Bill*. Nou'n ariv a lafen lo travay la, e osi lo travay pou ozordi. Donk mon a remersye bann Manm e sirtou remersye *panel VP* avek son delegasyon pou zot partisipasyon.

Nou pou rebran travay demen bomaten lo *Physical Planning Bill, 2021*. E mon remarke ki *VP* pou rezwenn nou pou sa. Donk sa i pou travay demen bomaten. E parske mon pa ti fer li ler mon ti demann Onorab Pillay pou kit lasal, mon oule dir poudir son sispansyon i terminen avek sa peryod, sa sesyon.

So i devret antre dan lasal demen avek son *Caucus*. Mersi zot tou. E mon swet zot bonn sware, e bonn rantre *a la maison*. E mersi nou piblik ki'n swiv nou ozordi. Nou ava *adjourn*.

**(ADJOURNMENT)**